

(欽定)平定七省方略

北京中國書店印行



# THE HISTORY OF THE

THE HISTORY OF THE

THE HISTORY OF THE





欽定勦平粵匪方略卷一百十二 甲寅年

十一月初九日 甲戌 向榮奏言已革江南提督鄧

紹良前因鎮江失守營盤奉

旨革職留營效力交臣擬罪查該革員自撤回金陵隨

同帶兵攻勦每逢接仗無不身先士卒本年秋  
間馳援東壩轉戰太平攻奪采石賊壘連戰皆  
捷逆匪屢次圍攻營盤該革員靜鎮堅守出奇

奮擊該逆創敗數次太平江口內各屬地方亦  
皆賴其保障查該革員素稱勇敢從前屢立戰  
功此次獲咎以來實能愧奮出力可否仰懇

天恩免其議罪仍責令帶兵勦賊以觀後效奏入  
上從之

同日王慶雲奏言臣欽奉

諭旨已革湖北巡撫崇綸當武昌失守逃往荊州偷生

避難實屬昧良負恩著王慶雲派員押解來京交刑  
部候旨訊辦欽此 臣遵卽派員押解起程赴部旋據  
咸甯縣詳稱該革員於十月二十四日在省寓  
病故經 臣飭委道府各員往驗屬實奏入報

初十日 乙亥 西安將軍兼署固原提督扎拉芬陝

西巡撫王慶雲奏言湖北現在一律平靜應將

商南防兵裁撤歸伍惟賊氛雖遠防範不得不嚴查該縣團勇守卡盤查尙爲得力擬將防守潼關之西安滿營馬隊二百餘員名酌留二十餘名以備差遣其餘同壯丁七十六名減撤歸伍設有徵調相距非遙又甯夏滿營官兵九十六員名留防日久亦擬撤退其綠營官兵一千一百餘員名仍駐潼關由臣扎拉芬督令操練

俟連鎮高唐各處賊氛蕩平續行奏撤至商南  
防兵裁撤各鄉民團聲勢甚爲聯絡臣現飭道  
員陳景亮仍將卡勇留防巡詰並令親赴各鄉  
查閱民團妥爲獎勵以期日久奉行其承辦團  
卡各官紳如能始終不懈容臣酌量奏請

恩施再附近潼關之同州府屬沿河一帶漢回雜處素  
有鬪爭現經官紳會議就民團中挑募練勇擇

地分駐以期消患未萌奏入報

同日和春福濟奏言廬州逆匪疊被懲創勢已窮蹙而憑城堅守屢攻未下實因得勝門外吳家巷七里站等處賊營堅築高壘屯聚甚衆外濠三道一律寬深防備極嚴得以往來接應必須趕緊圍剿杜絕來路方可得手十月二十至

二十八等日臣等親督官兵疊次設法進攻先後殲斃賊匪一千餘名該匪竭力拒守我兵連日復進攻大西門得勝門及七里站賊營百端引誘賊不出巢臣等復親督各軍潛伏而進計圖暗襲設法搭橋過河或將抵城下或甫置雲梯均爲賊所覺滾木插石火罐火箭擲如雨下兵勇連傷數人未能登城攻取奏入

上諭曰雖先後斃賊千餘名實未大挫兇鋒似此曠日持久爲蕞爾廬城牽掣大兵太覺不成事體汝等屢次奏報毫無把握負恩糜餉罪責奚辭著仍剋日攻復城池盡殲醜類勿再敷衍入奏也

和春福濟又奏言據探博勒霍布等於十月十九日行抵太湖二十六日楚省敗竄之賊紛紛逃至愈來愈多該員等與賊接仗未能擊退情



形甚爲危急已革知府牛鎮已帶勇馳往等語  
當因劉玉豹臧紆青早抵舒六業經飛飭帶領  
兵勇赴援現在塔齊布等督兵來皖聲威極壯  
兩面夾擊不獨潛太可次第克復卽牛鎮等兵  
勇亦可會合直抵安慶惟六安正陽爲北路門  
戶誠恐該逆被勦緊急鋌而走險臣等先經咨  
會秦定三留心防範昨又調舒城隨營委員候

選知縣尹寶銓秦榮二員來廬面諭迅復城垣  
兼顧北路臣等惟有扼守要隘加意嚴防斷不  
使逆匪乘閒北竄致干咎戾並飛咨袁甲三就  
近防堵正陽關並咨催河南防兵出境一體堵  
禦奏入報

聞

福濟又奏言查壽州紳士員外郎孫家泰於九

月間率衆八十餘人到州城內寄宿門首貼

欽差字條託言袁甲三委派訪辦事件在屋內私設

公座用刑拷問陳大倫孫福田利吳照橫四人

先後斬梟又擅用大枷私行管押人犯並貼木

印告示前列

欽命幫辦團練防勦字據經臣咨詢袁甲三曾否委

令孫家泰查辦團練及管帶兵勇茲接來函並

無其事查孫家泰爲前侍郎呂賢基隨員家居  
兩年並無經理團練徒然殘害鄉閭茲又假託  
防勦越境肆擾擅殺人命私用官刑實屬目無  
法紀相應請

旨卽予革職從嚴懲辦奏入得

旨孫家泰著卽革職交福濟嚴行審訊按律懲辦

上諭內閣曰各省紳士辦理團練原爲其熟悉情形禦

賊保家可助官兵之不逮自軍興以來各省舉行團練紳士中實能秉公盡力捍衛閭閻者不乏其人乃本日據福濟奏安徽在籍員外郎孫家泰假託團練擅殺四命殊堪詫異業將孫家泰革職嚴訊因思各省紳士團練原屬幫同地方官辦理卽或職分較大總歸督撫統率如有惡棍土豪擾害地方仍應控官究辦何得擅自用刑罔顧法紀嗣後各省團練官紳

務各懷遵疊降諭旨於一切勸捐練勇事宜均會同  
地方官和衷籌辦儻該地方州縣各存意見致相掣  
肘著該督撫嚴行叅奏若該官紳等藉團練爲名營  
私擾累並著隨時稽查一併叅辦

十五日

庚辰

楊需奏言賊目僞丞相羅大綱僞指

揮陳姓率安慶賊匪數萬竄入黃梅分踞廣濟  
知南岸官兵已下攻九江意欲乘北岸空虛上

竄斬黃窺伺武漢塔齊布自南岸率領陸軍渡江會勦魁玉楊昌泗由清水河西路進攻殺賊二百餘名追至崇陽橋地方隨勦隨進抵廣濟縣紮營塔齊布與羅澤南等由菩提壩南路進攻賊匪分路來撲我軍奮力衝殺賊勢潰散我軍乘勢縱擊陣斬黃衣賊目一名先後擒斬一千餘名收復廣濟縣城餘賊竄往黃梅復又屯

聚距廣濟七十里之大河鋪官兵拔營前進行  
抵雙城驛賊匪二三萬人分三大股來犯塔齊  
布督同周鳳山羅澤南等分中左右三路迎擊  
痛加勦洗賊衆披靡魁玉楊昌泗後隊繼至乘  
勝追逐與塔齊布大軍縱火焚燒賊營四座殺  
賊三千餘名生擒九十餘名奪獲器械旗幟多  
件兵勇進逼城下復斬獲千餘名生擒一百餘



名當將黃梅縣城克復餘匪散竄楚北境地一  
律肅清其分竄九江安慶賊匪經李孟羣彭玉  
麟等約會江西陸軍水陸並攻李孟羣親督戰  
船直趨九江城下見城外賊築礮臺三座江面  
有快蟹船六隻雜船七八隻對岸築礮臺二座  
江心大沙洲紮營一座極爲堅厚又大木簍一  
座周圍築牆開孔安礮甚多簍下大戰船一隻

又快蟹等船三隻雜船百餘隻依泊洲後攔截  
江路李孟羣督兵衝過賊營進攻沙洲直趨上  
游焚燒賊船數隻殺賊數十人當將城外大小  
賊船一併燒盡轟斃礮臺內賊匪無數復溯流  
回攻北岸沙洲轟斃陸賊數十人揮砍船上紅  
衣賊日落水又燒船數十隻將快蟹各船槳柁  
斫斷轟斃黃衣賊首各船奮勇前進環攻籐下

大船擊斃賊匪多名力戰四時始行收隊惟聞  
江西陸兵在十塘鋪等處接仗尙未得手 臣行  
抵黃州計塔齊布必由黃梅出小池口與曾國  
藩會合擬令頭隊由黃梅進攻宿松太湖協攻  
安慶 臣親督後隊駐廣濟黃梅之間以爲聲援  
並派兵勇分駐蘄州田鎮以通南岸聲勢惟江  
西水陸各軍旣未得手賊踞九江而竄擾瑞昌

南岸興國一帶情形喫重曾國藩現駐武穴 臣  
擬前往面商機宜妥籌辦理奏入

上  
命軍機大臣傳諭楊霈曾國藩塔齊布曰據楊霈奏  
進攻九江情形似該郡賊黨尙復不少塔齊布渡江  
而北南岸官軍卽不能得手是江西陸兵殊不足恃  
塔齊布仍須渡回南岸攻克九江方能水陸會齊順  
流東下若塔齊布一軍由宿松太湖徑抵安慶而南

岸兵力較弱則九江不能卽克水軍爲所阻截未免  
聲勢隔絕此時曾國藩當已與楊需會晤籌商著卽  
南北兼籌勿致顧此失彼楊需摺內有逆蹤竄擾瑞  
昌之語未據詳晰聲敘如果係大股分竄則該逆仍  
欲上窺湖北興國大冶一帶尙未可恃以無虞楊需  
旣駐黃梅廣濟之間與瑞昌僅隔一江自應酌量分  
兵會剿先通水師之路然後能上保楚境下擣皖城

北岸兵勇不下一萬六千人與其分駐田鎮蘄州遙  
作聲援何如合力進攻杜其繞竄儻南北兩岸專恃  
一塔齊布奔馳追剿則湖北江西兩省官兵豈不均  
成虛設耶江西派出督剿之臬司惲光宸前任總兵  
趙如勝距省稍遠亦可由曾國藩等就近調度俾有  
稟承不可稍存畛域貽誤事機

十六日辛巳英桂奏言查陳郡與潁州接壤潁州

又與正陽毗連茲准牛鑑函稱潁州爲豫省門  
戶自應駐紮該處會同皖省協防至正陽關隘  
亦應分兵扼守等語查牛鑑所帶兵勇無多臣  
現添調管帶山西官兵之副將希拉布遊擊德  
興額都司沙春元分帶官兵七百餘名迅赴牛  
鑑行營交其調遣一面咨照牛鑑體察正陽情  
形酌派弁兵嚴爲遏守並囑其隨時知照袁甲

三會同籌辦聯絡聲勢至六安情形雖未喫重  
但思患必先豫防現飭參將慶瑞遊擊王定堃  
帶陝甘兵四百餘名前往駐紮統交牛鑑調遣  
南陽鎮邱聯恩現帶兵勇一千餘名駐紮光州  
該處防勦須資兵力若以全師赴皖實覺分撥  
不遑臣前帶信陽兵勇俱已調撥出防現於省  
中另行抽兵募勇一俟齊備卽親督出省前赴



陳州爲牛鑑後路應援並可策應歸德奏入

上命軍機大臣傳諭英桂曰副將希拉布等帶兵赴牛鑑行營聽調加以前調赴陳兵勇八百餘名正陽一路足資控扼究須與袁甲三隨時知照聯絡聲勢邱聯恩兵勇旣未能全數赴皖卽當飭令將霍邱等處擒匪迅行剿滅不得以駐紮光州爲名頓兵安閒之地致商固匪黨橫行釀爲腹心之患六安現有添調

之陝甘官兵前往駐守亦須相機協勦該撫擬抽兵  
募勇出省爲牛鑑後援惟歸德擒匪未除或應駐陳  
州或應赴歸德英桂當體察緩急親往督辦

十七日 壬午 曾國藩咨齊布奏言逆匪自田家鎮

經官軍痛勦後其僞檢點陳玉成統蘄州之賊  
竄踞廣濟僞燕王秦曰綱統田家鎮之賊竄踞  
黃梅及九江之小池口等處而僞冬官丞相羅

大綱又帶髮賊萬餘分布黃梅境內各要隘臣  
塔齊布督同羅澤南等統帶陸軍分路進剿先  
後殺賊一千二三百名當將廣濟縣城收復李  
孟羣統帶水師各船進抵九江城外分攻南北  
兩岸血戰四時之久燒燬賊船四十餘隻殲斃  
賊匪五六百名搶獲黃旗黃傘紅衣槍礮子藥  
不計其數千總蘇勝把總鄭沐軍功李金樑均

中礮陣亡伏查該逆水中屢次大敗皆因民船  
太多被我燒燬頓失所恃此次民船甚少純用  
大小戰船抵死抗拒又以兩岸及洲中營盤木  
籐互相保護局勢爲之一變欲攻江中之船必  
先破北岸之賊欲攻北岸之小池口必先破黃  
梅大河鋪孔壟驛之賊臣塔齊布現擬督軍速  
下黃梅與水師合攻九江郡城會同勦辦奏入

上諭內閣曰曾國藩塔齊布奏克復廣濟縣城並九江  
水師獲勝已於楊霈奏到時降旨矣所有此次力戰  
捐軀之守備銜千總蘇勝把總鄭沐均著交部照守  
備例議卹六品軍功李金樑著交部照外委例議卹  
其水陸出力文武員弁兵勇著曾國藩等查明擇尤  
保奏

曾國藩又奏言官兵克復廣濟後於十一月初

一日在離黃梅十五里之大河鋪地方大獲勝  
仗殺賊三千餘人踏破賊營五座現查黃梅縣  
孔壘驛及江岸之小池口悍賊尙多日內當有  
數次大戰 臣等陸軍單薄惟當步步謹慎謀定  
後進不敢稍涉大意至固原提督 臣桂明一軍  
臣國藩曾與督 臣商定咨令桂明駐紮黃州以  
防賊由蘄州抄襲後路是以該提督未能同赴

聞

下游奏入報

十九日

甲申

勝保奏言官軍圍勦高唐踞逆臣親

督將士進攻西南兩門冀可出其不意而賊深  
匿地洞濠溝我兵攻近卽受槍傷因伏兵關廂  
百計誘出甫擒殺二十餘人仍卽遁入連日開  
挖地道俱有端倪惟賊濠頗深臨時須設法用

厚板加鑲以蔽泥水方能暗抵城根 臣慚憤無  
以自容探知各省勦辦南賊屢獲大捷儻能及  
此督兵而南合力破賊必可得手乃以此股殘  
寇牽掣我兵不得南下 臣統籌全局楚北雖甚  
得手然賊多竄於下游勢不能容恐其南撲蘇  
常北趨皖豫如賊向和含江浦儀徵一帶上竄  
則由六合天長可達洪湖由滁州定遠可抵蒙



亳由舒城桐城可通潁壽不獨臨淮正陽爲最  
要之區也現在托明阿等兵力萬不能處處兼  
顧臨淮清江正陽一帶雖皆有防然當歲徧之  
時深恐兵勇生懈且賊蹤飄忽情狀百出防範  
少疏卽中詭計相應請

旨特加申儆各路統兵大臣及黃河各口務須益加嚴  
慎但使南賊於年內果無蠢動則北路可望肅

清而南下之師即可繼至奏入

上命軍機大臣傳諭勝保曰據奏連日攻賊情形並統籌全局等語覽奏殊多支飾該大臣擁兵高唐城下數月以來未見寸功所稱攻其西門南門冀可出其不意是必偵知該兩門賊勢鬆懈可以一鼓而進方爲確有把握乃不過誘殺二十餘人仍屬不能得手所開地道與安設地雷亦未見迅速辦妥復以賊濠

頗深又待籌加鑲板賊情詭詐其堅拒之計旣百出不窮該大臣籌攻之具亦已多方均屢試而不效可見兵法所謂知己知彼者該大臣直未講求節次諭令速圖進取毋再遷延豈蕞爾孤城臨以巨萬重兵竟無制勝之策該大臣自知慚憤不思設法剋期攻克以贖愆尤轉慮及於東南兵力之不能兼顧以楚軍南下賊勢必致旁竄防兵徧歲生懈爲虞所言何

嘗不中肯綮獨不知該大臣麾下將士裹糧坐甲瞬  
偏殘年不能生懈耶現在楚境蕩平曾國藩等掃除  
九江一帶賊匪後卽可直擣安慶南北各要隘早經  
諭知各路統兵大員及各地地方大吏嚴兵扼守勝保  
所稱南賊於年內果無蠢動則北路可望肅清是直  
以南賊能否北竄爲高唐能否攻復之符驗舍已責  
人尤爲鄙佞不知東境之賊不過連鎮竄餘之匪爲

數無多一經勦洗則南賊聞風膽落更不敢復萌北  
窺之心卽連鎮賊巢亦失其犄角之勢勝保束手無  
策借遁辭以飾非清夜自思能無羞愧且聞該逆並  
未關閉城門任意出入兵勇無人過問每於數十里  
外搶掠村莊劫取糧食儻任其陸續宵遁茫無聞知  
將來以收復空城入告糜餉勞師俾逆賊蔓延他處  
勝保尙有何顏見朕耶著卽懷遵前旨速籌攻復毋

得於數日後具奏軍情一次以空言塞責也

二十一日

丙戌

曾國藩塔齊布奏言賊匪自廣濟

敗竄後逆首秦曰綱等分率各股麕聚黃梅縣

城踞險死守大河鋪立營五座臣塔齊布與羅

澤南探明賊壘於十一月初一日進攻雙城驛

賊匪二萬餘人乘我軍初至分三路來撲臣塔

齊布與羅澤南周鳳山等亦分路迎擊右路之

賊先潰周鳳山等奮登山岡衝殺岡下之賊亦潰惟中路賊排列溪岸死守不退鏖戰良久我兵躍溪而過刺死悍賊數人該逆抵敵不住我兵分路追殺直偪大河鋪賊壘賊從營內衝出敗賊復行回撲羅澤南等揮軍進戰將賊營五座立時踏破共斃賊三千餘人生擒九十四名奪獲旗幟軍械馬匹無算該逆所聚之糧皆爲

集賢堂卷之二  
三  
我有初二日進兵抵黃梅城初四日周鳳山等  
攻西門羅澤南等攻北門令彭三元等列陣橋  
西以待臣塔齊布與羅澤南繞北面溝港取道  
而入賊衆萬餘排列營柵槍礮火箭齊施臣塔  
齊布督率兵勇仰擊更番疊進鏖戰良久李續  
賓先偪木柵立斬執旗賊目數名羅澤南蔣益  
澧帶勇隨進彭三元等亦從西面越過二橋各



勇從柵門躍入縱火焚燒賊勢大敗辰勇湖北  
勇從東南進道州各勇從西南進適魁玉楊昌  
泗亦率兵勇由大河鋪至四面圍剿賊由營壘  
潰出經我兵刺斃二千餘人乘勢直逼北門城  
上賊匪倉猝奔潰各勇追殺千餘人入城後殺  
斃數百人當將黃梅縣城收復臣塔齊布與羅  
澤南等入城安撫難民餘賊下竄宿松太湖其

大股仍屯踞孔壘驛小池口臣曾國藩已飛咨  
楊霈桂明卽日整隊東來於梅濟交界處擇要  
駐紮以堵西竄之路臣塔齊布卽日進擣小池  
口與水師會合先勦北岸次清江面然後渡江  
以圖攻克九江此次千總周友勝爭先陷陣殺  
賊甚多請以守備補用

賈煥花翎守備余星元滕國獻均請免補守備以都司

補用擬保守備王映軫被戕最慘懇

恩照守備例

賜卹

曾國藩塔齊布又奏言前月江西戰船在姑塘  
被賊撲營小有挫失我軍水師防範愈嚴十一  
月初一日賊船數十前來撲營李孟羣督彭玉  
麟等各營奮力圍攻轟斃賊匪無數鏖戰三時

卒未能大挫兇鋒皆因兩岸賊營太多水陸依  
護抗拒甚力我師與陸軍隔絕孤懸大江介處  
賊營之中晝夜戒嚴該逆每夜以火毬火箭近  
岸拋擲連日雨雪交加水師船泊中港則爲風  
波所撼泊岸邊則爲陸賊所撲故日來水軍勞  
苦有倍過於田鎮以上者臣等查近日勦辦情  
形賊匪搶掠焚燬日甚百姓恨之切骨臣軍所

到處民皆願爲偵探嚮導兼之今年兩湖三江  
年穀豐收萬民樂業翹首望治各省餉需解到  
軍士飽騰臣等全軍二萬人悉皆和睦幾如家  
人骨肉之聯爲一體軍事略爲可恃惟江西水  
師自姑塘失利退紮吳城該逆水陸來撲江省  
戰船四十餘號盡被搶奪旗幟礮械皆爲所有  
該逆現在安徽倣照我軍船式新造戰船三十

餘號意圖西上賊艘益增其氛益熾若使屯踞  
湖口梗塞於鞋山姑塘之間內窺江西外拒我  
軍地形險隘勢難遽下我軍與江西咫尺隔絕  
不能相通探聞九江之賊出撲總兵居隆阿營  
盤湖口之賊分竄饒州臣等陸軍單薄南北不  
能兼顧而且轉戰千里亦恐疲於奔命將領中  
求其獨當一面者殊難其人水師營中楊載福

以積勞致疾何越珽以受傷出營陸路諸將皆  
勇多謀少設有敗挫無能撐拄臣等隱以爲慮  
目今之計惟有力攻小池口孔壘驛之賊紮營  
江岸使水師得所依護待督臣楊需抵黃梅後  
北路足資堵禦然後臣塔齊布與羅澤南全師  
渡江以圖攻克潯郡奏八

上命軍機大臣傳諭楊需會國藩塔齊布曰官軍克廣

濟後旋收復黃梅是陸軍頗爲得手惟大股逆匪尙聚孔壘驛小池口等處我軍水陸兩路聲勢未免隔絕況江西水師未能得手兩岸賊營甚多水陸抗拒曾國藩水上一軍介處賊營之中情形頗覺危險據奏所慮各端甚爲周密此時自應倍加慎重儻將孔壘驛等處賊匪勦盡紮營江岸使水陸互相聯絡然後相機進剿庶不致有顧此失彼之虞楊需現駐黃



梅廣濟之閒卽應督飭魁玉楊昌泗等迅速進剿北岸一帶卽責成該督實力攻勦俾塔齊布羅澤南等可以全師渡江爲圖攻九江之計江西帶兵之臬司惲光宸總兵趙如勝等前已有旨由曾國藩等調度儻該員等不知奮勇勦賊卽當嚴叅懲辦逆匪搶奪江西戰船又在安徽倣造船隻意在拌力死拒該侍郎等務當督飭各軍謀定後戰迅圖克復九江毋令

逆賊日久盤踞

上諭內閣曰官兵攻克黃梅縣城所有殺賊最多之千  
總周友勝著以守備補用並賞換花翎守備余星元  
滕國獻均著免補守備以都司補用其餘出力員弁  
著曾國藩塔齊布擇尤保奏陣亡之千總王映軫著  
照守備例議卹

同日兩江總督怡良江蘇巡撫吉爾杭阿奏言

六合縣在籍紳士翰林院檢討徐蘊首先督率  
紳董將四鄉一百餘堡各自團練追賊竄金陵  
復幫同該縣固守城垣安撫商民率令鄉勇隨  
同殺賊屢挫逆鋒力保危城厥功甚偉可否仰  
求

天恩量予獎勵並請將該紳仍留在籍一年辦理勸捐  
團練事宜以資得力奏入

上諭曰徐稟著賞加贊善銜仍留該處辦理勸捐團練  
事宜

同日托明阿陳金綬雷以誠奏言賊匪盤踞瓜  
州臣等疊次誘戰堅匿不出該處地處沮洳港  
汊溝渠過多進兵撤隊均屬不易現籌多募民  
夫於東西兩岸平墊溝路以便攻勦初七日我  
兵由東岸整隊前進忽見鎮江賊船十餘隻駛

至瓜州旋由賊營突出賊匪六七百人蠡擁前  
來各兵奮勇進剿斃賊三百餘名連日分路進  
攻賊匪亦分股抗拒各隊奮勇剿擊斃賊無算  
該逆三進三退力不能支卽時遁回臣等因瓜  
州鎮江之賊互相援應必須水陸夾擊方能制  
勝嚴飭焦山土橋水師速剿賊簿奪回金山無  
如冬令北風最多水師未能會剿據總兵孫雲

鴻等稟報初六日偶得東南順風卽率快艇礮船由北固山甘露寺進攻賊箠賊船該逆死拒我師攻至金山賊從山後施放大礮我師卽連開萬二千斤大礮將賊築新壘轟塌正欲乘勢進攻而風色轉北卽回攻江神廟一帶賊營轟斃賊匪無數惟風力愈微攻勦未能得手此後雖屢次進攻亦祇轟塌所過賊隍未能直擣中

堅臣等時深焦急惟當趕緊督催相機設法籌  
辦其上游觀音門口時有賊匪箠船駛出經陳  
世忠帶同守備彭常宣駕坐龍哨快船直抵燕  
子磯口駛近賊船因風縱火焚溺逆匪甚多至  
浦口江浦現均安堵探聞全椒滁州亦無賊匪  
闌入石磧橋烏江一帶現已肅清其烏江池上  
駐馬河賊營三座已爲皖省官兵勦洗無遺臣

等仍與袁甲三消息時通並飭六合浦口江浦  
各官兵勤加哨探沿江要隘加意巡防惟水師  
聚泊浦口當以斷賊船練疏通江路爲要臣托  
明阿疊咨向榮分飭吳全美葉常春與李德麟  
等火速進駛現准向榮咨商令李德麟督帶拖  
罾戰船會同吳全美上駛攻勦該副將所帶艇  
船交葉常春管帶留駐浦口臣托明阿隨卽札



飭李德麟與吳全美速赴上游斷賊船練肅清  
江路葉常春專防浦口所有陣亡驍騎校委參  
領永陞委校驍騎榮貴額外委張春生奮勇  
捐軀應懇

天恩交部從優議卹奏入得  
旨永陞等均從優議卹



欽定勦平粵匪方略卷一百十三 甲寅年



十一月二十三日 戊子 勝保奏言 臣前就各處營

盤暗窆地道距城遠者一百數十丈近者八九  
十丈現計各處工程月杪月初可望蕝事但該  
逆詭譎異常揣知我兵暗窆地道勢必格外嚴  
防設法抗拒 臣仍不時於東西南南三面出隊進  
攻十九日西南風作 臣親督官兵攻其西門先

集賢堂卷一百一十三  
一  
將隊伍伏於關後選派官兵往西關內安設地雷又派兵二十餘名直抵西門外向木城放火該匪捨死撲出百餘人分股抄來我兵佯敗賊追至關廂地雷猝發轟斃賊衆三十餘名伏兵齊出賊卽奔回臣仍督兵相機進攻不敢因現挖地道稍有停待奏入

上諭曰地雷轟賊纔三十餘名太不成事汝謂不敢停

待朕以爲敷衍奏章以飾遷延

二十四日己丑和春福濟袁甲三奏言賊匪竄擾

桐城並於大小兩關踞險抗拒臣等派令舉人  
臧紆青等分督各隊會同參將劉玉豹帶兵進  
攻十一月初四日賊衆千餘人由小關出撲我  
軍槍礮齊施逆賊紛紛倒退各兵擁入殺斃賊  
匪百餘名賊以大股回扼大關臧紆青等分帶

兵勇三路進取殺賊二百餘名並殺黃衣賊目  
斫倒大黃旗一面賊衆擾亂忽東面茶葉嶺突  
出賊匪數百人把總呂道宣等帶勇由小徑抄  
出賊後盡力奮擊又斃賊百餘名賊勢已潰西  
面斫樹嶺又出賊衆數百人意圖救援經知府  
葉法等截殺百餘名賊不能支我兵長驅入關  
追至白沙嶺收隊自午至酉連奪兩關共斃賊

六百餘名黃衣賊目一名生擒九名奪獲槍礮  
刀矛等件無數初五日臧紆青等分隊進發追  
殺數十名生擒湖南老賊趙德等三名並將該  
逆所存火藥六七萬斤盡行焚燬乘勝直趨呂  
亭驛復殺賊二百餘名忽有黃衣賊目揮旗整  
隊我軍四面兜圍生擒該賊目並僞司馬等十  
二名槍斃百餘名餘匪竄奔桐城劉玉豹臧紆

青等進薄東南兩門躍過濠溝直抵城下敗賊未及入城者被我軍趕殺數十人復用槍礮擊斃城上執旗賊目數十名守堞賊百餘名其夜閒縋城逸賊數十人亦經我軍截殺十一日夜廬江賊匪會合安慶賊來救援繞至天靈莊搖旗吶喊約有二千餘人兵勇三伏三進千總郭錦首先陷陣刺殺黃馬褂騎馬賊目一名勇目



孫大星等率勇擊殺悍賊數十名臧紆青等復  
合力鏖戰斃賊數百名殺死大黃旗黃帽賊目  
三名餘衆竄入街內其竄出北街者復被郭錦  
及文生鹿慶商等衝殺臧紆青亦率大隊轉至  
賊後四面兜圍當將賊衆殲戮殆盡潰逃之賊  
又經臧紆青追殺並殺賊目僞指揮劉姓又騎  
馬賊目三名奪獲旗幟器械等件不少臣等查

桐城北至舒城一百二十里大小關適居其中所以通安慶廬舒往來之路今爲我軍所奪則舒城賊勢已孤卽廬賊亦將奪氣於通局大有關繫惟該文武所帶兵勇不及二千餘人現旣進薄桐城勢不能分兵駐防兩關而桐境距安慶潛山廬江皆不過百餘里若再不能堵截舒城北路設使賊潛躡其後首尾更難兼顧臣等

惟有嚴飭該文武等相機妥籌不必貪功輕進  
致遭挫折

和春福濟袁甲三又奏言浦口九洲賊船屬  
集和含兩城之賊亦圖固守臣等節經嚴飭署  
臬司恩錫廬鳳道張光第加意巡防相機攻取  
十月二十八九等日忽有賊船百數十隻裝載  
木料在駐馬河之林母圩地方連夜結營五座

豎木爲柵晝夜巡防恩錫等督兵於初五日分  
三隊進攻該逆先將土埂挖斷埂外又連築牛  
馬牆與木柵相間并於牆內施放槍礮併力抗  
拒我兵開礮先將各牆轟壞斃賊數十名乘勢  
縱火將木柵全行燒燬該逆退守營內兵勇趕  
撲賊營遊擊李成虎首越濠溝兵勇繼進立破  
賊營二座都司劉鶴翔等奮勇直前復將賊營

三座同時攻破賊俱飛奔上船我兵追至江邊  
該逆駕船逃遁我兵或躍入水中或擁赴船上  
槍礮齊施刀矛並舉斃賊二千餘人燒燬賊船  
十六隻奪獲大礮數尊旗幟刀矛無算探聞賊  
衆敗奔金陵逆首不復收納多已薙髮潛逃是  
賊氣甚餒當不至再窺北岸爲聯絡和合之計  
惟和州偏近東西梁山賊船會合幾難數計合

山未能克復浦口一帶賊船亦往來自如現飭該司道等隨時偵探一俟機有可乘卽行併力攻取奏入

上命軍機大臣傳諭和春福濟袁甲三曰此次臧紆青劉玉豹等進勦廬舒以南奪回大小兩關直逼桐城辦理甚爲得手惟該員等所帶兵勇不及二千餘人桐城南距安慶西距潛山東距廬江相去皆不甚遠

我軍深入重地三面受敵卽使克復縣城亦恐兵力  
過單勢難守禦臨淮等處卽無兵可撥曾國藩塔齊  
布水陸兩軍現在圖攻九江該處賊匪尙多亦恐不  
能剋期抵皖臧紆青等攻勦桐城固不可遲延觀望  
亦不可銳進貪功致有失挫舒城距桐城僅一百二  
十里秦定三在彼督勦聲勢較易聯絡著和春等卽  
飭該提督迅速抽撥兵勇駐紮大小關以爲臧紆青

等後路聲援該處爲安慶廬舒往來之路今爲我軍所奪和春等正當乘此機會一面督飭秦定三迅攻舒城一面嚴飭各營進剿廬州如能克復郡城卽可統兵南下與臧紆青等合力進剿儻再遷延致大軍爲其牽掣和春等貽誤之咎斷難倖邀寬宥逆匪在林母圩偷結賊營業經恩錫張光第督兵攻毀惟和州含山尙未克復浦口一帶賊船往來麕集著飭該



員等隨時偵探相機進剿勿得株守一隅其上游敗竄之匪並著實力堵禦毋稍疏懈

和春福濟袁甲三又奏言上游逆匪自田鎮蘄州潰敗後退踞廣濟黃梅一帶尙不下數萬人

該處與六安之英山霍山均係切近雖山徑崎嶇行走非易而逆勢窮蹙鋌而走險在在堪虞  
臣和春福濟已飛催河南援兵趕緊來皖以資

防禦 臣袁甲三查永亳土匪儘可責成地方官  
辦理酌留兵勇亦敷調遣已調張維翰撥兵趕  
赴正陽聽調復飛調都司戴世熙先赴該處會  
同玉崑加意防守一俟豫兵到境再行飭回臨  
淮大營再河南兵勇到皖後擬分撥正陽六安  
兩處駐紮正陽歸 臣袁甲三調遣六安歸 臣和  
春福濟調遣庶彼此呼應皆靈不至有鞭長莫

聞

及之慮奏入報

二十六日卯辛向榮奏言鎮江逆匪糧少情急糾

合瓜州金山賊匪於前月二十六七等日由東  
西各門來撲壘經兵勇擊退擒斬多名該匪因  
連次失利突於十一月初十日夜又勾合瓜州  
金山木鐸之賊潛至南門外之河泥山羊角山

倫築土牆礮臺並分踞虎頭山岡子山南台山  
各險十一日分股衝撲冀圖併死下竄經余萬  
清劉廷鎮等督兵分路夾擊斃賊無算當將南  
台山槍占該逆敗聚羊角河泥兩山十二日該  
逆出大股數千復占南台虎頭岡子三山拒敵  
我兵爭先縱擊搃斬多人時游巡兵勇與旗綠  
官兵亦來助戰復將三處山岡全行奪回該逆

仍踞河泥羊角山死守十三日黎明各隊分路  
進剿先選得力兵勇繞出張王廟埋伏該逆正  
在培築土牆一面至三山拒敵我兵大呼殺上  
搃斬多名追過三山伏兵抄出斷其歸路賊衆  
敗入城中我兵直逼南門攻擊踰時該逆伏匿  
死守遂將羊角河泥山土牆礮屋全行踏毀統  
計斃賊三百餘人生擒二十一名奪獲鳥槍刀

集賢堂卷之三十三 十一  
矛多件至金陵賊匪仍復負固不出官兵疊次  
往攻未能得手蕪湖賊船自上游來者日多不  
時闖入清水河百家店地方該處關繫東壩要  
衝高瀆堵守正在喫緊隨將駐守南陵之遊擊  
蕭知音撤回協防查現在陸兵尙屬得力但須  
水師趕上卽可會合兜圍迅圖進剿

向榮又奏言臣自紅單船退回浦口後疊經設

法嚴催乃仍日久遷延探知吳全美葉常春因  
意見不合互相猜疑彼此推諉查紅單爲賊所  
畏吳全美管帶旣久仍令督駕上勦以專責成  
其葉常春所領拖罾六船係在鎮江招募不妨  
更員管帶查有現在浦口防堵之副將李德麟  
幹練有爲與吳全美亦相投契堪與葉常春彼  
此對調經臣咨商托明阿札飭葉常春換帶局

艇防堵浦口下游卽以李德麟接管拖罾船並  
續行撥上之陳國泰紅單船十隻一併委令統  
帶以便隨同吳全美各船會合上駛可期協力  
齊心以收捷效聞各船已剋期進勦如果日內  
風勢順利當不致再有稽延又已革廣東碣石  
鎮總兵王鵬年經臣奏調來營效力現帶浙兵  
赴甯國防勦該革員於水師情形熟悉現今催



聞

趨吳全美各船迅速上攻其所帶浙兵卽委鄧  
紹良暫行接管奏入均報

二十七日壬辰僧格林沁西凌阿奏言連鎮賊匪

受創數十次時思潰竄連日窺撲瑞麟都興阿  
等營牆均經官兵奮勇擊退先後斃賊無數該  
逆窮蹙愈甚防守愈堅臣等每欲進攻該逆無

分晝夜在壘瞭望並埋伏多名擊槍以待不容  
我兵進撲無隙可乘陸續投出民人六十餘名  
據稱情願殺賊報效臣逐一查看俱係誠心向  
順現在賊糧僅敷一月該逆斷不肯束手待斃  
勢必捨命奔撲臣等已諄飭各營加意嚴防乘  
機進攻大約年內可望蕝事奏入

上命軍機大臣傳諭僧格林沁西凌阿曰連鎮逆匪屢

次伺隙撲擾營盤該大臣等僅能待其出撲後擊退  
回巢並不思實力進攻此次所陳擊敗各情亦屬仍  
前敷衍斃賊多寡亦無確數據云年內可望蕨事卽  
使實有此把握又豈得謂之迅速耶所奏賊多設伏  
以待不容我兵進前以數萬官軍勦此窮寇若竟任  
其死守不圖進取日久相持兵糈支絀思之憤悶所  
有投誠賊匪恐不可恃尤應留心駕馭勿墮奸計當

此天氣冱寒士卒疲乏該大臣等惟當激勵各營趕  
緊籌攻斷不准再延時日致生他變

二十八日巳癸巳托明阿陳金綬雷以誠奏言瓜州

逆匪經臣等於十一月十六日督率德興阿穆  
克登額由東西兩岸進攻副將鞠殿華由虹橋  
直徧洲地該逆分股迎拒我兵槍礮齊施斃賊  
無算鞠殿華乘勝督兵支搭浮橋越過賊濠直

抵瓜州城下遊擊海明都司色普哲誦葉舒青  
烏勒宏阿奮力登城城上矢石槍礮紛下該員  
等相繼陣亡穆克登額等復由王莊新橋等處  
分投搜捕將叢林伏賊殲斃四五百名餘匪紛  
紛竄逸十七八等日該逆糾合鎮江大股復竄  
踞新橋連夜架造賊寨四出焚掠該處偏近東  
路各營經陳金綬等督飭晉康鞠殿華帶兵馳

往西路官兵亦隨同協勦該逆二千餘人盡擁  
抗拒我兵衝入轟擊鏖戰三時之久賊力不支  
我軍縱火焚寨立將賊寨焚燬斃賊六七百名  
生擒僞軍帥劉孔尉僞司馬陳政容各一名餘  
匪逃竄回巢查千總郭茂林常麟韓興邦把總  
徐永外委譚光斗楊旺蕭永鳴何永興吳殿臣  
陳祥防禦西豐阿均隨同海明等勦賊陣亡可

否仰懇

天恩賜予優卹奏入

上諭內閣曰新橋一帶逆匪經我兵痛加勦戮賊鋒已挫仍著托明阿等督率兵勇迅卽克復瓜州毋再遷延所有陣亡之遊擊海明都司色普哲請葉舒青烏勒宏阿千總郭茂林常麟韓興邦把總徐永外委譚光斗楊旺蕭永鳴何永興吳殿臣陳祥西安防禦西

豐阿均著交部從優議卹

同日陳啟邁奏言九江逆匪自楚軍攻破田鎮後屯聚廣濟對岸小池口連日復有賊匪五千餘人由安慶前來助逆十月二十一日總兵居隆阿等率兵分路進攻斃匪四十餘人追至城下將賊卡全行燒燬二十六日官兵分隊進攻殺賊多名另股賊匪由額頭山後抄襲我兵潰



散營盤被燬趙如勝等連日奮攻下鐘山賊巢  
未能得手二十八日安慶匪船上駛下鐘山梅  
家洲並有九江匪徒前來會合賊黨約有一萬  
數千人趙如勝督率水軍迎擊轟沈賊船七隻  
火船四隻斃賊三百餘人該逆兩岸槍礮如雨  
趙如勝等奮力鏖戰又焚燒大船三隻擊破子  
母船九隻斃賊八百餘人賊勢稍卻十一月初

五日該逆大股竄至吳城後河縱火十餘處下  
游之賊亦乘勢撲入我軍被衝潰散又值河水  
乾涸戰船不能退回當被焚擄戰船八十餘隻  
槍礮燬失不少餘船退至上游該逆跟蹤內竄  
適廣饒九南道恩齡等帶領快船練勇行抵該  
處協同奮擊賊始退走該逆現在屯聚吳城離  
省甚近幸饒州之賊業已擊退現飭參將祥麟

等星馳回省堵勦並飛咨居隆阿趕緊收拾潰  
兵與臬司惲光宸扼要守禦咨會曾國藩酌撥  
勁旅來江合勦殄滅妖氛

陳啟邁又奏言建德匪徒竄擾饒州府屬之樂  
平浮梁等縣逆衆五千餘人在四十里街紮營  
兩座四處搶掠均經兵勇擊回十月三十日參  
將祥麟等統兵兩路兜勦該逆棄營逃遁兵勇

追殺一百餘人復於沿河擊斃三十餘人落河  
淹斃者無數焚燬賊船十餘隻奪回被擄民船  
四十餘隻槍礮刀矛百餘件糧食萬餘石餘匪  
竄回建德惟皖省匪勢蔓延恐大兵撤回該逆  
復萌窺伺石門鎮爲饒州門戶必須重兵駐守  
已札飭通判慶麟等及都司常安會帶練勇七  
百餘名前往扼守現因湖口賊匪竄至吳城鎮

省城防兵甚單祥麟吳錫光均卽回省防勦奏  
八

上命軍機大臣傳諭陳啟邁曰此次官兵進攻九江多有傷亡以致賊匪分股擾及吳城焚擄戰船八十餘隻逆燄猖狂殊堪憤悶吳城距省甚近設被賊久踞窺伺省城關繫匪細曾國藩等攻勦江面賊船正在喫緊能否分兵助勦殊難懸定塔齊布等陸路一軍

須攻克孔壘驛小池口後始能渡江進取潯城此時  
陳啟邁惟當嚴飭帶兵員弁趕緊將吳城賊匪悉數  
殄除以固省城藩籬至九江兵力疲弱仍著責成居  
隆阿挑選精壯認真訓練以資攻剿勿專待楚軍援  
助致失機宜

同日和春福濟奏言十月十九日候補直隸州  
知州博勒霍布與六安紳士李元華等進攻太

湖賊匪聞風逃竄該員等率衆進城二十三日  
敗匪自湖北蠡擁而來本地文生張冠鼎爲僞  
軍師引賊撲城該處紳士祝澂鑑陳紹鳴力戰  
陣亡李元華受傷出城馳回六安博勒霍布等  
不知下落賊衆聲言集衆往攻英六蘄境之賊  
又時時窺伺英山十一月初五日賊匪直抵城  
下兵勇接仗失利縣城被陷臣等查太湖英山

與湖北接壤賊爲楚師勦急必至西竄英太南  
竄宿望而六安正陽舒桐巢廬皆其窟宅惟和  
含江浦東面沿江內有昭關清流險阻可守現  
派李鴻章進勦含山恩錫屯兵官渡張光第駐  
紮烏衣藉固藩籬又飛咨秦定三隨時差探如  
事屬緊急卽酌派兵勇馳往援勦至六安民風  
强悍已嚴飭知州茅念劬糾集團勇堵禦霍山



則前接袁甲三來函已調河南防兵千名幫同  
都司玉崑扼守正陽以肩鎖鑰皖省地廣兵單  
分撥實形支絀臣等已飛咨英桂迅速調兵來  
皖協同勦洗惟皖兵欠餉已久飢寒交迫窮困  
萬分統計廬州臨淮及各路兵勇每月必需餉  
銀十七萬餘兩陝西原准解銀五萬兩四月纔  
解四萬四川原准二十萬兩半年之久僅解八

萬到皖尙祇一半本省鹽課及捐徵各款每月  
僅得一萬數千兩點金乏術寢饋難安聞河南  
藩庫積有贏餘可以就近分潤請

旨飭令河南撫臣卽撥銀十五萬兩務於年內埽數抵  
廬並乞

方下川陝各省將欠解皖營餉需迅速籌解俾臣得藉  
此激勵兵勇庶幾爭先奮勉以期克復廬城現

在塔齊布曾國藩等已抵九江指日可以東下而恩錫張光第已連破烏江之賊參將劉玉豹等又破桐城之大小二關各路軍務頗振賊膽已寒乘此進剿較易爲力奏入

上命軍機大臣傳諭和春福濟曰前因曾國藩等節次於蘄黃田鎮等處大挫賊鋒朕卽慮楚軍得勝後該逆必紛紛旁竄諭令和春等趕緊克復各城毋使大

兵爲賊牽掣致逆匪被偏北竄乃本日和春等所奏  
廬舒含山各營攻勦情形均不過小勝而博勒霍布  
等所帶兵勇雖入太湖縣城卒被賊匪攻陷英山亦  
復失守固由該提督等兵力未能兼顧亦因廬州等  
處未及攻克致竄皖之賊分支突入勦辦又多棘手  
現在含山官渡烏衣鎮一帶雖有李鴻章恩錫張光  
第等在彼駐紮攻勦惟皖省土匪本多若再與逆賊

勾結勢更蔓延該提督等仍當嚴飭秦定三迅速復舒城以便移兵往剿如果事機緊急卽著秦定三酌派弁兵馳往應援其六安一帶卽飭知州茅念劬集團堵禦前調河南防兵協守正陽已據英桂飭令牛鑑帶兵前往著咨會袁甲三迅速迎提扼守要隘和春等師久無功儻復不能遏賊北竄朕必重治其罪

上又命軍機大臣傳諭樂斌英桂王慶雲曰廬州臨淮

及各路兵勇每月需餉十七萬餘兩現因缺餉軍士  
飢寒所關非細陝西原准解銀五萬兩乃僅解四萬  
兩四川原准解銀二十萬兩僅解八萬兩而解到者  
尙祇一半該省鹽課及捐徵各款均屬無多緩不濟  
急現在恩錫等連破烏江賊壘劉玉豹等奪回桐城  
之大小二關偏近城根廬郡攻勦正值喫緊之際豈  
可使餉項缺乏致滋貽誤著英桂卽飭藩司趕緊籌

撥銀十五萬兩務於年內埽數解往廬郡並著樂斌  
王慶雲仍照前定數目按月補解毋得再有拖欠

上又命軍機大臣傳諭楊需曾國藩塔齊布曰湖北逆  
匪經痛剿後餘匪竄入皖境和春等攻剿廬州兵力  
不敷分撥袁甲三駐紮臨淮兵力亦難兼顧此時安  
徽北路情形喫重楊需現駐黃梅廣濟之間該處與  
皖境毗連該督卽相機移師前進遏賊北竄毋得以

楚境肅清稍分畛域至安慶逆匪分竄九江擾及吳城江西兵勇業經失利旣不能與曾國藩等會合剿擊且恐該逆牽掣我師則曾國藩等亦難直抵安慶孔壘驛小池口等處賊匪是否業已殲除塔齊布等能否渡江攻勦潯郡此時該侍郎等所帶兵勇雖不能撥赴吳城協剿亦當設法兼顧毋令分竄總之上游攻勦得手則江西安徽皆匪蹤所必至楊需等務



當統籌全局使水陸各軍聯爲一氣將濱江兩岸賊氛以次掃除實深殷盼

和春福濟又奏言建德縣自九月二十三日戰勝後忽傳賊將起兵十萬屠城報仇以致人心惶惑遷徙一空知縣王開貽派兵往城南之梅山守禦自率台勇守城二十五日賊到城外候補從九品嚴國佐督隊迎敵斃賊多名旋被圍

困受傷殞命賊衆入城董事徐德先率勇馳救斃匪多人鏖戰踰時武生徐列瑞及胡海舟胡接軍功黃仙鎬相繼陣亡衆勇仍復苦戰賊衆敗走徐德先率練勇進城知縣王開貽已在北城被害是夜四更賊又入城放火二十六日賊出東門至徐家村放火殺男婦數十人以報練團之恨遂進東門出西門往東流一路竄去臣

已飛飭甯池太廣道恩禧督率各屬防勦兼施  
並咨會學臣沈祖懋就近商酌相機辦理以固  
徽甯門戶王開貽黃仙鎬力戰陣亡可否仰懇  
恩施飭部從優議卹徐列瑞等容臣等咨部彙卹奏入

上諭內閣曰本年九月閒賊匪復擾建德知縣王開貽  
派兵出城禦賊自率壯勇守城候補從九品嚴國佐  
督率六品軍功黃仙鎬等擊斃賊匪多名嚴國佐身

皇朝通志卷一百一十三  
三十三

中矛傷猶復手刃數賊黃仙鎬持矛衝入賊隊旋以  
衆寡不敵相繼陣亡王開貽在城上被害俱屬忠烈  
可嘉王開貽嚴國佐黃仙鎬均著交部從優議卹

欽定勦平粵匪方略卷一百十四 甲寅年

十二月初二日丙申曾國藩塔齊布奏言自我師

北渡後該逆三次大敗皆僞燕王秦曰綱僞檢  
點陳玉城兩股居多其僞丞相羅大綱率安慶  
新到之賊尙盤踞孔壘驛小池口一帶與潯郡  
之賊對江而營使逆船得依岸久踞老我水師  
本月初七日羅澤南督同李續賓等共四千人

拔營前進行二十里至濯港地方突遇大股賊  
二萬餘人由孔壟馳至營於濯港小市之北羅  
澤南飭令諸軍堅伏不動相持五六刻該逆分  
一支從田壠繞山撲我東岡之師一支從湖尾  
撲我西岡之師而由中路進者獨多直逼岡前  
我東岡之勇一鼓而下斃執黃旗賊數名西岡  
諸勇旋亦衝出兩路賊潰分途追殺中路悍賊

鏖戰良久前者已死後者不退東西官軍進至  
市前漸抄中路之尾賊黨始三路同潰追入濯  
港市內斃賊四百餘人偪溺市西池中者八九  
百人其大股循市南奔逃我兵沿途追殺又斃  
賊百餘人其小股由湖汊之西逃者湘勇分數  
隊往追寶勇繼之追至數里有伏賊從樹林中  
突出勢甚兇猛諸勇退卻陣亡三名李續賓等

率勇由湖中橫隄抄過湖邊之賊又潰追殺百餘人共斃賊約千四五百名生擒八十五名十一日臣塔齊布進駐白湖渡十二日我軍全師進攻以北路單隄太窄不能布陣乃至烏魚金壩訪有小路可繞賊巢之西南臣塔齊布帶各標從北路隄上入羅澤南帶勇從西南烏魚金壩分路而入殺斃前隊賊匪數名追至孔壟驛



賊見我兵三面環至施放槍礮子如雨下其悍者出牆迎戰勢甚兇猛我兵一擁而前悍賊亦入牆抵禦木石紛擲槍礮愈急我軍跟蹤乘之突入土城或三四人以肩爲梯互乘而入其尤勇者卓矛於地一縱躍入土城者已多而城外仍合成長圍賊黨無處可逃偪入東面寒流泥淖之中溺死者以千餘計奔入市中被諸勇

遣殺者約二千人因縱火大燒街市會西北風  
作孔壘市中數百家須臾灰燼諸勇環守賊衆  
鮮得脫者生擒長髮賊七十九名內有僞副丞  
相余幅勝一名總制陳姓雷姓二名師帥軍帥  
十餘名立予正法臣國藩以孔壘旣破小池口  
之賊必不能支卽飛飭水師進擊李孟羣彭玉  
麟等於十四日卯刻進攻而小池口陸賊已於

十三夜全數奔竄矣餘賊爭駕小划南渡我軍  
急起直追賊划駛近南岸陸賊開礮護之都司  
秦國祿等衝煙進擊賊衆紛紛墮水擊沈賊划  
七八隻焚燬大木簞一座復延燒洲上賊營一  
座遂縱火徧燒小池口陸路賊營煙燄蔽空彭  
玉麟乘勝追至新港復斃黃衣賊目一名賊遂  
披靡奔竄臣國藩卽於是夜泊紮九江城外十

五日臣塔齊布亦至小池口水陸會合該逆於西門出數百人向江心施放槍礮李孟羣飭勇上岸追殺各戰船復轟礮助之賊始奔潰廣勇連擲火毬燒燬龍開河木城一座彭玉麟等遂率大隊直下湖口至扁擔峽洲邊焚燬賊船甚多各營遂分泊口內並口外之梅家洲八里江等處緊扼要隘連日據生擒並投誠之賊供稱

秦曰綱自黃梅大敗竄往舒城羅大綱自孔壘  
大敗卽日竄至小池口率其死黨千餘渡江連  
夜奔至湖口僞丞相林姓現踞九江與湖口相  
犄角將爲死守抗拒之計臣塔齊布於郡城上  
游渡江將繞出南路羅澤南於郡城下游渡江  
將圍攻東路水師扼截湖口務使賊所搶奪江  
西船礮全數兜勦不許竄出大江免遺後日無

窮之累三路痛殲可期上復潯城下清湖口以  
制劇賊之命此次水陸兵勇廓清摧陷轉戰無  
前補用守備朱南桂冒險衝陣連撲賊營應請  
免補守備以都司補用都司童添雲每戰摧鋒  
不避矢石應請以參將升用其餘出力員弁兵  
勇請由臣等覈明保獎仰候

恩施其陣亡兵勇查明照例辦理

曾國藩塔齊布又奏言臣等一軍陸路實尙單薄北渡則不能兼顧南岸南渡則不能兼顧北岸屢欲添調兵勇然非實在得力之軍則無益而反有損是以倍加審慎現在由小池口南渡上則攻圍潯城下則勦辦湖口已屬不敷調遣而北岸宿望潛太等縣尤須有得力之員協勦方無顧此失彼之虞查湖北按察使胡林翼識

略寇時所帶之勇曾經訓練臣國藩前與督臣楊需往返咨商札飭該臬司帶勇二千駐防田家鎮外助大軍之聲援內固鄂省之藩籬中則搜勦匪黨以靖輿治蘄黃之餘孽酌留礮船以巡江楚接壤之河面該臬司接札後卽馳至廣濟之武穴籌議設防事宜武穴去潯僅九十里臣等現因攻圍九江陸軍太單就近飛調胡林



翼來潯助勦一俟克復郡城攻破湖口再行飭  
回楚境駐防田鎮至北路黃梅太湖等縣鄂皖  
毗連北通舒廬東接宿望必須有重兵分布查  
鄂省有副將王國才都司畢金科樸實勇敢馭  
軍有法 臣國藩咨商督 臣楊需督 臣卽酌撥勁  
旅札飭該副將都司交 臣等調遣擬俟鄂境肅  
清卽由 臣塔齊布督帶出境東征至皖省各員

查有池甯太廣道何桂珍現帶勇千餘人督同  
已革知縣李沛蒼在六安等處防勦四品頂戴  
臧紆青亦帶勇至霍山疊准袁甲三函開該道  
等齊至英山俟臣等一軍入皖即可會合進勦  
今臣等攻破黃梅已逾半月而何桂珍尙無來  
會之信現值勦辦喫緊急須併爲一軍乃能呼  
吸靈通首尾相應仰懇

皇上天恩飭諭鄂省之王國才等皖省之何桂珍等概  
入此軍歸臣等調遣其所帶之兵勇由臣等簡  
汰分別辦理庶兵力稍厚於大局更有裨益奏  
入

上命軍機大臣傳諭楊需曾國藩塔齊布陳啟邁曰水  
陸官軍續獲大勝潯郡江面肅清曾國藩所稱陸路  
兵單南北不能兼顧朕已早慮及此是以疊次降旨

命楊需出省督勦北岸命陳啟邁派兵出江夾擊並  
有桂明等不能得力准曾國藩單銜叅奏及惲光宸  
趙如勝之兵均歸曾國藩等調遣之諭原以皖鄂江  
西三省帶兵之員多有距本管督撫較遠而離曾國  
藩大軍轉近非事權歸一則呼應不靈儻隔絕推諉  
於軍情大有關係所有湖北臬司胡林翼所帶之勇  
副將王國才都司畢金科所帶之兵均著楊需飭令

星夜馳赴會國藩等軍營到營以後悉聽該侍郎等  
調遣其和春派出之已革道員何桂珍袁甲三派出  
之四品頂戴臧紆青等現在桐城一帶諒因英山失  
陷是以未能南出潛太著會國藩卽行飛飭催提併  
歸一軍如有將弁桀驁兵勇孱弱者卽認真簡汰不  
可稍存避嫌之見致一軍中強弱不齊轉費周折皖  
鄂毗連各屬楊需著卽由宿望潛太一路次第進攻

並防逆賊由瑞昌擾竄興國轉出曾國藩等大軍之後不得專駐楚境致成株守楊需帶兵出省後湖北省不免空虛著俟克復九江後卽飭胡林翼帶兵回楚以資防堵江西逆匪昨據陳啟邁奏已竄聚吳城明係我兵攻勦緊急該逆聞風內竄仍堅踞潯郡牽掣大兵陳啟邁所請酌調楚師之處能否分撥著曾國藩等妥籌兼顧江西兵力輒弱至此年餘以來所

謂訓練者安在。憚光宸係督辦大員，趙如勝亦曾膺專闕。若再不整頓全軍，迅將吳城逆匪擊退，或至省城復有震動，朕不能爲陳啟邁宥。尤不能爲憚光宸等曲從寬典也。

上諭內閣曰：此次水陸官軍續獲大捷，肅清潯郡江面。現在大軍扼守湖口內外要隘，九江逆匪首尾不能相顧，可期卽日掃除。曾國藩、塔齊布運籌決勝，勦力

同心麾下將士率皆轉戰無前爭先用命皆由曾國藩等調度有方覽奏之餘實堪嘉慰曾國藩著賞穿黃馬褂並發去狐氍黃馬褂一件白玉四喜搬指一箇白玉巴圖魯翎管一枝玉靶小刀一柄火鏟一把交曾國藩祇領又白玉四喜搬指一箇白玉巴圖魯翎管一枝玉靶小刀一柄火鏟一把交塔齊布祇領以示優獎守備朱南桂冒險衝陣連撲賊營著免補



守備以都司補用遊擊童添雲每戰摧鋒不避矢石  
著以參將升用其餘出力員弁兵勇卽著查明保奏

初四日戊戌和春福濟奏言湖北敗匪由太湖竄

至英山該處緊接楚北而英山爲霍六門戶必

須趕緊攻克以免蔓延臣等當卽飛飭該管六

安州及地方官相機勦辦該州茅念劬督同義  
勇迅卽起程沿途招集練丁赴西界嶺防守救

援英山由間道兼程而進英山縣知縣蘇秀槐  
稟報招集潰師整齊團練一面馳赴羅田縣商  
撥壯勇二千名星夜統帶回英並曉諭本地各  
約同聲響應者數千人於初十日乘賊猝不及  
防砍斃守門逆匪一擁進城槍礮齊施殺賊無  
算逃竄之賊經練勇截殺多名立將城池克復  
其隘口嶺等處均先期知會一體兜擒現在境

內全行肅清茅念劬稟稱賊擾太湖時候選知  
縣陳韶鳴等或力戰捐軀或守城殉難請

旨飭部從優議卹至英山縣知縣蘇秀槐甫經到任因

本城空虛被賊竄至旋卽請援鄰省剋期恢復  
應得處分可否免議責令實力防堵湖北羅田  
縣知縣彭仲芳前次賊匪竄至英山卽經派勇  
越境攻勦因未獲勝又復添撥勇壯奮力擊勦

俾城池得以立時克復洵屬不分畛域懇

恩賞加知州升銜以示鼓勵奏入

上諭內閣曰英山縣知縣蘇秀槐甫經到任因本城兵  
勇空虛被賊突竄旋卽克復城池尙知奮勉應得處  
分著加恩免議湖北羅田縣知縣彭仲芳派撥壯勇  
越境援勦洵屬得力著賞加知州銜賊擾太湖縣時  
候選知縣陳韶鳴等或力戰捐軀或守城殉難均著

交部從優議卹

同日

上諭內閣曰六安英霍之復藉資民衛之力居多所有六安州英山霍山兩縣應徵咸豐三四五等三年漕糧南米及屯折津貼錢糧概予豁免

初六日庚子勝保奏言上月十九日賊於西關受

地雷之創遂一味堅匿不出該逆雖思竄甚急

苦於合圍嚴密無隙可乘又因東關礮營正扼  
其衝不能出入二十二二十四等日兩次出撲  
均經官軍擊退二十九日臣親督兵勇攻其南  
門賊仍嚴守城上槍礮密如雨下兵勇勢難攻  
入所開地道四處東南係臣德勒克色楞督辦  
已挖至七十餘丈忽遇沙水難望有成西南本  
係善祿督辦善祿出缺後另派妥員督飭趕挖

亦已六七十丈尙無阻礙但距城較遠見功稍  
遲北面一路興工以來頗覺順利原計本月初  
閒卽可告成乃因開挖深遠氣亦漸閉燈火不  
燃夫役閒有悶絕在內者但其地距城已近興  
作尤須慎密若明開氣眼恐爲黠賊所覺反致  
誤事勢不得不設法暗開氣道惟有極力督飭  
晝夜興作無論何處先抵城根卽由何處安放

地雷現已豫挑奮勇兵丁密示機宜以便臨時親督一鼓而下奏入

上諭曰覽奏並無確實把握實深憤悶

同日托明阿陳金綬雷以誠奏言臣等於十一月二十二三等日親督滿漢官兵分東西兩岸進剿設計誘戰賊匪堅匿不出二十四日探得逆匪又糾鎮江逆黨二三千人夤夜過江潛踞



虹橋連紮兩寨二十五日臣陳金綬會同臣雷以誠督率晉康等帶領官兵由施家橋中路進攻將抵賊巢適逆匪築壘未固正在糾眾空濠竟敢大股出迎先放槍礮臣等督兵直前開放銅礮擡槍迎頭轟擊並先令穆克登額等帶隊伏於東南見臣等督兵接仗卽帶領吉林勁旅從左兜裏槍礮齊發漸至短兵相接鏖戰三時

集賢堂不問卷二百一十四  
三

之久逆匪猶復抵死抗拒 臣托明阿督同副都  
統富呢雅剛阿等帶領步隊官兵繞赴東岸接  
應維時慧成突從西路親率馬步各兵飛馳抄  
出直衝賊隊槍礮大震煙燄迷天逆賊驚出意  
外陣亂旗靡 臣等乘勢督兵撲壓賊匪登時紛  
潰我兵人人奮勇施放連環槍礮痛加勦戮逆  
賊棄寨狂奔 臣等督兵盡力追殺餘匪仍竄入

瓜州堅守不出當將賊寨兩座拆毀統計殲賊五六百名奪獲旗幟器械米糧板片無算臣等仍當竭力設法相機攻克瓜州斷不致稍涉鬆勁其餘受傷弁兵容俟查明辦理奏入

上諭曰此次獲勝尙屬得手惟逆情詭譎難保不潰而復聚總須慎重勦堵杜賊外援以期克復瓜州

初七日辛丑和春福濟袁甲三奏言十一月十三

日探得潛山賊隊二千餘人將至掛車河臣等  
酌留同知李安中等守營督防令臧紆青劉玉  
豹率領兵勇出隊迎擊遇賊於牛藍鋪兵勇爭  
先截殺殲斬百數十人追至龍鳳岡賊整隊復  
來臧紆青策騎突陣劉玉豹催督兵勇繼進歷  
兩時之久約斃賊三四百人追至陶沖驛賊勢  
潰散天已昏暮收隊暫駐次日又敗賊於小河

口鐵家山青草格等處共殲斃五百餘人臧紆  
青因聞安慶潛山之賊十七日麤集來援回營  
商議迎擊賊已突至西三里街臧紆青傳令出  
隊未至西街賊已迎撲臧紆青督勇開礮斃賊  
無算正追殺閒忽西門喊聲大作城內數百賊  
衝出夾擊南門外續到之賊勢如潮湧一齊放  
火與千總任魁武把總邵廷揚文生蔣懋勛同

時陣亡時參將劉玉豹正攻北門聞警馳至南門因賊繞至東門仍趕回截殺李安中等督兵接應槍礮齊施賊隨將城門緊閉外委李應祥中槍陣亡官兵收隊暫回呂亭驛紮營仍飭帶兵各官於三十里鋪及大小關等處緊防北路之賊再乘我後臣等查此次該文武等不避艱險力圖進取各員弁兵勇又皆人人用命於十

日之內斬關奪隘疾捲長驅殲斬不下五六千人實屬奮勇可嘉卒以孤軍無援被賊偵知虛實一擁而至該文武等督率兵勇猶復以寡敵衆殺斃逆賊酣戰數時之久始行撤隊所惜者帶勇之員猝然殉難銳氣未息稍挫以致垂得之城未能收復臣等以該處逼近賊氛又勇失統領人心不無渙散儻賊鋒猝至再有失挫則

軍氣愈餒難以復振是以飛飭該文武等移紮  
六安藉資休息仍一面整頓軍械籌運餉糈並  
探明楚師行抵何處賊勢何處緊急再圖相機  
進取昨淮河南撫臣英桂咨稱已奏派牛鑑統  
帶兵二千名進駐潁州並酌派員弁分扼正陽  
又另派陝甘營參將慶瑞等帶兵四百名進駐  
六安臣袁甲三已札飭前調道員張維翰仍駐



歸德搜勦土匪一面飛催牛鑑迅速前來分兵  
駐紮以防紛竄四品頂戴舉人臧紆青性情剛  
毅能得士心今以力戰捐軀尤堪憫惜可否

賞加三品銜從優議卹以褒忠蓋出自

聖主恩施其陣亡守備銜千總任魁武把總邵廷揚外  
委李應祥縣丞銜文生蔣懋勛應請

併飭部議卹陣亡兵勇查明咨部照例辦理奏八

命軍機大臣傳諭和春福濟袁甲三日桐城爲安慶  
廬舒往來要路我軍一旅深入先獲勝仗後因安慶  
潛山兩處援賊屬至城內之賊復分門出擾兵勇三  
面受敵以致臧紆青力屈身殉劉玉豹退駐六安垂  
得之城未能收復固屬可惜而軍威旣挫廬舒以南  
道路復梗於皖省大局甚有關繫和春等爲廬郡之  
賊所牽掣日久未能攻克復不能派兵援應袁甲三

坐守臨淮一籌莫展虛張聲勢名爲兼顧大局實則  
畏蒞自保思之實堪痛恨桐城北達舒城南距安慶  
東西接壤潛山廬江均屬不遠和春等大營兵勇較  
多著趕緊抽撥前往策應以贖前愆若不肯踰越廬  
舒一步致令賊氛逼近豫境或由他處北竄惟和春  
福濟袁甲三是問六安有知州茅念劬糾集鄉團著  
飭劉玉豹重整聲威探明楚軍再圖進取張維翰現

在歸德辦理勦匪事宜其前調河南防兵幫同崑玉  
防守正陽六安等處已據英桂奏統歸牛鑑管帶本  
日復有旨催令英桂酌派將弁帶兵由歸德永城一  
帶赴皖援應並著袁甲三飛札提催毋任遲誤安慶  
賊旣出巢機會可乘已諭令楊需帶兵進勦總之大  
軍爲賊牽掣若更旁竄蔓延該提督等自問當得何  
罪爾等亦須統籌全局勿但專顧一隅也

上又命軍機大臣傳諭楊需曰官軍攻勦桐城逆匪始獲勝仗旋因賊援麇至致有挫失已諭令和春等嚴防北竄分撥兵勇與袁甲三會合進勦惟此次敗衄係因安慶潛山等處賊匪分股往援是潛太一路賊已無多而安慶之賊分往桐城似有可乘之機現在曾國藩等水陸各軍相距尙遠著楊需督帶兵勇相機前進直擣安慶冀可斷賊援應克復城池該督務

當妥計速籌趨程前進不可稍存畛域之見致失機  
宜

上又命軍機大臣傳諭英桂曰官兵攻勦桐城逆匪轉  
戰數日以賊黨麕至致有挫失皖豫交界地方皆宜  
嚴加防範其與六安交界處所難保不乘機窺伺總  
兵邱聯恩駐兵固始原以策應六安卽可飭令該員  
帶兵進剿或另行酌撥官兵前往截擊以剿爲堵至

歸德一路尤關緊要張維翰帶兵駐紮該處現在皖  
省情形緊急著卽嚴飭該員確探前路消息相機進  
勦力遏賊匪北竄之路並著飭令牛鑑等帶兵迅速  
赴皖合力進攻該撫務當卽日帶兵出省扼要堵勦  
毋稍延誤

上諭內閣曰此次該文武員弁以寡擊衆斃賊甚多著  
袁甲三等激勵將弁迅將援應桐城之賊悉數殲除

母稍延誤四品頂戴舉人臧紆青每戰奮勇當先親  
冒矢石力竭捐軀殊堪憫惻著賞加三品銜交部從  
優議卹其陣亡之守備銜千總任魁武把總邵廷揚  
外委李應祥縣丞銜文生蔣懋勛均著交部從優議  
卹其餘陣亡兵勇著袁甲三等查明咨部照例議卹



欽定勦平粵匪方略卷一百十五 甲寅年

十二月初八日

壬寅

僧格林沁西凌阿奏言連鎮

賊匪於十一月二十四日被勦後益形窮蹙自二十九日至十二月初四等日時時出巢撲擾均被官兵隨時擊退斃賊多寡不等誤踏地雷轟斃者亦屬不少近日陸續投誠者共計二百餘名初三初四等日臣派員帶領六品頂戴施

紹恆並投誠人進濠誘賊調撥隊伍以備截殺  
施紹恆等直至賊壘叫罵該逆卽結隊出巢施  
紹恆等退至寬厰處開槍迎擊投誠之人無不  
奮勇刀矛並進斃賊數十餘名大股逆匪復出  
巢蠶擁而來施紹恆等一字排列擎槍以待時  
逆匪僞檢點黃姓突出陣前礮臺官兵卽對準  
開放大礮當將該逆擊斃賊衆敗退回巢查僞

檢點黃姓最爲狡悍此次被礮轟斃實屬大快  
人心林逆失此一人益形喪膽現在惟有兩廣  
人及沿途裹脅監犯共有千餘名與林瀛詳結  
成死黨牢不可破其兩湖等處之人屢次奔撲  
傷亡過多又因施紹恆等投出得有頂戴續有  
投出之人亦皆溫飽是以心存觀望乘閒俱要  
投出林逆亦深知人心不固恐生他變遇有投

出之人被該逆拏回不但不加殺害且自責無能以致衆人受困給予銀兩仍令投出該逆當此萬分窮蹙之時尙能如此狡猾實非尋常賊犯可比臣等業將林逆詭詐情形傳知各營官兵不得因賊勢已窮稍涉大意臣等一面激勵各營文武趕緊籌畫一有可乘之機無分晝夜督兵進攻庶期一鼓蕩平以贖曠日持久之咎

其駕馭投誠賊匪亦當仰遵

垂訓格外留心勿墮奸計現除施紹恆等留營隨時進  
隊外其甫經投出各犯擬札交附近連鎮之景  
州吳橋交河德州等處防堵各營分營管束以  
免疏虞奏入報

聞

同日楊需奏言臣前擬進駐黃梅廣濟之間旋

探賊匪竄踞英山太湖有自蘄水閒道上竄之  
信當飭羅田縣彭仲芳帶勇於鳳凰關嚴行防  
堵飭黃州府許賡藻帶勇駐防蘄州 臣親赴蘄  
水紮營以遏太湖英山之路復委保升知縣陳  
文灼馳赴羅田會同彭仲芳相機堵勦隨據彭  
仲芳稟稱親督紳士帶勇八千人在鳳凰關防  
堵初七日會同陳文灼復調勇萬二千人進赴

英山交界處所之樂利河迎擊獲勝殺賊九十  
餘名乘勝進剿直抵英山縣城初十日會同英  
山縣知縣蘇秀槐等與賊匪接仗城外鏖戰四  
時之久賊匪大敗殺賊二千餘名生擒八十七  
名該逆棄城由東路翻山而遁追逐十餘里入  
城搜捕餘匪會同蘇秀槐安撫地方籌畫戰守  
又據陳文灼稟稱羅田邊境各要隘均設有營

卡派勇守禦該縣向無城池近已添築圍牆開  
挖深濠布置甚爲嚴密紳士義勇均奮勇出力  
可以無虞探聞賊匪屯聚太湖日久終爲楚邊  
之患擬卽會同彭仲芳相機進剿等情臣一面  
飛咨安徽撫臣並札道員何桂珍派兵馳赴英  
山飭彭仲芳等帶勇會同進剿自黃梅收復後  
餘賊竄至宿松復糾約賊衆二萬餘上竄黃梅



縣屬之孔壘一帶經羅澤南帶勇進勦小池口  
之賊經會國藩水師連環疊攻將南北岸船隻  
盡行燒燬並毀北岸賊營三座搜殺小池口匪  
匪塔齊布羅澤南進抵小池口水師連日攻城  
毀龍開河木城一座前營進紮十八號地方臣  
揣度九江賊勢尙盛江西水陸兵勇又皆敗退  
不能相助恐塔齊布兵單且久戰易疲先於初

十日挑選精銳兵勇四千名派副將王國才統帶馳赴黃梅並咨會國藩塔齊布就近調遣後聞江西瑞昌竄匪已退南岸情形稍輕卽飭臬司胡林翼帶勇二千由瑞昌至南昌鋪攻九江之背以會塔齊布之師塔齊布已由小池口渡江紮於九江東門外與水師合力攻城水師前隊彭玉麟等已堵扼湖口賊船皆在口內擬先

攻九江後勦湖口十九日水師於扁擔峽燒賊  
船二十餘隻攻毀土城一座二十日賊船載柴  
草來燒我師戰船水師以礮擊沈之二十一日  
毀江岸土城三座殺賊二三百人臣卽日進駐  
廣濟派許賡藻嚴防蘄水蘄州員外郎銜李玉  
田進駐黃梅俟布置周妥卽由武穴乘舟至曾  
國藩水師營面商一切

楊需又奏言通計北岸兵勇除王國才統帶川  
練川勇等精銳四千名派令出境外其餘兵勇  
五千餘人似覺太單而急切又無兵可調查駐  
防安陸之陝甘官兵一千五百名現非緊要應  
卽調至省城將留防省城之四川漢屯官兵一  
千三百餘名及鄖鎮兵四百名調赴軍營並挑  
選麻城等處精悍可用之勇以集兵力臣揣度

賊情自滋事以來未有此番挫敗之甚正宜乘  
此殲除以期淨盡乃疊經痛勦尙敢捨死力爭  
殆亦知江南仰食上游非踞有湖廣難以自立  
其首逆如僞北王僞易王僞燕王僞丞相將軍  
等皆萃於兩皖一帶長髮老賊亦多上竄計江  
甯城內僅楊秀青一人勢必空虛應請

飭下向榮托明阿等乘勢急攻若能早破江甯鎮江則

其死黨必皆驚潰卽上游竄匪援救江甯楚師  
從而壓之亦可成建瓴破竹之勢奏入

上命軍機大臣傳諭楊霈曰據奏卽日進駐廣濟布置  
周妥由武穴至曾國藩水師營面商等語自係未接  
飭令赴皖諭旨此時潯郡江面據曾國藩等奏業已  
肅清塔齊布於小池口渡江紮營於九江東門外水  
師前隊亦堵扼湖口該督復派王國才帶兵四千馳

赴黃梅由曾國藩等調遣胡林翼帶兵二千由瑞昌  
至南昌鋪攻九江之背大兵雲集不難克復九江郡  
城惟安慶至桐城一帶賊匪任意往來毫無堵截和  
春等既未能分兵堵剿劉玉豹之兵又退駐六安此  
時北岸情形頗爲緊要所有九江湖口之賊卽責成  
曾國藩塔齊布等勦辦該督務當慎遵疊次諭旨迅  
速前進力破安慶等處賊巢並隨時知照和春福濟

秦定三等合力兜擊以期肅清皖境並著該督飭令胡林翼等嚴防潯江賊匪上竄楚境以杜紛擾

上又命軍機大臣傳諭托明阿向榮陳金綬雷以誠曰  
近日閱該大臣等奏報攻勦雖有獲勝於克復城池  
尙無把握現在曾國藩已駐軍九江城外與塔齊布  
會合扼守湖口內外要隘又據楊需奏賊中兇悍頭  
目皆在安徽江西等處長髮老賊亦多上竄江甯等



城勢必空虛請飭乘機攻勦等語所奏不爲無見該  
逆死黨半在楚皖今旣疊受懲創卽金陵等處賊匪  
亦必聞風破膽若托明阿向榮等能將金陵鎮江等  
城攻破並盡殲瓜州逆匪卽上游竄匪必思援救楚  
師從而壓之自成建瓴破竹之勢向榮前奏金陵賊  
黨仍踞上方橋營壘雖經兵勇襲破木柵未聞續獲  
勝仗余萬清在鎮江僅能攻毀該逆礮臺終未斷其

往來之路托明阿等攻勦瓜州亦未得手日復一日  
伊於胡底著該大臣等嚴飭水師攻毀賊匪鐵練埽  
除江上賊營水陸並進明攻暗襲將金陵鎮江瓜州  
等處次第克復如能先復一城則賊匪亦覺喪膽而  
曾國藩等督兵東下勦辦更易爲力托明阿等與向  
榮現已聲勢聯絡當不致互相觀望重負委任也

十五日己酉  
向榮奏言上方橋各賊壘逼近東南

時虞竄突十二月初一日派令各營隊伍分作  
兩翼直逼賊壘攻擊該逆伏於牆內施放槍礮  
我兵奮力攻撲乘風射放火箭燒彼哨樓適隔  
河炸彈亦連環打入賊情似頗驚慌各兵勇趁  
勢吶喊搶上槍礮交加擊倒壘內大黃旗一桿  
見該逆紛紛避匿牆根併力撐拒我兵躍過梅  
花坑數丈復有寬濠前阻逆營子彈密如雨下

集賢堂卷之三十三  
祇得撤隊回營初二日有賊七八百人由通濟  
門出至上方橋賊營經明安泰張國樑帶隊馳  
往截勦賊已奔竄入營開礮迎拒我兵直逼濠  
邊該逆死力堅拒日暮撤退至金陵下游烏龍  
山江面自臣札飭補用知府溫紹原辦理鎖練  
攔江已於十一月內安設停妥當將總兵陳世  
忠船八隻移泊鐵練之上與守備彭常宣之船

六隻分堵賊筭該逆現已不能下竄所有局艇  
與紅單拖曾各戰船皆在上游浦口昨經臣將  
總兵葉常春與副將李德麟所帶戰船互相調  
管卽飭會同吳全美速籌協力上攻並檄令王  
鵬年在船催督前進初二日巳刻北風甚大起  
碇揚帆折戟進攻該逆於兩岸礮隄礮臺連環  
轟拒我船奮勇直進開礮轟打擊斃賊匪甚多

駛過礮隄毀其礮臺數處而李德麟所帶新練  
快船與三板各船因風忽轉西不能前進新練  
各船因頂風未能得力祇得順流退下惟將賊  
之礮隄礮臺儘力轟擊一面折戩收回浦日至  
鎮江賊匪死守孤城防範頗密惟西面城腳土  
鬆經余萬清派參將周兆熊於前月二十八日  
夜閒挑選敢死之勇潛往流水洞之西城根開

挖地道僅成一穴不甚寬深而天色漸明祇得將火藥填入約有二百餘斤封閉洞門燃點引綫藥力有限僅將城腳輒石轟缺丈餘堞口未能坍卸該逆蟻聚發喊一面將滾木輒石打擲一面環放槍礮漸集漸多我兵無路登城乃會同各隊伏兵攻擊該逆堅守不出自卯至巳始行陸續撤回伏思江鎮負固難平我兵非不踴

躍效命奈賊情狡獪恃其城壁高堅悉力進攻  
徒有傷損祇有先清江面力爭上流庶可以斷  
賊援惟湖北師船抵九江後尙未通音信 臣遣  
去哨探亦未回營不勝盼切現嚴札吳全美李  
德麟遇順趕緊上駛並專弁赴船逐日守催務  
令剋日進攻 臣惟當殫竭心力迅掃妖氛以圖  
克復奏入報



聞

同日曾國藩塔齊布奏言逆黨被勦後僞丞相  
羅大綱奔踞湖口與九江踞賊遙相犄角牽掣  
我軍其小池口敗賊由彭澤渡江繞道赴潯增  
壘濬濠爲死守計湖口之賊自搶得江西戰船  
後聯檣結筏攔截內河東岸爲湖口縣城依踞  
獅子山連紮數營西岸爲梅家洲連紮二營木

城礮臺緊相依護水師左營彭玉麟嚮導營孫國昌等直紮湖口以內前營李孟羣後營蕭捷三中營及各營戰船分扼由湖出江之口扁擔峽梅家洲並北峯之八里江口一帶層層關鎖如犬牙之交錯自十五接仗後十六十七十八等日水師屢捷焚燬賊營數座二十日夜二更後風順水流忽見上游火船分十餘起縱火下

放礮船隨之兩岸出隊千餘人呼聲鼎沸兼放  
火箭火毬時彭玉麟孫國昌兩營之泊內河者  
早經準備屹然不動李孟羣等各駕三板迎擊  
秦國祿等繼進撥開火路將已燃之船用篙撐  
入中流向空溜下我戰船反迎火光而上向岸  
賊開礮放箭之處併力攢擊斃賊無數且攻且  
追至木簞之側忽又擁出火船數起火藥不時

三十一  
二十四

轟發我軍疾趨而進燒賊礮船十五六號賊黨紛紛墮水隨火船同付東流當賊放火燒舟時天陰月黑三更後月明如晝該逆油葦之船與我軍焚賊之船光照耀秋毫畢現賊黨計窮四更收隊我軍一無所傷陸路官軍自與水軍會於小池口十八日臣塔齊布從上游琵琶亭渡江次日移營南門外適胡林翼帶勇二千人

馳至分紮要隘二十一日羅澤南從下游水港  
渡江以期上下夾擊賊趁我軍半渡突出數千  
人分路來撲羅澤南督同李續賓蔣益澧等分  
途迎勦時賊衆我寡官軍殊死戰殪其前鋒賊  
遂敗退伏賊繼進移時又敗羅澤南從寶塔灣  
進追沿途趕殺百餘名偏溺老鶴塘內者約二  
百餘名追奔十里之遙其接渡之戰船亦遂泮

江而上向岸轟礮斃賊甚多軍功蔣昌梧係督  
臣楊需從漢川招撫者也自帶精勇百人在羅  
澤南隊前匹馬衝突追賊尤奮焚燬城外賊營  
二座至九華門外賊營一座尤爲堅固各勇大  
呼撲入拋擲火彈火毬斃賊無算逆黨奔竄聲  
若潰隄詎該逆暗埋地雷於營內延燒所及烈  
燄轟騰我軍之撲營者猝被燒傷十餘人敗賊

之奔入北門者城內賊目持刀督截賊黨衝出  
各勇見我軍前隊被燒而賊衆回頭來撲遂相  
率退奔羅澤南勒馬小駐揮令在後者無許續  
追在前者無許再退且駐且戰回至岳師門外  
羅澤南右臂及手指再受石傷力揮諸勇衝進  
殲賊十數名賊衆盡靡乃從容收隊紮營白水  
港二十七日水師各營會合出隊舟抵湖口城

邊見該逆於城下沙洲密排巨木橫繫箴纜數  
道聯絡於對岸賊營之下戰船數十隻排列纜  
邊開礮抵禦子如雨密各三板回舵收泊示之  
以弱別遣數舟衝入賊隊誘令出巢該逆開船  
迎敵各營遂揚帆疾進攢礮聚攻前三板衝過  
賊簿之前斫斷巨纜乘勢轟擊斃賊不少該逆  
力不能支紛紛梟水各船追逼直抵南岸洲尾



轟斃岸賊尤多賊遂棄營內奔惜陸兵未到未  
踏其營時上游忽有賊船救應依附營牆之下  
木簿之旁槍礮更密我軍從煙燄之中搶入迎  
擊斃賊約百餘名燒其戰船二隻賊始全數敗  
回傍晚收隊自此賊舟不敢拒敵夜夜以陸賊  
千餘大呼驚營我軍徹夜戒嚴不得安枕伏查  
官軍自大破田鎮之後私擬九江一郡指日可

破不料賊數日增尙能負固死守其堅悍兇頑  
實出意計之外連日陸軍攻城傷亡甚衆因攻  
具未備擬卽先勦湖口孤塘之賊翦其羽翼水  
軍在湖口與賊相持李孟羣之意欲令賊船放  
出大江下游免其內竄江西分我兵力彭玉麟  
之意以爲賊奪江西船礮縱之出江其禍愈烈  
必欲嚴扼此關聚而殲諸鄱湖之內俟陸軍到

時再行相機辦理此次水路兵勇冒險深入奮  
不顧身顛懇

天恩由臣等擇尤保敘以固士氣千總會獻成把總周  
福友外委羅嘉典追賊過猛力戰捐軀深堪憫  
惻應請

飭部從優議卹奏入

上命軍機大臣傳諭曾國藩塔齊布陳啟邁曰我軍自

肅清潯江進扼湖口以後滿擬九江郡城乘勝可克  
乃連日焚燬賊船踏破賊壘而該逆死黨仍負固拒  
守殊屬兇悍雖此股逆匪多有由楚敗竄之老賊盤  
踞其中亦由江西兵力輒弱未能兩路夾攻以致驟  
難克復塔齊布雖已渡江與曾國藩會合紮營城外  
胡林翼之勇亦已分布要隘而岸邊之逆船旣堅匿  
不出城中之逆衆亦設備甚嚴現在李孟羣欲放出

賊船免分兵力彭玉麟欲嚴扼關隘聚而殲旃惟陸軍尙未到齊攻具亦未齊備賊情變幻靡常著曾國藩塔齊布相機籌畫不可稍有孟浪致誤事機吳城賊未擊退該處距省甚近陳啟邁所派之惲光宸趙如勝等均係督勦之員何以自前月奏報籌辦會勦以後未據該撫續行入奏豈賊竄江境該臬司等竟敢置之度外專恃曾國藩等分兵應援耶著陳啟邁

一面嚴密設防一面飭令惲光宸等迅速將吳城賊  
匪擊退以便與曾國藩等軍併圖攻勦曾國藩等卽  
先勦湖口孤塘之賊翦其羽翼仍設法攻城以期收  
復此次冒險深入之員弁兵勇等准曾國藩塔齊布  
擇尤保奏所有陣亡之藍翎千總會獻成藍翎把總  
周福友藍翎外委羅嘉典均著交部從優議卹

十七日

辛亥

和春福濟奏言廬城逆匪屢被官軍

攻剿緊急負嵎甚固臣等現於東北及西南兩面築壘安置大礮對城轟擊並攻七里站賊營以冀漸就得手舒城之賊秦定三督率兵勇於二十三二十七等日分門攻撲該逆堅拒如故二十七日五鼓督兵潛伏而進搭橋過河拔去梅花樁計圖暗襲甫抵城下爲該逆所覺火鑪木石拋如驟雨連傷兵勇數人十二月初四日

官兵分攻各門北門六安門各出賊千餘人有  
黃衣騎馬賊十餘名在前遙擁而來當經鮑雲  
翥等分投迎擊槍礮之中夾以三百斤大礮立  
將黃衣執旗騎馬賊一名擊中倒地賊衆拌死  
抵拒官兵衝入賊隊痛加擊刺連拋火罐斃賊  
無算餘賊敗逃我軍追至城下收隊回營十一  
月十九日忠泰督兵進攻巢縣賊匪東門北門



各出賊千餘人接應兵勇奮力擊勦斃賊多名  
賊敗入城嗣西門外河內賊船突來數百人意  
欲抄襲我軍後路隨令協領富呢雅翰等帶領  
兵團攔腰截勦斃數十名該逆奔敗回船追  
殺落水死者甚衆二十九日復督官兵四面圍  
攻北門突出賊匪二千餘人經伊林布等直前  
迎擊斃賊四百餘名又編修李鴻章等帶領兵

勇進攻含山賊匪於十一月十八至十二月初  
五初六等日分途攻勦斃賊甚多現在百計誘  
敵該逆仍堅匿不出臣等仍飭各路趕緊圍勦  
以期掃蕩逆氛奏入

上諭曰三城未下日久遷延和春等擁兵攻勦廬州不  
能顧及他處自問所辦何事稍有天良亦知愧憤否  
福濟又奏言查已革江西巡撫張芾上年奉

旨革職該員服官於三江者凡七八年地方情形熟悉  
南昌被圍與江忠源等竭力守城卒能保護現  
在各省軍務惟皖省最爲喫重可否仰懇

天恩飭令已革巡撫張芾星馳來皖或赴沿江督率攻  
勦或赴徽甯辦理堵禦酌量緩急由臣臨時商  
辦以資熟手奏入

上諭內閣曰已革江西巡撫張芾著發往安徽軍營交

和春福濟差遣委用

十八日壬子陳啟邁奏言安慶逆匪分竄九江湖

口擾及吳城當飭五品頂戴吳錫光帶領兵勇  
由陸路前赴吳城勦洗十一月十五日馳抵吳  
城鎮時逆匪大隊下竄南康在鎮之賊無多一  
見官軍猝至不戰自遁其屯聚南康城邊湖岸  
者約有二千餘人又湖內停泊賊船一百餘號

吳錫光卽於十八日銜枚疾走七十餘里十九日行抵南康當派守備林保等帶領靖勇由南康西北鄉抄出賊後吳錫光督同軍功李玉興等帶領靖勇自郡城東門外進剿該逆列陣拒敵船上之賊亦開礮相助我軍奮勇直前接戰一時之久林保等突出其後該逆陣腳遂亂兵勇乘勢衝擊斃匪一百餘人吳錫光手刃黃衣

賊目一名武生吳邦柱殺斃僞檢點何潮元一  
名軍功周定邦等殺斃僞軍師宋春林一名餘  
匪沿途逃竄逆艇亦駛往下游我軍追逐五里  
趕偏落河淹斃者約計二百餘人生擒九名奪  
獲賊船六隻旗幟器械八十餘件未刻收隊回  
營時省標弁兵及寶勇先後馳至旋據探報謝  
師塘朱天湖二處復有大夥逆衆約三千餘人

分股由陸路蠶擁而來勦退匪船同時回撲吳  
錫光當將兵勇分爲五隊以一隊迎敵湖內之  
賊以四隊縱擊陸路匪徒鏖戰逾時殺賊三百  
餘人割取首級六十餘顆匪勢不支大敗下竄  
兵勇追殺十餘里賊衆沿途投水淹斃約計五  
百餘人適水師快船趕至協同奪獲船隻並焚  
燬賊船甚多餘匪逃回湖口查江面逆船現均

聚集湖口以內出江之路已爲楚省舟師攔截  
誠恐被勦窮蹙鋌而走險難保不復竄吳城或  
旁擾饒郡現飭吳錫光駐紮南康扼要守禦以  
堵爲勦仍察看情形與江外水軍相機夾擊並  
飛札饒州府營調集練勇實力守禦一面抽派  
兵勇七百名令已革貴州提督佈克慎等帶赴  
九江助攻潯郡以期速殄寇氛肅清邊境至吳



錫光前勦饒郡今攻南康均能所向克捷可否  
開復都司原官

賞換花翎之處出自逾格

天恩其隨同出力之武生吳邦柱軍功周定邦李玉興  
石玉武得勝吳天保黃金考張桂林均請

賞戴藍翎以外委補用此外出力員弁兵勇容俟查明  
另行請獎奏入

上命軍機大臣傳諭陳啟邁曰此次賊匪夤夜退竄並非大受懲創卽官軍追至南康斬獲亦未甚多該撫慮其去而復來欲嚴扼南康防其回竄吳城饒郡之路固爲腹地緊要起見但賊踞九江湖口被我軍水陸截堵豈肯甘心就戮楚省兵勇轉戰已久曾國藩等進攻潯郡似尙未能卽克該撫派往協勦之佈克慎等兵勇不過七百餘人能否自成一隊接應楚軍

吳錫光旣能奮勇出力豈可轉使株守南康不令出湖夾擊著陳啟邁卽行體察情形妥籌迎勦仍一面嚴守省城要隘防賊回竄不得以本省地方專委楚軍也

上諭內閣曰此股逆匪由安慶擾及吳城意欲蔓延腹地經官軍痛加勦洗喪膽奔逃不難撲滅著陳啟邁飭令吳錫光等會同湖南水陸各軍迅速夾攻盡殲

醜類吳錫光星夜進兵殺賊奮勇著開復都司原官  
並賞戴花翎武生吳邦柱等均著以外委補用並賞  
戴藍翎其餘出力員弁兵勇著陳啟邁擇尤保奏

欽定剿平粵匪方略卷一百十六 甲寅年

十二月二十一日 乙卯 英桂奏言攻剿桐城官兵

既有挫失深慮逆裔鷓鴣張意圖北竄皖豫交界  
更須加意嚴防楚北敗匪竄入皖境太湖潛山  
英山相繼失守商城距英山僅隔霍山一縣霍  
山並無兵勇防守商城與霍山交界處所山徑  
紛歧甚爲可慮鎮 臣邱聯恩現已帶兵前往商

城而固始緊與六安霍邱毗連亦甚喫重若令  
該鎮移師六安不特光屬空虛難期兼顧且光  
州並所屬各縣擒匪未靖勦捕喫緊該鎮勢難  
遠離查固始縣在籍辦團之前任江甯布政使  
王庭蘭老成明練值此軍務需人臣擬令其進  
駐六安相機堵勦合無仰懇

天恩飭令王庭蘭辦理六安堵勦事宜由臣咨照鎮臣

等進攻桐城原以接應楚師此時劉玉豹雖退守六安一俟添有勁旅仍應迅速進剿英桂現派王庭蘭前往擬令添募壯勇是否能剋日會齊著英桂卽飭令王庭蘭速行召募統帶前進不得稍事耽延至豫省各路官兵有無可以分撥交王庭蘭帶往之處仍著英桂通盤籌畫該撫卽著前赴陳州居中調度至歸德等處雖派令張維翰等分投駐紮英桂仍應處

處兼顧何路有警卽往何路策應斷不准株守一隅  
致滋貽誤

二十四日戊午和春福濟袁甲三奏言臣等查九

江一經克復則楚師赴皖甚速且水陸齊下必  
須厚集兵力操縱自如方可一氣呵成臣袁甲  
三查已革安徽道員何桂珍先因勦辦霍山捻  
匪乘勝追至六安所屬麻埠一帶勦撫兼施地



方漸就安靜嗣聞英山有警該革員卽回軍由  
霍山中界嶺赴援其時英山逆匪已被該縣蘇  
秀槐等督率練勇擊退該革員卽進駐該縣督  
辦撫綏防守各事宜並招集鄉勇爲進規太湖  
之計又參將劉玉豹先同臧紆青統軍進勦圍  
攻桐城嗣臧紆青陣歿衆勇渙散臣等札飭暫  
駐六安藉資休息所有臧紆青原帶之勇經臣

袁甲三分起調至臨淮逐加挑選仍陸續發往  
六安駐紮俟曾國藩抵皖卽分別飛飭何桂珍  
等駐英山劉玉豹等由六安進駐霍山一面激  
勵士卒相機進取一面遣探楚師消息應如何  
協勦悉聽曾國藩調遣俾事權歸一以期迅奏  
膚公奏入

上命軍機大臣傳諭和春福濟袁甲三曰廬舒各城尙

未克復宿望太潛等縣均爲賊踞江北情形甚屬喫  
重袁甲三等現派何桂珍進駐英山招集鄉勇爲進  
勦太湖之計劉玉豹等由六安進駐霍山一俟楚師  
抵皖卽歸曾國藩調遣自應如此辦理惟該員等所  
帶兵勇是否足資協勦臧紆青原帶各勇雖經袁甲  
三挑選能否得力和春等仍當隨時察看就近抽撥  
兵勇相機策應一面嚴飭該員等實力防勦探明楚

師以圖會合夾擊前據英桂奏派王庭蘭進駐六安  
此項官兵並著袁甲三飛速催提毋任延宕和春等  
攻勦廬州秦定三圍攻舒城均係坐擁重兵日久未  
能克復儻再事遷延恐上游潰匪水陸屬至廬城賊  
匪勢更鴟張和春等自問當得何罪耶

袁甲三又奏言查江北設防扼要首在臨淮次  
則正陽至安慶府屬雖同在江北而遠處西南

瀕臨大江旁通江西湖北距臨淮正陽六七百  
里距山東河南不下千餘里中間東北則隔廬  
州西北則隔六安節節阻隘所以安慶賊股從  
無北竄鳳潁之事惟桐城旣未收復則廬舒之  
南路未斷卽廬舒之賊援未絕議勦議防處處  
喫緊查河南防兵進駐皖省藩籬固則堂奧自  
安撫臣英桂尙無到防確信昨接牛鑑來函已

於本月十五日前後起程赴潁並稱撫臣英桂

本擬出防陳州旋因輝縣等處刁民聚衆不克

分身是以另行委員帶兵千名駐紮陳州以爲

潁州後路臣查楚境業經肅清潁州距賊尙遠

並非十分喫重與其遠駐潁州不如近扼正陽

且固正陽卽以固潁州至陳州則距賊更遠似

不若將駐陳之兵改駐皖境牛鑑卽駐正陽統

領一切較爲得力

袁甲三又奏言烏江一帶逆壘經我軍兩次攻  
毀後至今未敢再行紮營惟其地上接梁山山下  
通江浦內達和含難保逆賊不復圖聯絡壘據  
探稟時有賊船至彼停泊旋復開去近復於原  
壘處所用蘆葦編牆中堆茅草並多空濠溝以  
浮土遮蓋中實火藥逆情叵測明係欲誘我軍

當出疑兵數百人輪至該處巡哨示以不測該  
逆亦不敢登陸迎敵並密派兵勇於和州烏衣  
偏僻小路拏獲奸細僞司馬譚學松武殿元僞  
旅帥范政涓僞百長梅應標並究出僞百長李  
鈞業經潛到烏衣卽時拏獲該犯等同供賊意  
欲由滁州來安抄襲六合後路等情雖犯供未  
必盡屬可信而賊情詭譎防範萬難稍疏又據



江浦六合等縣稟稱該逆復於九泐洲搭望樓  
蓆棚徧插旗幟江灘亦搭望樓支架帳房外泊  
礮船百餘隻並有木簞一架緊靠鐵練似欲復  
踞洲地紮營爲抗拒師船之計又將江南上河  
賊營移於鳳林洲頭臣查官渡烏衣兩處皆屬  
要地而烏衣尤爲總扼關隘如規取和含則須  
東顧陸路如緊防江六又難進徧烏江且兵力

聞

實形單薄臣等惟有嚴飭分探賊蹤隨時斟酌  
辦理總俟九浹洲一路賊練翦除則官渡烏衣  
兩軍方可合力進取不至有誤事機奏入均報

二十六日庚申曾國藩塔齊布奏言潯城北枕大

江東南多山為姑塘八城要路臣塔齊布率各  
營扼駐其上該逆亦嚴防東南瀕水之處率將

各路挖斷其西門一路築有大營一座木城數丈列礮三層倚龍開河以自固上月二十六至本月初一等日陸軍分門攻勦不能得手兵勇傷亡甚多參將童添雲夙稱驍勇是役中礮殞命臣等以窮寇死守我軍攻具未備不若舍堅而攻瑕因商派胡林翼羅澤南等先攻湖口對岸梅家洲賊營而調王國才及參將恆泰等由

小池口渡江與南軍合營初五日胡林翼羅澤南等拔營前進王國才移紮臣塔齊布大營之旁恆泰等分帶兵勇七百人尙在官牌峽江邊逆黨探知突出邀截經恆泰奮力擊退遂移營城之東南與臣塔齊布等營聯絡初七日逆黨四五百人分股出撲王國才營經王國才等擊退一股而賊來愈衆勢將不支臣塔齊布整隊

往援陣斬百名賊遂奔竄東門入城閉門堅拒  
其自西城出者另有千餘賊攻撲居隆阿江西  
營盤 臣塔齊布飛飭副將周鳳山等帶勇往援  
一律擊退胡林翼羅澤南之軍於初六日巳刻  
行抵廬山距梅家洲八里許梅家洲之尾爲攔  
湖嘴江省內河出口之西岸也僞丞相羅大綱  
踞焉湖口縣在其東岸僞易王石達開踞焉鄱

湖之賊於口內紮大木箒一座東岸厚築土城  
多安礮位西岸立木城二座高與城等防守甚  
嚴我盪山之軍駐營甫定派隊前進胡林翼帶  
勇由洲東入羅澤南帶勇由中路入李續賓張  
丞實同蔣益澧等帶勇從洲西入賊衆負固不  
出憑牆施放槍礮我兵伏地以進逼近壘前去  
其竹木以水潑其地雷哨長葉楚南等從竹箒

木椿中踰溝而前直入賊營以路窄人少葉楚南等俱爲賊戕初七日梅家洲七八千人分三路進以攻我營之左腋而大姑塘之賊又以四千餘人撲我盩山大營之背胡林翼羅澤南等分營堵禦斃賊三百餘名賊乃大潰追奔十餘里沿途殺賊數百名至小湖而止水師之在湖口者聞陸軍一至卽出隊從外江進口攢礮環

攻賊箠奮力進擊將其鐵鎖箠纜立時斫斷哨  
官劉國斌一礮轟中箠上藥箱巨煙突發響若  
山頽箠已燃燒過半而未燒之一面賊仍開礮  
不絕我軍分一枝抄出立燒大戰船六隻民船  
二十餘隻賊之登岸者被李孟羣親軍截殺十  
餘名羅澤南之陸勇擊殺亦衆且放火助燒箠  
船水陸相輔是日血戰四時之久燒斃溺斃殲



斃之賊四百餘名奪獲大礮十餘位生擒一百  
十三名內有僞將軍梁國浚等皆係箚上賊目  
兇悍聚殲全軍爲之一快此次陸軍攻城攻壘  
水師攻箚攻卡冒險摧堅氣不稍餒守備劉國  
斌攻勦田鎮首先衝開鐵鎖此次焚箚又係首  
先衝入身受子傷守備孫昌國隨同彭玉麟屢  
次進攻身先士卒劉國斌孫昌國均請以都司

卽補並

賞換花翎其餘出力將弁兵勇籲懇

天恩容臣等彙案保獎以固士心參將童添雲請

飭部照參將陣亡例從優議卹把總葉楚南外委楊玉

芳六品軍功黃韻南武生陳烈姜凌浩仰懇

天恩分別議卹以昭激勸

同日楊霈奏言九江賊匪經陸路官兵疊次攻

城死拒不出湖口水師李孟羣彭玉麟等亦疊  
次進攻衝入賊船隊內轟斃水路賊匪無數燒  
賊船數隻塔齊布胡林翼燬西門外土城一座  
殺賊數百人羅澤南胡林翼移營湖口勦梅家  
洲屯聚之賊王國才等分路迎擊各獲大勝據  
生擒賊匪供稱城內糧食將盡賊衆均思逃散  
諒九江不日可下惟湖口水陸之賊旣爲戰船

所阻不得出江九江城內之賊又阻大江難保  
不內竄南康瑞昌等處已飛咨江西撫臣嚴堵  
並飭胡林翼就近堵截臣到廣濟後探聞安慶  
望江諸賊皆聚於宿松分股竄擾黃梅當派參  
將劉富成等各帶兵勇馳赴黃梅堵剿初三日  
分路進攻直抵城下縱火焚燒城門城樓賊於  
東西兩門突出轉戰互有損傷初四初五等日

疊次進攻賊閉門不出十一日夜賊匪攻撲劉  
富成營盤卽督兵迎敵賊復抄襲後路拋擲火  
彈焚燒營盤官兵盡力抵禦賊始敗退追逐十  
餘里劉富成營盤爲賊所燒退至石龍鋪駐紮  
該參將疏於防範應請摘去頂戴以示懲儆現  
在所調川兵及鄖陽兵尙未到營兵力甚單 臣  
以九江得失爲吳楚安危所繫當全力拔之故

盡揀精銳四千付王國才並飭胡林翼帶勇二千，前往協助乃相持十餘日尙未能下而宿松之賊遂乘虛復竄黃梅安徽已革道員何桂珍經臣檄飭由英山進剿太湖並飭羅田縣彭仲芳帶勇援助於初八日會合起程已抵太湖之野雞河地方必攻克太湖宿松方能與南北兩軍相併以目前情形而論必俟攻克九江察看

賊勢竄聚何方再與曾國藩塔齊布等熟商辦理

楊需又奏言探聞安慶之賊雖分竄九江湖口而守禦尙固北倚桐城之援東達江南之路非有數萬重兵水陸並攻難期得手現在賊之大股聚於九江湖口聞湖口之賊較九江尤多九江城內糧食將盡陸路兵勇連營二十餘座隔

絕糧道斷其後援勢難久踞必將窮極思竄湖  
口之賊亦必竭力來援勝負尙難豫卜現趕緊  
添兵集餉一面進攻黃梅規取太湖宿松以清  
邊境而爲進步俟九江湖口攻下後水陸會合  
馳抵安慶一面截斷舒桐之路秦定三等便可  
乘勢急攻則安慶廬州俱成孤立不難一鼓而  
下若以輕兵間道襲取孤軍深入無援南師未



能驟合三面受敵進退兩難且出省攻勦與本省情形不同本省尙有紳民團練可以隨時協助出省則呼應不靈宿太潛望一帶人心反側更在楚北之下必須厚集兵力方可鼓行而東目前楚兵聲勢方揚較西皖稍有起色更宜益加謹慎未可令有挫衄臣首發會同東下之議原以兩省之兵必須通力合作方可望戰勝攻

皇朝通志卷一百一十二  
取斷不敢稍存畛域之見惟兵事移步換形又  
不能不於奮勵之中稍事持重均奏入

上命軍機大臣傳諭楊需曾國藩塔齊布曰逆賊以全  
力占踞九江湖口而宿松之賊復分股竄擾黃梅牽  
掣北岸之師若非迅復九江則水陸各軍不能會合  
非盡燬湖口賊船則九江不能卽克覽曾國藩等所  
奏情形雖屢獲勝仗攻克城池尙無把握楊需旣未

能遽攻安慶而赴援黃梅之劉富成等又復不能得力北弱於南殊爲可慮楊需所稱必須九江掃蕩後方能確定行止所見甚是湖內賊船自以不放出口全數聚殲爲上策但恐江西力不能支一經內竄又分楚軍之力究應如何勦辦方免後患想曾國藩等已能籌畫萬全楊需現駐廣濟卽著會合皖兵先取黃梅進取太湖宿松爲節節打通之計湖北本境仍

應兼顧小池口及田家鎮等處要隘有無防兵能否  
與南岸聯絡尤宜妥籌布置

上諭內閣曰逆賊占踞九江等處意欲牽掣我師東下  
經曾國藩等派兵分剿疊獲勝仗自不難悉數殲除  
所有尤爲出力之守備劉國斌孫昌國均著以都司  
卽補並賞換花翎其餘出力員弁兵勇著曾國藩等  
據實保奏陣亡之參將童添雲著照參將陣亡例從

優議卹把總葉楚南著照守備例議卹外委楊玉芳  
六品軍功黃韻南武生陳烈姜凌浩均著照把總例

議卹

楊需又奏言臣聞水雷最爲利器若用之江湖  
擊賊船筏必更迅利思欲倣造而難得其人及  
來楚北詢據候補知府張曜孫知該員得置造  
之法會捐資覓匠自行教導倣造數月而成上

年  
前  
督  
臣  
吳  
文  
鎔  
勸  
捐  
製  
造  
已  
成  
三  
十  
具  
因  
行  
文  
廣  
東  
選  
募  
水  
勇  
未  
至  
適  
賊  
匪  
上  
竄  
未  
克  
施  
用  
尙  
收  
護  
未  
失  
查  
此  
器  
每  
具  
食  
藥  
百  
二  
十  
斤  
中  
有  
機  
關  
能  
水  
中  
自  
行  
發  
火  
用  
時  
令  
水  
勇  
潛  
行  
送  
入  
水  
中  
水  
火  
相  
激  
猛  
烈  
非  
常  
一  
具  
可  
燬  
多  
船  
若  
大  
筏  
大  
船  
浮  
橋  
等  
火  
攻  
所  
不  
能  
克  
者  
用  
此  
無  
堅  
不  
破  
可  
省  
兵  
勇  
之  
力  
紅  
單  
船  
明  
擊  
於  
上  
水  
雷  
暗  
擊

於下江面必可肅清惟楚北水勇技藝尙不甚  
精廣東香山澳門一帶有精於水性能潛行水  
中百里潛伏水中三日夜者現咨廣東選募前  
來俟到楚後當送交曾國藩水師並爲楚北防  
江之用奏入

上命軍機大臣傳諭葉名琛柏貴曰施用水雷擊賊船  
筏頗爲利器廣東香山澳門一帶有精於水性者著

葉名琛等速行選募剋日委員管帶赴楚交會國藩  
等軍營應用

二十七日辛酉和春福濟奏言據李鴻章等稟稱

十二月初九十二等日李鴻章等督勇進攻含  
山殺賊六七百人割取首級數十顆奪獲器械  
無數賊情窮蹙中夜驚惶十四日復遴派各營  
奮勇三百餘人赴城下周圍埋伏吶喊放槍但



聞合城人聲鼎沸復令知縣孔繼黃等密約該  
縣被脅民人乘我軍夜攻相機內應十五日出  
隊附城誘敵該逆堅伏不出是夜三鼓密派八  
成隊伍攜帶攻具梯繩直至城下李鴻章率同  
楊鼎奎帶領壽勇潛伏城南並飭葉春培等帶  
勇直攻西門扎隆武督同俞應彪等暗攻東門  
輯順督帶常壽等馬步隊在西北門往來策應

巢勇先至西門上緊攻打城上賊匪槍礮迎拒  
城內火藥忽發延燒民房賊隊自相驚亂俞應  
彪等乘勢束草填濠拔椿豎梯常壽等復率馬  
隊鳥槍從旁照護兵勇俱從僻處攀登舉火爲  
號一擁而進四面兜殺該逆見勢不支由南門  
奪路竄出談家寶扼要設伏截殺賊匪二百餘  
人登城兵勇奮力追剿均由南門趕出知縣孔

繼黃亦率巡檢方聯泰等帶領練丁合力協剿  
共殺斃賊匪一千餘人據生擒賊目供稱僞總  
制羅繡新業在擊斃之中該逆係廣西起事之  
賊逆首就戮尤快人心所有員弁兵勇力戰十  
數仗不及五旬攻克堅城均屬著有微勞容  
等擇尤保奏懇

恩優獎以昭激勸逆情狡譎靡常難保不再圖窺伺已

令李鴻章等將原帶之兵駐守該縣一面乘機會合忠泰等助剿巢縣以期得手奏入

上諭內閣曰含山賊匪經編修李鴻章等督勇進攻知縣孔繼黃等合力協剿共斃賊千餘人卽將含山縣城收復所有此次出力員弁兵勇著和春福濟擇尤保奏候朕施恩

和春福濟又奏言廬州逆匪節經痛剿拒守益

堅十二月十四日臣等督兵分攻各門並攻七里站賊營該逆堅不出巢我軍將欲收隊南門突出賊千餘人意在由後抄襲卽令吉順等分途迎擊立斃多名並擊死黃衣賊目二名餘賊敗退其七里站賊營經常清等搶至濠邊該逆堅伏巢內未能攻入二十日臣等督兵分路攻打賊壘各出千餘人常清爭先迎勦該逆敗退

官軍追殺斃賊無算並擊倒黃巾紅衣騎馬賊  
二名賊勢潰敗適得勝門出賊八九百人前來  
接應江忠濬等左右夾擊斃賊數十名砍倒黃  
衣賊一名餘賊敗退入城又准秦定三函稱十  
二月十二日督率兵練圍攻舒城斃賊多名並  
擊斃黃衣賊二名十六日南門六安門各出賊  
數百名兵勇分路攻擊斃賊數十人該逆敗退

入城奏入報

聞

二十八日壬戌托明阿陳金綬雷以誠奏言臣等

自攻破虹橋賊營連日乘勝進攻瓜州該逆固

守不出官兵因於東西兩岸日間列隊進攻夜

間潛往拋射火彈火箭飛入賊營使之晝夜驚

慌以便乘機趕緊攻克連日據武慶等稟報該

逆自洲地賊營被毀後集船安礮紮成水營守  
護攔江鐵練十一月十七日該逆進至洲地懸  
插旗幟欲再築營經馬步官兵兩翼齊張奮力  
擊退該逆狂奔回船我兵偪至江邊擊斃賊匪  
多名擠溺者不計其數二十八日該逆復率衆  
進撲又被我師擊斬多名追至江干仍爲大礮  
所阻據向榮函稱吳全美等督帶各幫水師兩



次進勦雖賊練未斷業已擊沈賊船多隻斃賊  
無算聲威益壯遇風卽可進攻 臣等疊飭武慶  
等屆時必須努力協勦以冀疏通江路斷絕賊  
援惟連日西北風多誠恐賊簿乘風下駛 臣等  
復飭各水師時刻巡防相機堵勦本月十六日  
夜巡船瞭見賊船數十隻擁木簿三座順流直  
下已過金山經總兵孫雲鴻等飭管帶快船之

遊擊張夢熊等趕緊迎勦並令各艇師嚴整以  
待快船至八號口以上適賊箠賊船順風衝至  
我兵奮勇迎擊賊衆抵死抗拒並分駛小船十  
餘隻從旁馳突抄我軍之後我師槍礮齊施愈  
戰愈勇登時擊沈賊船二隻賊衆紛紛落水餘  
船全行驚潰守備鞠耀乾等乘勢偪攻兵丁任  
肇修等躍上木箠立將賊箠三座全行奪獲並

奪得器械旗幟無數十八日孫雲鴻等聞南岸  
鎮江官兵出隊攻東南兩門是日風色頗利因  
卽親督艇師並飭張夢熊等選帶礮船進向鎮  
江北門轟擊南北夾攻以牽賊勢艇師自北固  
山至金山江面游駛往來連環轟擊見有黃衣  
賊目多人從小牖口賊樓上搖旗開礮我師對  
準疊開巨礮立將賊礮隄轟塌其搖旗賊目連

望樓一併轟倒至未刻風息始行撤隊臣隨飭  
該將弁趁此聲威亟圖進剿一面督飭陸路兵  
勇迅圖克復瓜州奏入

上命軍機大臣傳諭托明阿陳金綬雷以誠曰近日瓜  
州鎮江等處沿江勦賊雖略有殲擒而南北岸匪蹤  
尙復時來竄撲上下游賊船亦未斷絕往來江面豈  
能得手吳全美等不能迅將攔江鐵練燒燬致該逆

又安列礮位紮成水營若再令占踞洲地浦口一帶  
堵剿更難武慶等連次接仗雖經奪獲賊簿擊沈賊  
船不過小勝豈能遽慰朕懷著嚴飭武慶與吳全美  
等協同攻剿勿再遷延貽誤至托明阿等進攻瓜州  
僅能拋放火器使賊驚慌卽鎮江南北夾攻轟塌賊  
隄賊樓總未直偪城門擣其巢穴著托明阿等督率  
陸路兵勇剋期收復瓜州一面飭武慶等實力剿除

該逆水營方爲勝算

二十九日癸亥僧格林沁西凌阿奏言本月初十

日丑刻連鎮逆匪大股向協領奎星保營牆奔撲勢極兇猛該協領督飭官兵開放槍礮侍郎瑞麟等派兵協同攻擊各營齊開大礮當將該逆擊退現在投誠人共二千餘名業將隨同打仗出力者分別獎賞該勇等無不急思立功臣

知賊內有湖北人詹啟綸一名人極強悍現已  
投出臣責其不遵示早降鞭責一百令其趕緊  
立功贖罪再結以恩信必能得其死力二十二  
日臣等派委文武督帶投誠勇目施紹恆等鼓  
舞投誠各勇分路攻勦與慶祺營勇目王有明  
等槍入木城痛加殄洗卽將賊壘焚燬維時西  
連鎮賊壘經甯宗揚等攻其北面施紹恆等攻

其西面逆匪出巢抵敵該勇等奮勇向前短兵  
相接斬擒無算割取耳級頭顱奪獲銅礮擡槍  
鳥槍刀矛旗幟甚多被焚逆匪不知凡幾林瀾  
詳在東連鎮潛匿死守未敢救援二十四日賊  
匪撲營當經我兵擊退是夜大股復向瑞昌營  
牆奔撲我兵俟該逆逼近開放大礮副都統綿  
洵令濠內外義勇抄出賊後該逆力不能支始



行敗退生擒賊匪三名割取首級七顆奪獲長  
梯八架刀矛旗幟等件甚多二十六日臣等飭  
派兵勇兩路進攻並豫傳嚴令若不攻破賊巢  
不准撤隊臣西凌阿帶領馬隊各處指揮策應  
侍郎瑞麟等督帶馬步各隊以壯聲威慶祺營  
義勇一千餘名進攻東連鎮因該處牆垣堅厚  
防守極嚴未能攻克員外郎瑞禧等督帶義勇

進攻西連鎮直抵賊壘爭先拖拉樹柵一擁而  
進一面劈開柵門一面拋擲噴筒火彈登時四  
面火起義勇趁勢由北面殺進賊巢該逆猝不  
及防紛紛倒地焚燒連鎮街衢賊屍枕藉生擒  
賊匪十餘名奪獲大小黃旗槍礮刀矛等物多  
件義勇由北而南焚燒賊營三座林鳳詳恐河  
西一帶俱爲兵勇攻破卽將河東槍礮運過河

西林逆帶領強悍賊二千餘名踞住南面賊營死力抗拒維時已交申刻東北風大作兵勇攻戰六時之久俱已疲乏卽撤隊回營現在西連鎮僅贖竈戶陳莊及西面一隅之地雖有死黨亦難久踞一有可乘機會卽當擣穴拴渠埽除羣醜鑲黃旗護軍參領松林中槍陣亡深堪憫惻應請照例

賜卹以慰忠魂奏入

上命軍機大臣傳諭僧格林沁西凌阿曰據奏焚燬西  
連鎮賊巢逆勢益形窮蹙此次進攻情形尙爲得手  
西面賊營祇存一座想不日卽可掃蕩我兵全占河  
西地面以全力併注河東辦理較易爲力林逆旣將  
東面槍礮移置河西則東連鎮賊巢愈形空虛我兵  
若能分路齊攻使該逆彼此不能相顧尤爲妥善各

營官兵站牆巡濠固爲以逸待勞當此事機順利人心鼓舞之時亟應飭令疊戰環攻速行進擊不可專恃投誠人等之力該大臣等務卽督飭帶兵各員乘勝進勦剋日殄除以副朕望

上諭內閣曰連鎮賊匪被勦窮蹙時思竄逸僧格林沁等派令各營兵勇分路進攻痛加勦洗賊勢益形窮蹙僧格林沁等務當無分晝夜悉力攻勦以期迅速

戴事所有此次陣亡之護軍參領松林著交部照例

議卹

欽定剿平粵匪方略卷一百十七 乙卯年

五年正月初六日庚午向榮奏言 臣昨聞由楚敗

竄之賊竊踞池州大通一帶其餘蕪湖金柱關  
及兩梁山嘯聚尤多徽甯情形喫重當移檄革  
員鄧紹良挑選兵勇二千名出紮黃池以遏蕪  
湖內犯之路嗣據鄧紹良呈稱本月十八日帶  
勇出紮黃池二十二日卯刻賊衆萬餘分三隊

蠻擁前來鄧紹良以賊衆我寡飭各營鎮靜以待並於山溝土坎埋伏槍礮高阜處多設旗幟以作疑兵該逆圍攻台勇營盤經守備周萬遠等率勇開槍礮轟擊斃賊百餘名守備劉嘉祥千總昌達等率兵兩路抄殺斃黃衣賊首二人賊黨約五十餘人鏖戰四時之久經鄧紹良飭令兵勇詐退誘至伏所槍礮齊施該逆紛紛



倒地鄧紹良揮兵從樹林內殺出該逆不知我  
兵多寡始各驚潰回奔我兵從後掩殺追趕二  
十餘里沿途斃賊四五百人撲河溺斃者無數  
等情查蕪湖賊衆以甯國兵勇出紮黃池竟敢  
悉衆衝撲幸我兵踴躍用命以少擊多大獲全  
勝然上游賊船尙多難保不復圖內犯一面諄  
飭鄧紹良加意嚴防臣仍隨時相機策應並催

師船進扼上游以期保衛東南全局奏入報

同日勝保德勒克色楞崇恩奏言旬日以來該  
逆屢次撲濠俱經站牆兵勇登時擊回該逆情  
急思竄膽敢向東北礮臺偷窆地道欲用地雷  
轟倒營牆乘機奔竄臣當於川楚各勇中挑選  
善窆地道之人令其分兩路橫窆將其地道破

毀該逆無計可施臣等復連日督帶兵勇進攻西南兩門該逆一味死拒據逃出難民供稱該逆欲乘夜撲圍竄逃因見四面官兵防備甚嚴不過死守以延且夕等語臣等籌辦地道計其丈尺覈以期限原擬年內必可完竣乃因地勢間有低窪宜避地中泥水種種費手今已挖至一百三十餘丈往返紆折以致愆期現在設法

測量地道距城約僅十丈上下事已垂成臣等  
嚴飭副都統常亮前往督辦並令臣弟筆帖式  
恩保及委員等各穿短衣親入地道認真較量  
尺寸定準方向以免再有延誤奏入

上命軍機大臣傳諭勝保曰勝保等連日督帶兵勇進  
攻西南兩門該逆一味死拒勢難力攻詳覽各情是  
我兵攻勦總未得手該大臣等勦辦此股敗竄餘匪

累月經時毫無把握似此貽誤遷延殊堪痛恨至籌  
辦地道窆至一百數十餘丈何以尙未成功且恐該  
逆知覺豫先防備則此舉又將徒勞無益現在賊糧  
將盡攜帶火藥欲乘夜竄逃若任其潰圍而出則勝  
保等縱寇殃民厥罪愈重惟當乘其窮蹙激勵弁兵  
迅將賊匪就地殲除斷不准令其免脫儻藉口於賊  
守甚嚴但以籌勦情形敷衍入告老師糜餉之罪亦

斷難屢邀寬宥也

同日陳啟邁奏言據五品頂戴吳錫光稟報十一月二十六日湖口逆匪六千餘人水陸兩路上竄吳錫光督率兵勇先陷賊陣吳邦柱等四路橫擊程迪昌等接應踵至該逆大敗奔逃我軍逐北十餘里殺賊五百餘名生擒十六名時賊船二十餘隻正與水軍接仗旋經陸兵馳至

協助施放火箭燒毀逆艇五隻擊沈四隻斃匪  
無數二十八日復有逆船數十隻離南康僅三  
十里吳錫光派艾連升等率領兵勇漏夜前往  
該處徑偪河干拋擲火毬火罐燒賊船二十餘  
隻該逆從睡夢中驚起猝不及防焚溺無算十  
二月初一日探有賊匪一萬餘人帶雲梯一百  
數十架來攻南康郡城以圖報復吳錫光因逆

燄狻猊我軍單薄未可力敵令兵勇列隊登陴  
偃旗息鼓俟該逆圍近城根始令士卒齊施槍  
礮斃匪七八十人有悍賊援梯而登者均被我  
勇擊退逆衆攻城愈急直至未初吳錫光見賊  
勢已懈卽派林保戴正才艾連升武得勝等分  
帶兵勇由四門同時並出鼓譟奮擊賊衆披靡  
斬僞總制譚豈瞬僞監軍萬年菁於陣生擒僞



百長陳細狗唐有用二名逆匪敗竄我軍窮追  
二十餘里殺賊八百餘人生擒二十八名初四  
日探得逆衆萬餘復由姑塘來攻南康吳錫光  
將兵勇分爲七隊於附近十里地面分投埋伏  
俟賊衆將近郡城伏兵齊起該逆不知我軍多  
寡登時奔潰殺賊一百餘人生擒二名先是逆  
船大小一百餘號揚帆上駛李逢春所帶快船

水勇僅三百餘名衆寡不敵該逆乘勢竄抵瀟  
溪吳錫光急派武得勝熊得勝匡鳳岐馳赴該  
處攔頭兜剿賊始敗退旋據該員稟稱湖口梅  
家洲姑塘屏風等處賊船木簞經湖南水軍及  
湖北臬司胡林翼甯紹台道羅澤南進攻燒毀  
甚多楚省都司蕭捷三帶水師戰船已抵南康  
城下並據德化縣稟報潯郡賊匪於西南二門

外加築土城挖濠注水甚爲堅固江楚官軍連日進攻驟難得手又准湖南提臣塔齊布咨初七日黎明逆匪萬餘擁出東門攻撲湖北營盤西路賊匪數千來撲江西營盤均經該提督與副將王國才總兵居隆阿等併力擊敗各等因查湖口賊黨尙衆不但南康仍當嚴防都昌陸路可達饒州尤應扼要堵禦現經遊擊馬福壽

帶領練勇六百名馳往都昌駐紮並令已革總  
兵趙如勝酌帶饒郡兵勇前往協防九江匪徒  
雖尙負嶠固守經提臣塔齊布等此次痛勦大  
挫兇鋒賊勢愈孤諒難久踞其楚軍需用雲梯  
五百架布口袋一萬件已派弁解往曾國藩軍  
營應用並俟湖口肅清卽將礮位藥鉛運送出  
江仍咨行總兵居隆阿臬司惲光宸會同楚省

兵勇實力合圍速殲羣醜至江西戰船所賸俱  
係小船難期得力業飭督糧道鄧仁荃倣照湖  
南長龍三板船式各添造三十隻用壯水軍聲  
威奏入

上命軍機大臣傳諭陳啟邁曰自曾國藩等進攻潯郡  
以後盡將賊船偏入湖口該逆下游之路已斷勢必  
由南康一帶上竄南康未可弛防吳錫光所帶兵勇

雖單而楚省派來都司蕭捷三戰船已抵南康城下  
亟須水陸並集以勦爲防江西所贖小船旣難得力  
卽飭鄧仁莖倣照湖南船式剋期添造以助攻勦其  
都昌通達饒州路徑遊擊馬福壽帶勇往紮是否足  
資堵禦曾國藩塔齊布雖屢挫賊鋒而該逆尙於九  
江門外加築土城挖濠注水爲負嶼抗拒之計若吳  
錫光等能一面設防一面沿流勦洗則江省保障益

堅卽九江賊勢益孤陳啟邁身任地方不得以勦賊  
委之曾國藩等致令該逆往來肆竄曾國藩等軍營  
所需礮位藥鉛亦著設法運送出江並著該撫飭令  
居隆阿惲光宸等會合楚省兵勇悉力圍攻盡殲羣  
醜

十二日丙子和春福濟奏言接秦定三來函桐懷

賊匪紛紛竄至舒城現於北門外添築營壘拏

獲奸細據供該逆大股欲竄六安計圖窺伺北路等語查舒城爲六安門戶而六安近接固始正陽關均係北路要隘亟當趕緊布置以策萬全現飭劉玉豹並知府葉德同知李安中等帶兵勇一千數百名由六安迅速赴舒交秦定三調遣防勦兼施以遏北竄俟楚師抵皖再行酌覈辦理奏入



上命軍機大臣傳諭和春福濟袁甲三日現在舒城逆  
匪有欲竄六安之說和春等所籌係爲嚴扼北竄要  
著卽著照所議派撥俟楚師將入皖境應如何酌撥  
布置再行妥籌具奏該提督等擁兵廬州經年累月  
動以無兵可撥爲詞以致各路皆爲牽掣秦定三專  
辦舒城亦逾半載孤城未克轉待添兵似此遷延何  
時蕨事著和春等迅督兵勇剋期攻復廬州不准再

延時日劉玉豹等所帶兵勇旣經改赴舒城卽歸秦  
定三督帶儻任該逆北竄惟秦定三是問

和春福濟又奏言十二月二十五日五鼓臣等  
率同官兵直攻廬城未刻得勝門出賊千餘人  
卽令常清江忠濬程智泉等帶領兵勇盡力擊  
勦適吉順鄭魁士嵩瑞帶兵由南門趕至前後  
夾攻該逆敗奔入城三十日申刻得勝門七里

站賊營各突出賊匪二千餘名直撲楚廣勇營  
盤經江忠濬程智泉等督同兵勇緊守營壘逆  
匪分路蠶擁而至漸次逼近我軍連開大礮立  
斃數十人該逆猶敢開槍抵拒常清珠克登帶  
兵由兩路抄襲該逆前後受敵當卽敗逃程智  
泉江忠濬唐正魁等帶領兵勇出營會合官兵  
追殺斃賊多名唐正魁衝入賊隊搶過外濠被

該逆連放槍礮立時陣亡又准秦定三來函十  
二月二十一日辰刻督率官兵分攻各門適六  
安門西門各出賊千餘名當令郝光甲等帶領  
兵勇分途迎勦賊衆拌力抵拒我軍連開槍礮  
斃賊多名並轟倒黃衣賊二名西門之賊敗伏  
隄內六安門賊匪愈出愈多秦定三親督各軍  
奮力衝殺逆屍枕藉二十五日辰刻又督官兵

分赴各門攻剿適北門出賊千餘名直前迎拒  
我軍奮力擊殺立斃數十名該逆猶復不退兵  
勇衝入賊隊槍礮連環刀矛並舉賊衆敗逃外  
委關玉林首先爬上賊營被該逆矛刺咽喉登  
時陣亡又准忠泰咨開十二月二十六日四更  
後官軍分攻巢縣各門攻至天明東西北三門  
各出賊千餘名當令富呢雅翰等帶領兵勇分

途迎勦斃賊六七百名生擒七名各等因查已  
革藍翎把總唐正魁節次殺賊奮勇茲復臨陣  
捐軀藍翎額外外委關玉林槍上賊壘登時陣  
亡均堪憫惜相應請

旨將唐正魁仍照把總陣亡例議卹關玉林照例議卹  
奏入

上諭內閣曰廬州等處逆賊欲以犄角牽掣官軍經各

路兵勇奮力勦洗自己喪膽著和春等迅圖克復各  
城毋再延緩陣亡之已革藍翎把總唐正魁著照把  
總陣亡例議卹藍翎額外外委關玉林著照例議卹  
同日湖北巡撫陶恩培奏言聞督臣楊需於三  
十日在廣濟營盤失利兵勇潰散業已退紮蘄  
水縣臣抵任甫經十日一切事宜均未深悉伏  
查在城兵勇不足一千八百名餉銀僅餘二萬

兩錢三萬餘串米穀不滿萬石正在巡閱城垣  
與司道等籌商防堵間忽督臣楊需於初五日  
申刻自蘄水退回漢口鎮臣聞信之下不勝駭  
異城中居民刻卽搬徙一空當猝不及防之際  
諸形棘手設逆匪果由蘄水分水陸兩股上竄  
武漢臣惟有督率文武協力同心嬰城固守除  
一面飛咨會國藩塔齊布兩營撥兵來鄂援剿



外相應請

旨飭令趕緊派兵前來策應奏入

上命軍機大臣傳諭楊需曾國藩塔齊布陶恩培曰據陶恩培奏總督營盤失利退回漢口等語楊需於上年十二月在廣濟發報但言逆匪分擾黃梅並無賊擾廣濟之事何以忽有此敗實所不解究係皖賊上竄抑或另有股匪突起楊需所帶兵勇爲數不少何

以遽爾失利卽或小有挫失亦不應一退再退徑回漢口詳細情形著該督速行馳奏大兵全力專注九江該逆知楚省空虛北軍輒弱乘間回撲不可不防此時皖豫兩省均無兵可撥惟有曾國藩塔齊布之兵可以就近赴援著該侍郎提督確探賊蹤卽飛速分撥官兵如胡林翼王國才所帶兵勇無論何人皆可令其折回迎剿旣以保障鄂省且免九江官軍腹

背受敵之患陶恩培既經抵省雖城中兵餉未充亦當力籌堵禦不可稍涉張皇楊霈斷無竟回武昌之理現在作何行止本日已諭知官文酌撥荊州官兵順流下剿該督卽咨催會合前進以剿爲防若武漢稍有疏失恐該督不能當此重咎也

上又命軍機大臣傳諭官文曰總督楊霈在廣濟失利退回漢口鎮已諭令曾國藩塔齊布分兵剿辦矣惟

曾國藩等水陸各軍圍攻九江正當喫緊之際若分  
兵過多恐江西賊匪復肆猖獗且該逆或竟由廣濟  
上竄武漢正須迎頭截擊著官文調派精兵迅速沿  
江直下與曾國藩等分派兵勇會合兜擊至官文應  
否親統官兵前進以壯聲勢如未便遽離荊州卽派  
委得力將弁統帶進剿著就現在情形妥籌辦理並  
迅速由驛馳奏

上又命軍機大臣傳諭英桂曰楊需於上年十二月三十日在廣濟失利退紮蘄水縣旋退回漢口鎮恐該逆由蘄水分水陸兩股上竄武漢英桂現駐陳州著卽確切偵探楚北情形迅速具奏儻武漢果有賊警所有楚豫毗連各處要隘著該撫妥速布置嚴密防範不可稍有疏虞

十四日  
寅 戊

上命軍機大臣傳諭僧格林沁西凌阿曰據巡防王大  
臣所呈探報本月初二日我兵攻破竈戶陳莊賊匪  
僅踞連鎮河東一處初三日復將賊築木城燒燬逆  
黨尙有二千餘人我軍大礮已運進套隄並陸續投  
出之賊亦復不少辦理似屬得手乃初九日攻勦連  
鎮兵勇陣亡二十餘名受傷者四十餘人是該逆灰  
燼之餘尙思抵死抗拒探報情形是否屬實此時如

何籌畫攻勦何時始能蕆事著僧格林沁迅速詳細具奏以慰廑念

同日

上諭內閣曰吉爾杭阿著馳定向榮軍營幫辦軍務

十七日辛巳向榮奏言據探蕪湖安慶之賊屢至

金陵乞援此時上方橋賊營已空誠恐其分赴上游別圖竄擾當經飛檄革任提督鄧紹良妥

密籌防就近與高瀆之兵聯絡策應並抽撥遊  
擊楊瑞乾義勇三百名三江協兵二百名馳往  
黃池協勦令都司劉季三帶壯勇由秣陵關移  
紮高瀆去後一面設法進攻金陵藉以牽綴賊  
衆無如城高池深仰攻不能得力惟有開挖地  
道轟塌城垣庶有進攻之路查有東北隅龍脖  
子一帶濠淺無水可以開挖卽密派都司李定



太選帶精兵潛夜往辦適於城下掘得暗門一處連夜挑挖至正月初二日始成一穴寬廣約五六尺深約二丈可容火藥五六千斤力足轟城乃於初三日夜間派出各營六成隊伍分作三路交總兵德安明安泰分起統帶埋伏朝陽太平兩門及明陵之內另挑奮勇一千名由副將張國樑傅振邦帶領潛藏龍脖子左右一俟

城垣轟開卽各鼓勇登陴 臣於初四日寅刻親  
出陣前督催攻勦先令李定邦密帶弁兵二百  
人各負火藥一包及木石土袋諸物於三更潛  
赴城根聞城上更鼓甚繁乘此將土木運入填  
堵未乾之處築砌結實再將火藥逐袋裝入約  
有四千餘斤將引繩安妥帶出封固洞門時近  
黎明 臣卽傳令點發俄聞霹靂一聲黑煙上薄

雲霄城頭人畜震落無數不料外面牆軌雖轟  
去二丈高下並損壞垛口數處而城身堅厚仍  
復壁立大隊不能擁進該逆始則驚竄暫退繼  
復讙擁堵住矢石交下連開大礮我軍偏近城  
隅未免兩面受敵當卽退出山坡之左會合伏  
兵盡力攻擊該逆伏堞拒守愈聚愈多槍礮如  
雨攻至午時不能得手祇得撤回又據鄧紹良

呈稱探得蕪湖之賊自十二月二十二日被挫  
後糾黨欲於二十四日內犯當調遊擊蕭知音  
帶兵由高瀆赴援該逆始聞風而止二十九日  
遊擊楊瑞乾帶勇前來時蕭知音已回兵高瀆  
前後聯絡堵紮正月初二日戌刻蕪湖賊首復  
合上下游匪黨六七千人來犯黃池分三路乘  
夜大進鄧紹良整隊以待並親巡浙省各勇營

盤諭令管帶文武鎮靜堅守一面分派楚兵義  
勇擇要埋伏俟賊懈出擊初三日辰巳時分前  
隊賊匪直撲台勇廣勇二營我勇密開槍礮立  
見執旗上前之賊紛紛倒斃其後隊仍相率繼  
進我營屹立靜守俟該逆至槍礮可及之處我  
兵始開大礮排槍繼之斃賊無算鄧紹良親督  
銳勇衝出手燃鳥槍擊中大黃旗賊渠落馬繼

以刀劈復被楊瑞乾各勇率同台廣二勇分路  
兜抄沿途殲斃甚衆前隊撲營之賊無一生還  
我軍追至窰山地方賊之後隊業已逃散始整  
隊回營是日之戰除截斬淹斃不計外共生擒  
僞官及賊黨三十九名訊明就地梟示查黃池  
南通甯國東達廣德相距僅百數十里皆元明  
初年閒道入浙之路實爲第一要隘今賊勢漸

覺不支犯浙之念較前更急幸而仰仗

天威屢經大創足以遏賊鋒而固門戶鄧紹良節次布

置均合機宜臨陣又能手戮數賊以少勝多其

保全甯國廣德之力似可稍贖前愆可否仰懇

恩施賞給三品頂戴給還花翎以示鼓勵其餘出力將

弁兵勇容臣彙請保奏頃復接鄧紹良呈稱章

逆率賊已由蕪湖內竄意欲先犯甯國後走灣

址方村並分撥東梁山賊股由薛鎮抄襲黃池  
以奔甯國又有僞尙書曾雲瓏領賊一股仍由  
舊路來撲黃池等語查該逆分三路同進無非  
使我首尾不能兼顧 臣於無可抽撥之中再撥  
義勇四百五十餘名令千總楊萬青等帶領趕  
赴黃池歸併楊瑞乾管帶助勦其東壩高瀆一  
路已飛咨撫 臣吉爾杭阿速抽兵勇馳往會堵



甯國如果有警鄧紹良卽可抽兵就近赴援現  
在疊催師船上勦再據余萬清呈稱疊次督攻  
鎮城該逆負嵎堅拒十二月二十六七八等日  
分路擊殺皆有斬擒奏入

上命軍機大臣傳諭向榮吉爾杭阿曰此次開挖地道  
轟毀牆垣我兵大隊旣未能擁入自應迅速力攻牽  
綴賊衆使之應接不暇方可再圖進取而黃池地處

蕪湖江口之外關繫甯國廣德咽喉該逆因楚師東  
下圖擾江浙自必力爭黃池以肆其猖獗雖鄧紹良  
一軍續經獲勝賊衆尙有欲分三路再來內犯之語  
該大臣所稱委千總楊萬青等帶勇馳往歸併楊瑞  
乾管帶助剿並咨吉爾杭阿抽撥兵勇往堵東壩高  
淳一路均著照擬辦理吉爾杭阿著飛速統帶兵勇  
馳赴金陵以資攻剿水師各船自十二月初八日經

吳全美李德麟等督帶上勦後日久未能揚帆斬練  
若似此遷延江面逆蹤往來自由勦辦何時始能得  
手現在東風司令兵船易於上駛著卽嚴飭該鎮將  
迅督戰船分幫進發務將攔江賊練卽日掃除若再  
遷延著卽從重叅辦至鎮江一城余萬清督兵已久  
尙無克復消息該大臣所奏連日皆有斬擒不過小  
勝豈能藉慰朕懷著向榮一面嚴催余萬清趕緊攻

勦毋但以籌畫布置等詞敷衍入告一面妥探黃池等處情形及鄧紹良等如何堵勦迅速覆奏

上諭內閣曰金陵之賊自我軍將城外上方橋賊營八座焚燬大加勦戮後防守益堅正月初四日向榮復督飭兵勇穴城攻勦轟塌城牆二丈及垛數處城頭之賊震落無數我軍槍礮盡力攻擊該逆伏堞死守著向榮相機迅圖克復其黃池地方緊要仍飭鄧紹

良嚴防紛竄勦堵兼施已革提督鄧紹良督兵臨陣  
手戮賊渠尙知奮勉著賞給三品頂戴並賞還花翎  
以示鼓勵其餘出力員弁兵勇准其彙案保奏候朕  
施恩

同日楊霈奏言臣前因黃梅縣爲皖楚咽喉最  
關緊要當卽督率兵勇前赴廣濟一帶相機調  
度十二月二十九日逆匪竄撲荆竹鋪派參將

劉富成等管帶兵勇迎擊殺賊多名三十日探  
知賊匪分股攻撲大營 臣卽挑選四川甘肅官  
兵及練勇二千餘名共成三隊前往迎擊施放  
連環槍礮斃匪無數該逆紛紛退奔山梁李士  
林首先搶上殺斃黃衣賊匪數名無如山路崎  
嶇賊情詭詐四面山坳俱有埋伏突將李士林  
圍困其中李士林力不能支爲其所害各兵勇

隨皆潰挫 臣卽親督後隊兵二百餘名迎敵正  
在進勦間忽大營火起兵勇前後不能兼顧且  
見營盤已失無要隘可守祇得暫退蘄州原擬  
擇要駐紮詎各兵勇先已陸續上行贖兵無多  
卽由蘄水趕至巴河黃州一帶查知各兵勇又  
已先回武漢當卽知會撫 臣將首先逃回者正  
法數名以肅軍令 臣隨連夜上行於正月初五

日趕到漢鎮初六日探知該逆已上竄距漢鎮六十里之陽邏一帶竊查漢鎮屢經蹂躪遽聞警信居民遷徙一空且向無城垣街巷袤延二十餘里處處有路可入祇可出戰難以守禦臣當派守備施鴻恩等前往沙口游湖等處堵禦將賊匪所搭浮橋全行燒燬並槍斃賊匪數人不意該逆一股抵禦官兵復分股由沙口之上



拆毀民房紮成木筏潛渡過河臣於初七日親  
督兵勇並飭栗耀等隨同迎擊追殺二十餘里  
詎料該逆於黃州下搶獲南省新到礮船數隻  
溯流而上沿江施放大礮復有另股賊匪擁  
登岸旁出抄襲我兵之後兵勇傷亡甚多栗耀  
駭受矛傷此時兵勇晝夜奔馳甚形疲憊力實  
難支該逆已乘勢搶入漢鎮紛紛放火因思楊

店德安一帶均爲北路要隘該逆僮由蔡店上  
竄勢更難遏臣趕赴德安堵截要口以防北竄  
至省城兵力雖單糧餉尙足猶堪固守待援至  
潰散兵勇雖已收集數千惟屢挫之餘難望復  
振已飛調行抵漢川之陝甘官兵及宜昌鎮兵  
二千餘名星夜趕赴德安一帶復飭調沔陽隨  
州孝感等處練勇二三千人前來防堵一俟官

兵調齊仍卽激勵將士親督攻剿以期掃盡賊氛奏入

上命軍機大臣傳諭楊需曾國藩塔齊布陶恩培曰楊需奏稱賊由黃梅武穴竄至漢鎮該督現駐德安嚴防北竄等語自上年十二月二十九日起至本年正月月初七日計期不過一旬何以一退再退全軍挫敗該督復退至德安以趕調兵勇爲詞殊屬不成事體

曾國藩等督師九江楊需爲其後路應援現在九江  
尙未攻克漢口又遭竄擾督勦失利在該督罪無可  
辭而東下之師腹背受敵思之實堪痛恨所有陝甘  
官兵及宜昌鎮兵二千餘名現已調赴德安沔陽等  
處練勇亦經調往楊需斷無株守德安之理著一面  
遏其北竄一面相機進勦其首先潰敗兵勇並著從  
嚴懲辦仍須於收集之後認真防範毋生他變武昌

省城著責成陶恩培竭力保護毋稍疏虞惟湖北兵力既不足恃賊勢又甚猖獗亟須得力將弁前赴援剿著曾國藩與塔齊布悉心商辦或該提督親自督兵往援或派羅澤南胡林翼李孟羣等酌帶兵勇星馳勦辦總期掃除賊氛使水陸各軍均無後顧之慮方爲妥善諒曾國藩等必能統籌全局妥爲辦理

上又命軍機大臣傳諭英桂曰逆匪由黃梅回竄漢鎮

楊需退駐德安湖北與豫境毗連該逆現踞漢口難保不豕突狼奔肆行竄擾英桂駐紮陳州相距較遠前據奏邱聯恩帶兵控制光商一帶所有楚豫交界各要隘卽著責成該總兵嚴密布置確探賊蹤相機堵剿不得稍有疏虞

上諭內閣曰賊由黃梅回竄漢鎮楊需督兵廣濟爲楚軍後路致令逆賊回竄失利節節退守實屬調度乖

方著卽革職並拔去花翎暫留本任仍著收集兵勇  
相機進剿以贖前愆並著官文曾國藩塔齊布迅速  
撥兵援應毋令蔓延

同日袁甲三奏言安省北路州縣宿州爲第一  
衝途現署知州郭世亨卓著循聲上年粵匪由  
正陽出竄界連該境人心惶懼該牧督率民丁  
守禦賊不敢犯查宿州毗連之亳永一帶餘孽

時虞蠢動非得一賢能之員勦撫兼施恐難安  
靖郭世亨前蒙

恩以知府升用應請將知州開缺卽以知府補用仍留  
蒙亳宿永一帶勦辦賊匪於綏靖地方更可得  
力至宿州本屬要地此時遽易生手恐呼應不  
靈查補用直隸州知州王啟秀辦理團練推誠  
布公民皆樂從以之接署宿州洵堪勝任奏入



上諭曰著再與和春福濟妥商朕以爲郭世亨旣在宿  
得力何必多一番周折調署牧令亦非汝應干預

袁甲三又奏言查逆賊竄踞金陵已經兩載先  
因江路未能堵截以致揚帆上下日肆狡猾今  
曾國藩塔齊布收復武漢而後水陸並進所向  
克捷實爲全局一大轉關惟廬城不復卽楚師  
東下斷不能直擣金陵卽果達金陵而廬城之

賊牽掣數省軍務仍無了局蓋廬州居江北腹  
地之中水陸交衝四通八達廬州一日不克舒  
巢亦未必能克不特廬舒巢三城重兵爲所牽  
掣卽江北各路數萬防兵亦皆不能遽撤况廬  
州不克曾國藩卽攻克安慶而進兵則慮賊襲  
其後留兵又恐力無可分其不敢放膽徑徧下  
游者勢也若由安慶直擣桐舒則自南而北賊

中驍悍將悉聚於廬州萬一潰圍衝突鋌而走  
險北竄之路處處可通卽各路防禦嚴密賊不  
敢遽竄而明知萬無可逃嬰城固守以老我師  
恐亦非計是克復廬州爲現在第一要著至廬  
州之克和春福濟非不日夜圖維而總未能迅  
速蕺事者師久力疲精銳漸少圍城旣不能周  
援賊又不能斷左支右絀遂致日久未能告捷

查曾國藩原統水陸兵一萬四千人現又調臬  
司胡林翼帶兵三千隨勦兩湖督臣楊霈防堵  
北岸諒亦有兵數千與曾國藩等合爲一氣如  
曾國藩一入皖境水師順流而下進逼安慶陸  
軍由北岸掃蕩太潛各邑或楊霈或胡林翼帶  
兵進駐潛太既可與水師夾擊安慶並防逆賊  
回竄楚北另以塔齊布統兵數千由六安一帶

繞出廬舒以北先攻廬州廬州一克則由北而南從後兜裹以次收取舒桐順趨安慶各路防兵並偏江岸從此直抵金陵無後顧旁顧之憂破竹勢成計日可待應請

飭下曾國藩等相機妥籌總期絕其蔓延之路方可一氣呵成至南岸情形臣未能深悉大約池州府屬以上有賊之區或距江數里或距江數十里

曾國藩水師扼住江路稍分陸路之兵沿岸掃蕩萬不至別生枝節其池州以下接連金陵之處應如何責成防禦並請

飭令在事諸臣隨地布置庶可一鼓成擒奏入

上命軍機大臣傳諭和春福濟袁甲三曰袁甲三奏統籌全局宜先克廬州詳覽所奏大意以廬州居江北腹地之中一日不克則三城重兵爲所牽掣江北防

兵不能遽撤會國藩等帶兵自南而北不如塔齊布  
統兵數千由六安一帶繞出廬舒以北先攻廬州以  
次收復舒桐順趨安慶袁甲三所籌各情自係爲全  
局起見但於現在情形究未深悉此時九江尙未克  
復會國藩塔齊布水陸兩軍互相援應攻剿正在喫  
緊而安徽上竄之賊又踞漢口楊霈退守德安會國  
藩等亟須分兵救援豈能繞出廬州以北此論不過

徒慮將來於現在軍情難裨實用至克復廬州原爲  
皖省軍務第一要著和春等統領重兵累月經年尙  
未得手若再遷延師老力疲勦辦更難得力袁甲三  
旣知北竄之路處處可通卽當嚴密布置總期於事  
確有把握方爲不負委任若徒託空言爲他人慮而  
於親辦之事一味鋪張毫無實濟豈能以此爲卸責  
地步耶其廬舒等處仍著和春福濟督飭各路官兵



迅速攻剿毋得再事遲延致干重罪

卷之四十四

四

欽定勦平粵匪方略卷一百十八 乙卯年

正月十八日 壬午 僧格林沁西凌阿奏言逆匪占

踞連鎮以來節經痛勦殲斃無算 臣因該逆詭

狡異常時與各營熟籌妥議計出萬全近來陸

續投誠人眾三千餘名 臣察其並無異心酌量

收錄令於圍隄以內屯紮打仗亦頗得力兵勇

合力進攻焚燬賊營數座殺賊多名十二月三

十日退出竈戶陳莊初一日西凌阿瑞麟統領  
各路官兵員外郎瑞禧督帶投誠義勇合力環  
攻三晝夜之久始將西連鎮賊巢全行蕩平立  
將賊隊浮橋拆毀卽飭該義勇在西連鎮沿河  
築壘屯紮晝夜攻擊並調撥義勇在竈戶陳莊  
紮營將大礮運進套隄高築礮臺六座隔河轟  
擊惟該逆死守巢穴四面密布礮火不容兵勇

進前雖被困萬無生路而或戰或守仍能從容  
不迫毫無潰亂情形正月初二日林逆心腹四  
川人蕭瀨山安徽人鍾有年帶領捻匪水手九  
十一名並大礮擡槍鳥槍刀矛百餘件出降臣  
稔知蕭鍾二犯在南省自行投入賊營渡河北  
犯以來俱係該二犯主謀畫策與林逆同惡相  
濟並據蕭瀨山供係浙江軍營六品軍功保舉

縣丞鍾有年供係文生卽使真心投降亦屬罪  
不容誅更難保非技窮生詐另施鬼蜮伎倆當  
將蕭鍾二犯凌遲處死夥賊九十一名全行正  
法近日復陸續投出六百餘名臣等因賊勢已  
窮逆匪自知萬無生路始行投出希圖倖逃斷  
難寬宥當卽隨時正法至現在賊匪不下二千  
名結成死黨聚於連鎮一隅築砌木城數重抵

死拒守自初三日以後不分晝夜兵勇極力環  
攻業經數次逼近木城拋擲噴筒火彈將欲攻  
進賊壘皆被該逆捨命抵敵未能攻克木城以  
外房間焚燒殆盡查逆匪疊被勦擊兼之糧米  
告匱衆心乖離賊勢萬分窮蹙揆度情形指日  
必可蕝事奏入

上命軍機大臣傳諭僧格林沁西凌阿曰連鎮逆匪退

出竈戶陳莊西連鎖賊巢已全行蕩平其勢極爲窮  
蹙惟該逆尙有二千名在東連鎖築砌木城數重爲  
負隅死守之計我軍沿河築壘並將大礮運進套隄  
高築礮臺轟擊正可併力進攻將此股逆匪全數殄  
除大營兵勇數倍於賊若因該逆礮火難近不思擣  
穴擒渠逆匪雖糧絕勢窮而狡悍異常恐滋他變該  
大臣等務卽督飭兵勇奮力攻剿斷不可專恃坐困



待其自斃仍一面嚴防紛竄之路毋令乘間逃逸

二十日甲申托明阿陳金綬雷以誠奏言十二月

二十七日探得瓜州逆匪豫約鎮江賊黨過江  
約有二三千名沿江竄往儀徵境內臣托明阿

飛飭駐紮儀徵之總兵李志和副將松齡等努  
力防堵一面督同副都統德興阿等帶領馬隊  
由樸樹灣追往協勦時該逆前隊竄至儀徵都

天廟迤東已被李志和松齡等帶兵迎擊斃賊  
數十名該逆卽行遁回二十八日臣等酌派遊  
擊馬永泰等帶領步隊由樸樹灣渡河追勦適  
遇逆匪直撲前來我兵分路截擊槍礮連環殲  
賊無算是日另股賊撲儀徵縣城經李志和等  
帶領馬隊迎勦斃賊數十名餘賊潰敗二十九  
日夜間賊匪由儀徵境內竄過鹽河踞帶子溝

紮立土壘臣托明阿督同德興阿馬永泰等進  
擊大風揚沙該逆立腳不住我兵乘勢追殺賊  
皆遁入土壘三十日各營步隊分路進剿馬隊  
分兩翼埋伏步隊至帶子溝搭橋過河遇賊匪  
大股撲來馬永泰張維義安勇劉琮等督催弁  
兵開放連環槍礮奮勇前進賊勢不支且戰且  
退我兵直抵賊壘始則槍礮齊施繼以刀矛擊

刺該逆死拒不退愈聚愈多約有三四千名四面圍裹官兵德興阿帶領馬隊突從中路衝入副都統富呢雅剛阿等分路截殺賊俱潰竄追至日暮復斃賊多名生擒數名是日之戰該逆屢敗屢進均被德興阿等奮勇擊退四散逃匿適李志和松齡奇成額富音保等由儀徵帶兵在新城一帶堵剿有逆匪一股竄往隨卽督兵

迎擊該逆轉向南逃跟蹤追殺至夜深同時撤  
回本年正月初一日臣托明阿督同德興阿等  
正在設法進攻帶子溝賊壘聞有賊匪數百名  
在儀徵北山根一帶擄掠當經德興阿李志和  
等派馬步官兵分路兜剿殲賊數十名餘賊星  
散當因兵力不足臣等又將東岸一帶防兵抽  
調馬步隊數百名馳往助剿初二日復有賊數

百名竄赴新城各村經豫派埋伏把總張鵬飛  
率兵突出戮死紅衣賊一名砍死長髮賊數名  
初五至初八九等日逆匪數百名突奔帶子溝  
迤北新集地方經德興阿揮兵截擊一面分撥  
馬隊馳往迎截一面令馬永泰等帶領步隊暗  
伏樸樹灣等處以便夾擊是日臣雷以誠與慧  
成等分兵攻瓜州土城臣陳金綬督同晉康帶

兵馳至樸樹灣一帶會勦該逆見兵勢愈盛全  
夥折竄我師沿途追擊殲斬無數其遁入荒村  
空屋之賊悉被官兵用火器燃燒立將帶子溝  
新築賊壘一座並河南新築賊營二座焚燬該  
逆四散狂奔分踞河南各村因日暮路歧未便  
深入窮追連日趕緊集夫填溝搭橋於十三日  
經德興阿等激勵馬步各隊分路進勦該逆仍

敢分股出拒經官兵齊施槍礮痛加勦戮該逆  
全行潰竄富呢雅剛阿德克津佈等帶領馬隊  
分兩路齊進馬永泰等由中路進攻總兵德坤  
帶領後隊接應立將賊壘三座焚燬殲斃賊匪  
數百名溺死溝渠者不少餘匪遁入瓜州土城  
現仍令官兵加意嚴防並飭儀徵縣起緊補築  
帶子溝一帶土牆缺口 臣等現在督飭東西兩



岸各營水陸防範並設法速攻瓜州以分賊勢  
又據焦山水師總兵周士法孫雲鴻稟報初九  
日寅刻見逆船連檣正渡急率將備帶快艇礮  
船飛檣駛追該逆於甘露寺北固山龍窩大馬  
頭各處連開大礮我師奮勇不顧直取賊船時  
金山下賊船多隻見師船勢猛意欲逃避我船  
分兩翼兜擊礮火橫飛該逆正不能支忽瓜州

小口金山銀山等隄之賊開礮來援該鎮等亦命三面迎擊又見煙霧中大賊船一隻飛槳衝下師船連環開礮該逆欲攏避金山賊隄適爲礁石所閣不能動移我師對船開礮卽將此船擊碎並將四面續至之小賊船擊沈多隻時鎮江陸路官兵正在西門外開仗該鎮等卽移船南岸大馬頭一帶爲鎮江策應至巳刻西風又

勁遂收隊回營等語 臣等以瓜州近招鎮江賊  
黨多至三四千人實由江面水師不能巡防攔  
截所致現已嚴飭該鎮等當用大船絡繹進攻  
不得僅遣巡哨快船旬日一戰虛圖塞責奏入

上命軍機大臣傳諭托明阿陳金綬雷以誠向榮吉爾  
杭阿曰儀徵逆匪旣經全數遁回瓜州亟應嚴密防  
堵近日克復各處城池往往旋克旋陷總因兵過之

後守禦無人處處必須留兵駐守安得如許兵力儀  
徵逆蹤既退卽著嚴飭該地方文武實力備禦毋任  
該逆再有竄擾余萬清專辦鎮江不能迅速攻復郡  
城又不能奮力進剿致逆匪屢次糾夥渡江會合瓜  
州賊黨四出竄擾該革員所司何事殊爲可恨焦山  
師船所以不令上勦者原爲橫截下游江面以斷瓜  
鎮賊援周士法等水師雖小有勝仗並未督率大船

聯絡進攻徒用巡哨快船遇賊追擊以致兩處逆賊  
往來不能阻截厥咎維均該大臣既經嚴飭進勦儘  
該鎮等仍前疏懈卽著據實嚴叅吳全美等所帶師  
船屢經降旨嚴催總以風色不順爲詞實屬遷延贍  
玩現在上竄楚北之匪又復占踞漢口曾國藩等兵  
阻九江連日尙無奏報若再不從下游迎擊而上則  
蕪湖以上沿江賊船何時始能掃蕩楚師腹背受敵

而江南師船從容觀望儻有疏失咎將誰誘著向榮等再行加緊嚴催務令剋日上駛其浦口師船仍令擇要堵扼不准互相推諉各圖安逸

上諭內閣曰此次賊撲儀徵經官兵疊獲勝仗將賊擊退所有瓜州賊匪亟應剿除以杜勾結著托明阿等迅圖克復毋稍延緩

二十一日酉乙僧格林沁西凌阿奏言自本年正

月初三日後賊匪蟻聚東連鎮經官兵更番進  
勦該逆死力抗拒未能攻克倍深憤急當於十  
七十八等日出隊佯爲進攻密飭兵勇無須向  
前至十九日寅刻臣西凌阿瑞麟經文岱伊勒  
東阿珠勒亨達崇阿督帶馬步隊官兵在北面  
進攻慶祺綿洵侍衛穆騰阿營總巴揚阿在南  
面督帶馬步隊官兵並義勇攻打並令瑞昌玉

明雙成薩炳阿帶兵在河西扼截以壯聲勢凡  
我大小將士兵勇莫不踴躍用命該逆不料倉  
猝間四面受敵仍然死力抗拒我軍一經逼近  
先將賊巢木城焚燃四面火光燭天槍礮向內  
轟擊殲斃無數逆首林瀛詳身受重傷夥匪稍  
卻我軍登時將木城攻破兵刃相接痛加殄戮  
賊巢內屋宇牆垣被火燒塌壓斃逆匪甚多逆



黨見勢已敗紛紛投河突有逆匪拌死撲出木  
城欲向東面奔逃經明慶都與阿督帶馬隊奮  
力截殺至巳刻將逆賊全數殲除奪獲大小礮  
十餘尊擡槍鳥槍刀矛旗幟五百餘件一面嚴  
搜首逆知該逆窀有地窖數處當飭兵勇逐一  
窮搜方將林瀛詳在極深地洞內檢獲該逆潛  
藏淤泥黑黯之中外有逆匪僞總制僞檢點僞

將軍多名擁護一同拏獲當令投誠之勇詳細  
辨認實係逆首林鳳詳先是該逆受傷後藏入  
洞中復又服毒現在擡至大營醫解擬卽委派  
大員護解檻送赴京並令沿途查看情形設該  
逆奄奄將斃卽就地凌遲以免倖逃顯戮臣  
嚴督官兵搜捕餘匪務期盡絕根株不使一名  
漏網至此次尤爲出力之投誠義勇守備銜勇

目施紹恆等先行開列懇

恩獎勵奏入

上命軍機大臣傳諭僧格林沁西凌阿曰逆匪竄踞連  
鎮疊受創懲猶復負隅抗拒本月十九日經西凌阿  
等親督弁兵將賊巢木城焚燒斬獲無數並將首逆  
林瀛詳拏獲俾全股匪徒悉數斬擒將弁兵勇皆能  
踴躍用命不遺餘力該大臣調度有方深堪嘉尙務

當督飭兵勇搜捕淨盡不可稍留餘孽現在高唐餘  
匪數不盈千勝保日久無功著僧格林沁卽統帶得  
勝官兵馳赴高唐督勦餘匪收復城池以慰廑念

上又命軍機大臣傳諭僧格林沁曰本日已寄諭僧格  
林沁命其帶兵馳往高唐督辦軍務該城餘匪本屬  
無多勝保自任欽差大臣以來志驕氣惰將士未能  
用命以致小醜數百日久稽誅被叅各款甚多朕以

簡任乏人一時未卽懲辦疊降諭旨令其改過自省  
仍然不知愧懼遷延日久殊堪痛恨著僧格林沁於  
到高唐後將防剿事務布置妥協卽傳旨將勝保拏  
問派員押解來京一面訪查勝保劣蹟並貽誤事機  
各情節詳細奏聞勝保所帶將弁何人出力兵勇何  
營可用詳加訪問必能知其大略該大臣仍當隨時  
妥爲駕馭其有素不安分擾害地方者卽著從嚴懲

辦

上又命軍機大臣傳諭勝保德勒克色楞崇恩曰本月十九日僧格林沁等督率馬步官兵並義勇奮力進攻將賊巢木城焚燬逆首林鳳詳受傷我兵痛加勦洗將該匪全數殄滅搜獲林鳳詳派員檻送京師已降旨分別加恩並諭令僧格林沁等卽日帶兵馳赴高唐矣因思高唐逆匪數不盈千勝保統帶大軍勦

辦至今尙無把握。蕞爾孤城不能克復。總由該大臣平日調度無方。以致各營兵勇不能奮勉。圖功連鎮賊匪十倍於高唐。僧格林沁謀勇兼資。竟能悉數殲擒。無一漏網。勝保聞之。能無自愧。現在大兵卽日馳赴高唐。若必待僧格林沁到後始圖克復州城。尙復何顏對朕。著勝保督飭各路兵勇。迅卽進攻。不准再事耽延。儻仍前玩泄。不思奮勉。以贖前愆。朕惟有執

法從事斷難再邀寬宥

上諭內閣曰本日據僧格林沁西凌阿奏克復連鎮生擒逆首全股賊匪掃數殲除覽奏欣慰此股逆匪自上年竄踞東西連鎮並占踞附近村莊節經僧格林沁等督率各營將弁痛加勦洗自攻克西連鎮後該逆全數蟻聚東連鎮死守巢穴僧格林沁等令投誠義勇分紮西連鎮及竈戶陳莊並將大礮運進隔河



轟擊逆首林鳳詳薙去長髮意欲乘隙潰圍逃竄賊  
勢萬分窮蹙十九日寅刻西凌阿瑞麟經文岱伊勒  
東阿珠勒亨達崇阿督帶馬步隊官兵在北面進攻  
慶祺綿洵穆騰阿巴揚阿在南面攻打瑞昌玉明雙  
成薩炳阿帶兵在河西扼截將士兵勇無不踴躍用  
命先將賊巢木城焚燬火光燭天斃賊無數林鳳詳  
身受重傷夥匪卻退我軍攻破木城兵刃相接賊巢

內屋宇牆垣被火焚塌壓斃及投河死者不計其數  
奔逃餘匪殲殄罄盡奪獲大小礮十餘尊槍刀旗幟  
五百餘件林鳳詳於地洞內淤泥中潛藏被我軍搜  
獲並將僞總制僞檢點僞將軍等一併生擒實足以  
快人心而伸天討科爾沁郡王僧格林沁經朕特授  
爲參贊大臣督兵勦賊疊著勛勞此次攻克連鎮生  
擒首逆調度有方深堪嘉尙著加恩封爲博多勒噶

台親王伊子乾清門二等侍衛伯彥訥謨祜著在御  
前行走察哈爾都統西凌阿襄贊軍務克奏厥功著  
賞給伊精阿巴圖魯名號並賞給輕車都尉世職齎  
遞捷報之御前侍衛穆騰阿奏蒙古事侍衛都興阿  
均著賞加副都統銜投誠出力之守備銜勇目施紹  
恆著賞加都司銜六品頂翎勇目周隆亭甯宗揚均  
著賞給守備銜勇目張長興詹啟綸楊順山朱興泰

均著賞給六品頂翎其餘各營文武員弁等著僧格  
林沁西凌阿查明保奏候朕施恩以示獎勵現在近  
畿地方一律肅清著僧格林沁等卽移得勝之師前  
往高唐督辦軍務迅速克復州城盡殲醜類

臣等謹案命將出師聲罪致討所以彰撻伐  
而安善良也逆匪林瀾詳等竄擾近畿罪大  
惡極若不盡殲醜類生縛渠魁何以伸

天討而快人心我

文宗顯皇帝特命僧格林沁督師

指授機宜

德威並濟開自新之路准其投誠解脅從之民使之歸

業賊勢遂孤大憖就擒厥後攻克高唐亦無

漏網北路蕩平烽煙無警非

廟畫之精詳曷克臻此哉

同日陶恩培奏言本月初七日寅刻探得大股賊匪連夜上竄將近漢口並未知督臣如何迎戰臣因勢急不及渡江面商當卽督同在城文武先行實力防堵一面傳令將江北岸所泊民船盡數逐去其有往襄河上游者亦令迅速開行旋見漢口一帶火光四起接連十數處至巳刻賊之黃旗已到龜山幸無船可渡未來撲城

正在萬分焦急間候補道李孟羣自下游得信  
帶領礮船四十餘隻星夜來援侍郎曾國藩營  
中亦派礮船八十餘隻接續到省人心稍固數  
日內逆匪晝夜焚燒漢口民房甚多並在漢陽  
城外江邊設壘築牆意圖久抗查城中百姓本  
未全行復業今復搬徙一空城身曠大僅有兵  
勇千餘名尙不敷守築口兼以軍火守具均未

全備城外水陸兩路面面空虛 臣到任旬日一切皆未熟習而督 臣猝然遽退漢鎮官民驚駭人言謠動情狀幾不可問 臣當此措手不及之際絕不爲所搖惑祇知一意堅守現任城樓與文武員弁等開誠布信激勵將士日夜協力保守一面飛咨荊州將軍湖南巡撫並札各屬力籌防禦勿使該逆蔓延爲害一面嚴催督 臣前



調宜昌兵一千名及駐防安陸之陝甘兵一千  
五百名星速來省俾資堵勦現復募勇八百名  
紮營塘角以作水師援應聞該逆此次上竄大  
抵江南老賊居多詭譎異常非得慣戰勁旅恐  
難制勝楚北省垣雖兩遭殘破實爲東南數省  
門戶亦爲曾國藩等進征下游餉道設再疏虞  
所關非細仰懇

聖恩飭令塔齊布就近酌分陸路精兵一支趕救武昌

奏入

上命軍機大臣傳諭楊需曾國藩塔齊布陶恩培曰據陶恩培奏李孟羣自下游帶領礮船四十隻曾國藩亦派礮船八十餘隻均經接續趕到惟該逆於漢陽濱江築壘意圖抗拒非水陸各路糾集兵力迅速掃除誠恐復成蔓延之勢楊需既已挫師於前若再株

守德安任令賊氛猖獗更復何顏對朕此時亟應重  
整兵威與官文曾國藩等派往各兵勇協同兜剿以  
贖前愆陶恩培雖以堅守省城爲要務亦不能將宜  
昌陝甘各兵徒爲保衛武昌之計置漢口漢陽於不  
顧礮船雖到而陸路尙須精兵協剿曾國藩塔齊布  
圍攻九江若楚北賊黨未除後顧甚有可虞著再於  
陸軍內酌派赴援惟此股賊匪據陶恩培奏俱係江

南老賊究係何路賊匪朕心實深懸繫著曾國藩等  
飛速奏聞以慰殷念楚北賊燄復然於曾國藩等勦  
賊機宜大有關係此時惟有會合各兵迎賊攻勦使  
曾國藩塔齊布各軍無腹背受敵之患方爲妥善

二十二日 丙戌科爾沁博多勒噶台親王僧格林

沁察哈爾都統西凌阿奏言連鎮旣已竣事 臣  
卽選黑龍江吉林馬隊二千名哲里木盟馬隊

二百五十名涼莊馬隊三百餘名精健巡捕營  
步隊八百名投誠義勇三千餘名並勝保前次  
留於連鎮之西甯河州宣化正定等處官兵二  
千餘名一併統帶定於二十一日移營高唐會  
同勝保協力進攻以期迅速蕩平又接准托明  
阿函稱揚州軍營兵力不足探聞連鎮大功將  
蕙商調官兵等因伏查揚州軍務正當喫緊之

際自應趕緊撥往以資協勦當經札令總兵薩炳阿統帶漢中等營官兵一千五百餘名並選派吉林馬隊五百名卽日赴揚聽候調遣其餘官兵飭令分起撤回本營奏入

上命軍機大臣傳諭僧格林沁西凌阿曰僧格林沁等奏選帶馬步兵勇移營高唐會勦覽奏與朕意適合高唐賊匪數不盈千該大臣現已選帶精銳兵勇八

千餘名諒已足敷勦辦現定二十一日移營高唐辦理更爲迅速可見該大臣實心任事籌畫周詳必能乘此銳氣克復高唐盡殲醜類總兵薩炳阿現帶兵前赴揚州著卽飭該員迅速前往聽候托明阿調遣上諭內閣曰僧格林沁之兄三品台吉琅布林沁在直隸軍營屢著戰功著賞給二品頂戴並賞戴花翎

同日會國藩塔齊布奏言上年十二月初十日

胡林翼羅澤南等力攻梅家洲賊壘殺賊三十  
餘人該逆遁入堅壘不出水師自初六日攻破  
賊簿後該逆連夜將大礮鑿沈江心實以沙石  
僅西岸留一隘口攔以筏纜初十日陸軍攻壘  
之時約水師同攻此卡彭玉麟孫昌國蕭捷三  
等督三板各船斬纜衝入焚其戰船三十餘號  
民船三百餘號斃賊約數百名十二日陸軍復



攻賊壘終日以礮多壘堅卒不能破水師復衝  
入卡內燔賊戰舟三十餘號民船約五十號自  
是賊所奪江西戰舟焚燒略盡僅餘夾洲內十  
餘船自湖口至姑塘四十里賊船肅清矣營官  
蕭捷三等欲肅清鄱湖以內遂乘勝追至姑塘  
以上揚帆內駛日暮不歸詎料該逆窺我小船  
衝入內河卽出小划二十餘號突出卡外圍我

軍快蟹大船是夜三更該逆復用小划三四十  
號攢入老營燒我船隻兩岸賊匪數千火箭噴  
筒迷離施放呼聲震天我軍以內河百餘小船  
未歸無以禦之被焚大戰船九號小者數號坐  
船三十餘號各勇狃於屢勝之餘變起倉卒快  
蟹長龍等船挂帆上駛李孟羣彭玉麟不能禁  
止次日悉回九江大營臣國藩聞信之下不勝

憤懣戰船焚失雖屬無多而百餘輕捷之船二千精銳之卒陷入鄱湖內河業被賊卡隔絕外江所存多笨重船隻運掉不靈實覺無以自立副將楊載福自攻破田鎮後卽在武穴養病因飛調來營十七日力疾往下游進勦行抵潯城十五里之張家洲賊船已分兩路上犯楊載福派哨官張榮貴陳金鏊等由新河下擊自率各

哨由老河下擊澄海營官何敦伍亦由老河隨  
勦鏖戰良久該逆敗退下竄追至老灣其快蟹  
船貼靠北岸陸賊護之不能奪取礮斃賊數十  
名張榮貴等自新河下者遇賊三板及小划約  
三十隻我軍九船勝之追至湖口縣繞出老河  
與楊載福會合兩路凡焚船二十六號奪船五  
號四更收隊自十二日夜水師失利後賊之兇

燄頓長梅家洲之賊夜夜往撲胡林翼羅澤南等營併力堅守得摧兇鋒湖口之賊渡江上犯紮營九江對岸之小池口二十一日臣等派副將周鳳山渡江擊之四更渡畢黎明開仗該逆猝不及防踏平賊營一座殺賊二百餘人江邊一支追出街外隄內一支因搶奪馬匹衣物爲賊所乘先勝後挫被追七八里之遙臣等酌商

以水師旣陷於內河陸軍復挫於小池口遂調  
胡林翼羅澤南二軍由湖口回顧九江二十五  
日駐紮南岸官牌峽是夜三更潯城與小口兩  
岸之賊各擡小划數十隻入江乘月黑迷漫攢  
入我軍船夾內火彈噴筒齊放右營被燒戰船  
一隻各哨慌亂挂帆上駛臣國藩坐三板船督  
禁黑夜不許開船江闊船多莫能禁止該逆已

用小划數十將臣坐船圍住臣國藩遂飭各戰  
船與羅澤南陸營緊相依護遣人四出追回上  
駛之船黎明陸續歸隊復將戰船追擊奪回三  
隻伏查水師自岳州以來屢獲大捷自至湖口  
苦戰經月破箠焚船費盡氣力賊舟所存無幾  
詎意各營長龍三板過於勇鷲衝入內河竟夜  
不歸而外江老營兩次爲該逆所偷襲實堪憤

恨皆 臣國藩訓練不素調度無方應請

旨飭部將 臣曾國藩嚴加議處

曾國藩塔齊布又奏言水師於十二日焚燒湖  
口卡內賊船乘勝衝入內河後蕭捷三等及各  
營長龍三板百二十餘號挂帆上駛行至大姑  
塘尙無賊蹤卽行宿泊十三日上至平峯見賊  
船民船共二百餘號突起擊之該逆抵死抗拒



我軍先燒其民船賊陣遂亂復焚其戰舟凡焚  
船二百餘號奪獲三十五號奪礮七十餘位十  
四日該逆以前夕所搶我軍之船冒爲官兵自  
湖口駛上襲我內河之師輔以小划百餘號時  
蕭捷三等已聞十二夜楚營被燒之信因約各  
哨寂靜以待逆船撲近衆礮齊發羣子噴飛該  
逆立刻敗下紛紛鳧水擊沈燒去小划三板共

五十餘號追至湖口見逆搭浮橋二道舊卡一道關鎖牢固勢難衝出收隊回泊大姑塘以上各營官以十三所搶民船恐其累重爲賊所乘至是盡數焚之十九日至吳城鎮探悉逆匪由彭澤湖口而來者約有數千人竊踞都昌縣城空濠據有大小船隻四百餘號二十六日水軍各營官熟商以都昌既有逆船竊踞儻我軍一

出仍復滋擾轉不能一律肅清不如趁此時燒盡因派定三板划船四十餘隻營官蕭捷三孫昌國段瑩圖賀虎臣鄧翼升親督之於二十七日五更開行並熟悉河路之翟秉懋前往指引是夜煙霧迷漫嚴戒各船不准放礮出其不意襲之已刻到都昌縣見逆船排於河面大小數百號該逆尙未驚覺各營蠶擁而前槍礮齊施

火毬火箭並發時值東南風頃刻間火光貫日  
將逆匪輕重船數百號燒燬淨盡擊死賊匪及  
撲水死者不計其數生擒五十一名卽時正法  
餘匪轟入縣城因無陸兵不敢上岸窮追師還  
路過雞公湖有小划船三百餘號各營官帶勇  
下水概行燒盡免爲賊有伏查水師自衝入內  
河口三獲全勝勞勩可嘉然冒險衝入與外江

水師相隔疏失實甚目下外江苦乏小船卽擬  
趕添民划內河水師飭令決戰衝出兩面會剿  
以期力破湖口一關奏入

上命軍機大臣傳諭曾國藩塔齊布陳啟邁曰此次我  
軍進剿梅家洲賊卡未能攻入小池口復先勝後挫  
是陸路尙未得手而水師銳氣過盛由湖口駛至姑  
塘以上長龍三板各船與外江師船隔絕雖四十里

之內賊船肅清但江艦板重小船不能相輔以致逆  
氛頓熾兩次被賊襲營辦理未爲得手曾國藩自出  
岳州以後均能與塔齊布等協力同心掃除羣醜此  
時偶有小挫尙於大局無損曾國藩自請嚴議之處  
著加恩寬免惟此時百餘輕捷之船二千精健之卒  
均在鄱湖內河中阻賊卡雖胡林翼羅澤南二軍業  
經調回九江亟應趕添民划以便運掉輕靈卽蕭捷

三等搜勦都昌之船亦須設法衝出俾內外會勦力  
破湖口一關方有把握陳啟邁前此派往協勦之佈  
克慎恩齡等兵勇本爲接應楚軍卽憚光宸吳錫光  
等亦應內防腹地外籌協勦豈能坐聽蕭捷三等懸  
軍深入不爲援應之理著陳啟邁嚴飭該帶兵官會  
合攻擊毋令稍有疏失曾國藩塔齊布並須步步爲  
營層層相顧不得任令兵勇輕率僨事不但外江與

內河聲勢必須聯絡卽陸軍與水營亦須互相依輔  
免生他變

上諭內閣曰曾國藩等水陸各軍自抵九江屢經獲勝  
該城逆匪猶敢負隅死守復於湖口設立水卡與陸  
賊互相抵拒著曾國藩等嚴督諸軍奮力攻勦務卽  
盡殲醜類克復城池



欽定勦平粵匪方略卷一百十九 乙卯年

中央民

正月二十六日 庚寅 僧格林沁奏言本月

日接奉

諭旨飭查勝保劣蹟並貽誤事機各節 臣接見幫辦軍務德勒克色楞撫 臣崇恩翼長常亮總兵孔廣順等及辦理糧臺天津道張起鵬詳加諮訪均無指摘之事應俟隨時查察儻有別項劣蹟再

當據實嚴叅惟該大臣既經拏問未便在營已  
傳

旨將勝保拏問飭令崇恩派委知府崇厚參將穆隆阿  
押解赴京聽候

諭旨並將

欽差大臣關防封固並神雀寶刀齎送軍機處呈繳  
該大臣所帶將弁何人出力兵勇何營可用 臣

素稔所帶川勇桀驁不馴交崇恩設法遣散其  
餘容俟詳加查訪至高唐賊勢臣周歷城垣雖  
不甚大而修築未久甚爲完固周圍濠溝三道  
亦均寬至數丈該逆占踞十月之久布置均極  
嚴密若竟輕易進攻不特該逆圍濠過寬未能  
直薄城下卽設法填濠逼近該逆憑高擊下我  
兵徒致損傷仍難克捷且李開芳係百戰之餘

狡詐異常數月以來深恃人少糧多負固自守  
臣悉心籌計必須誘其全股出巢再行痛剿或  
設法安伏內應使該逆內外受制方可得手總  
之此股賊匪雖不甚多而地勢可憑逆謀狡黠  
恐倉卒設計未必入我術中現存之兵疲羸過  
半似宜訓練蓄銳俟有可乘機會始能迅速蕩  
事奏入

上命軍機大臣傳諭僧格林沁曰高唐賊匪負隅固守  
總因將驕兵惰紀律不嚴以致數百小醜日久稽誅  
現在該大臣統領得勝官兵接辦軍務逆匪必已聞  
風膽落正可乘此聲威一鼓殲擒至申明約束整飭  
戎行尤爲行軍要務所有高唐軍營帶兵大員自德  
勒克色楞以下均歸僧格林沁節制儻各營將弁有  
不遵調度者卽著從嚴懲辦德勒克色楞與勝保共

辦一事日久無功亦屬咎有應得現既寬其既往仍命幫辦軍務尤當知感知懼力贖前愆儻再不知奮勉卽著嚴叅治罪該大臣務卽力破賊巢盡殲醜類並嚴杜分竄之路無令逃逸迅奏膚公以慰塵念

上諭內閣曰勝保剿辦高唐逆匪日久無功前經拔去花翎並降旨革職責令督率將弁迅圖克復原冀其感奮立功以贖前愆乃數月以來仍復遷延觀望以

致數百餘匪日久稽誅糜餉勞師厥罪甚重前經密  
諭僧格林沁傳旨將勝保拏問著卽解交刑部按律  
治罪現在僧格林沁已馳抵高唐卽督飭各路兵勇  
剋日進攻迅將此股餘匪悉數殲擒毋留餘孽所有  
高唐軍營領兵大員自德勒克色楞以下均歸僧格  
林沁節制

僧格林沁又奏言查此次軍營一二品大員以

下至於兵丁等均能奮勉侍郎瑞麟總兵慶祺  
副都統綿洵等協同臣辦理一切甚爲出力扎  
拉濟特貝勒拉木棍布扎布公棍楚克林沁均  
能勇往應如何獎勵之處出自

天恩奏入

上諭內閣曰侍郎瑞麟等自赴軍營以來襄辦一切異  
常出力甚爲勇往侍郎瑞麟總兵慶祺副都統綿洵



等均著加恩賞加都統銜瑞麟著賞給銜勇巴圖魯  
名號慶祺著賞給育勇巴圖魯名號綿洵著賞穿黃  
馬褂扎拉濟特貝勒拉木棍布扎布著賞加郡王銜  
賞戴三眼花翎公棍楚克林沁著賞戴雙眼花翎在  
乾清門行走

僧格林沁又奏言臣於連鎮歲事後飭令各營  
將遣撤兵丁沿途妥爲彈壓其帶赴高唐兵勇

亦卽趕緊前進商令西凌阿綿洵在後督催 臣  
卽於二十一日起程二十三日馳抵高唐踏看  
城垣形勢官兵營盤一俟西凌阿綿洵等督催  
兵勇到齊卽當設法攻剿奏入報

二十七日 辛卯 曾國藩塔齊布奏言上年十二月

二十九日 臣等以兩岸之賊偪處水師新挫恐

難自立商派李續賓蔣益澧等帶湘勇一千二百人從二套口渡江攻勦小池口之賊恐湘勇輾轉疲勞難以取勝羅澤南帶勇二百人渡江接應臣塔齊布自率親兵數十人渡江督之李續賓蔣益澧從內隄入逼近賊壘鏖戰一時殺賊十餘名前鋒衝入賊營忽賊隊從營外抄出一支蔣益澧左營卻退江邊之賊復出數千橫

集賢堂卷一百一十一  
二

截我師羅澤南從外隄往援將江邊賊隊衝退  
營內之賊愈出愈多李續賓等內隄一支且戰  
且退臣塔齊布恰至躍入督陣湘勇回戈擊賊  
殺賊目二人數次偪入賊壘以野曠賊衆該逆  
從遠處大圍包抄我軍衆寡莫敵後隊旗靡前  
隊亦不能按住陣腳臣塔齊布匹馬衝突羅澤  
南李續賓亦回馬力戰使悍賊不得窮追有黃

馬褂賊三人各帶十餘賊直奔臣塔齊布馬前  
羣矛攢搗臣塔齊布直前斫一黃馬褂賊落地  
而奪其馬又橫突而西二賊目皆落馬餘黨始  
靡而大隊賊自內隄出者尙窮追不止臣塔齊  
布念悍賊所以苦追者祇欲得一人而甘心也  
因揮令湘勇大隊沿江西馳而獨馳馬至北路  
鄉間自是賊衆不甚西追羅澤南率湘勇收隊

渡江餘賊北逐者 臣塔齊布復刺殺一二賊終  
不敢偪日暮始渡江歸營查 臣等陸軍在北則  
不能顧南岸在南則不能顧北岸南岸潯城圍  
攻正在喫緊而北岸小池口之賊相偪已甚不  
得已分渡南岸之兵擊北岸之賊士卒久勞隔  
江遠戰主客勢殊衆寡不敵致二十一二十九  
日兩次挫衄該逆自十六日由湖口分支來踞

小池口二十五日大隊復至二十六日分千餘人上竄龍坪武穴二十八日李孟羣礮船在武穴擊之又揮勇登岸力擊斃賊數十人餘衆敗回復於三十日引大股賊三千人沿江上竄初一日竄至武穴初二日至蘄州聲言直犯武漢至督臣楊需廣濟一軍臘月十二及二十四等日兩次敗衄聞二十九日又被該匪撲營兵勇

紛紛逃至蘄州一帶道路梗塞屢次差探未確  
不知督臣現駐何處黃梅廣濟股匪聞亦有四  
五千人上犯與沿江之賊會於蘄州一併西竄  
目今局勢臣等反覆籌思進退兩難現派李孟  
羣督帶礮船至黃州一帶跟追毋使上竄之賊  
擄船下水如果大股賊匪占踞武漢水師當全  
軍回剿陸兵亦當相機返顧進止機宜關繫極



大至餉項設措愈艱惟求我

皇上指授方略俾臣等得所遵循

曾國藩塔齊布又奏言正月初二日臣等飭李孟羣率三營戰船四十餘號回救武漢其大隊駐潯江者欲全回武漢則恐下游江面仍爲賊有欲堅扼潯江則恐上游船少不敷剿辦正在進退兩難之際忽於初四日東北風大作巨浪

排擊漂沈長龍三板二十二號擊壞十四號延  
至午刻又破壞七號其存者亦俱撞損漏裂桅  
折纜斷倉卒之間祇得將壞船委棄而令略好  
者七十餘號全數開赴上游直趨武漢名爲速  
剿上犯之賊實則修整已壞之船臣等辦理錯  
謬之處蓋有二端武漢當留重兵駐守並當留  
戰船數十號以爲後路聲援茲因江漢無戰舟

致該逆乘虛上竄其失一九江未破遽攻湖口  
冀通江西餉道弁勇冒昧輕進致輕舟百餘號  
陷入內河一軍分爲兩截外江無小舟內湖無  
大船頓形薄弱其失二至兩次被襲之後更遭  
大風壞船則又事機不順出於意料者也目前  
籌辦之法謹條列具奏一回救武漢之戰船前  
後共百號被風擊壞者多其完好可戰者約不

過四五十號漢口若被賊踞則修整船隻當在  
金口以上臣國藩並於沔陽之新隄地方設立  
船廠飛飭李孟羣彭玉麟等卽在鄂渚紮營在  
新隄整船可以固荆湘之門戶可以剷竄漢之  
新賊第離臣大營太遠各船口糧銀兩及修整  
破船之費添造三板之資概無所出應請

旨飭下湖廣總督湖南巡撫迅籌餉銀交李孟羣彭玉

麟水營應用一鄂省兵勇臬司胡林翼帶二千  
餘人經臣等奏調來潯會剿副將王國才帶三  
千餘人經督臣楊需飭令來潯都司石清吉帶  
千餘人經督臣飭令在富池口設防均在南岸  
臣等聞賊從江北上竄之信卽飛飭胡林翼石  
清吉先後回援武昌其王國才一軍俟江西供  
撥餉銀後探明鄂省確耗再定進止一水師陷

入內湖者皆三板長龍輕利之船不便宿食不能紮營本擬俟春水生時卽與外江水師併力攻出今外江船壞全回武漢則內湖須添造大船添募水勇各小舟有所依附乃能自成一軍回鄂省之師船有李孟羣彭玉麟經理陷內湖之師船無得力將領統之各勇聞老營被燒衣物全失如鳥失巢人無固志臣國藩擬親至吳

城等處統轄此項水師重加整頓或竟至江省  
一次將造船添勇事宜與撫臣陳啟邁面商妥  
協仍回大營一陸軍各營銳氣尙盛現在圍攻  
九江開挖地道人人踴躍用命若回軍武漢則  
雄心頓減銳氣消磨以後斷難復振且湖口九  
江之賊皆將內犯江西省城有礙大局臣等定  
計月內設法破城一俟內湖水師整理就緒仍

當鼓行東下直擣金陵該逆上竄武漢攻我之  
所必救也我軍下擣賊巢亦攻其所必救該逆  
縱復踞漢陽我軍亦不肯輾轉回顧聽其多方  
以誤我也臣等自誓有進無退區區愚忱實欲  
一雪積憤成敗利鈍皆不敢計

曾國藩塔齊布又奏言臣塔齊布陸軍自紫八  
里坡後日夜圍攻潯城逆匪堅匿不出我軍於



東城外潛開地道而令得力兵勇一百四十名帶同夫役二百名紮營其上別撥親兵百人往來巡哨本月初六日卯刻逆黨千餘人從大東門旁開洞門出城來犯逆首羅大綱從小池口率悍賊二千餘渡江助戰一撲開挖地道之營一撲副將王國才之營我軍之挖地道者逆料賊必來犯密排槍礮以待賊至待其撲近營邊

槍礮齊發轟斃帶隊之黃馬褂賊目一名及隨賊數名餘賊仍抵死不退臣塔齊布帶勇馳往應援衝殺十餘賊追至大東門逆黨半由洞門入城半卽縋城而上被官軍槍斃刺斃無數城上礮子如雨我軍傷亡十餘人遂繞城追至沿江一帶賊之分撲王國才營盤者共分三路該營連環開礮賊不敢偏逆黨遂以全力移撲周

祿等營盤王國才飭都司畢金科帶勇五百人  
從後門潛出抄周祿營盤之左猝衝賊隊殺斃  
十餘人逆衆披靡適各營援兵亦至橫截之該  
逆腹背受敵狂奔不止我軍沿途追殺適臣塔  
齊布亦從東門繞出併力追剿逆黨爭舟回渡  
擁擠翻沈我軍奮追爲城上槍礮所格午刻收  
隊計殲斃逆匪共二百餘名生擒二十一名查

羅大綱兇悍詭譎因官軍堅扼潯城急欲來撲  
經此次敗挫我軍銳氣愈振日內仍當併力攻  
勦以殄兇鋒奏入

上命軍機大臣傳諭曾國藩塔齊布陳啟邁曰曾國藩  
塔齊布奏稱辦理錯誤之處如水師衝入內河以致  
聲勢隔絕誠不免銳進貪功至武漢收復後未留後  
路聲援其勢本有不及水陸兩軍全數進勦猶恐兵

力單弱若彼時卽分防武漢兵數愈少刻下更不知如何棘手以現在情形而論上竄漢口之賊現有楊需督軍江北李孟羣等師船亦已駛抵武昌統計楊需收集及續調之漢川官兵沔陽等處練勇不下六七千名李孟羣戰船可用者亦尙有四五十號胡林翼等回援之兵復有三千餘名儘可相機夾擊曾國藩等既定直擣金陵之計卽著迅速設法攻克九江

合軍東下毋得再存顧慮該侍郎等營中糧餉軍資  
上賴湖南下賴江西接濟此時若輕舍九江回顧武  
漢不但江西之賊全行竄出卽漢口之賊亦必愈徧  
愈上兩路餉道皆梗孤軍尤屬可虞自以力攻九江  
爲扼要之策蕭捷三等衝入內河之船雖屢經獲勝  
而輕舟散泊不能成軍殊非勝算亟應設法接應出  
湖以爲陸軍犄角外江大船現旣全令上駛添船添

勇自係緊要機宜但製造尙需時日而陸軍銳氣正  
盛覽所奏塔齊布獨當賊隊情形亦屬過於冒險曾  
國藩旣擬親至吳城卽著一面與陳啟邁商酌製船  
事宜一面諄囑塔齊布加意慎重總須內河師船駛  
回與城外陸軍會合進攻方有把握曾國藩抵吳城  
後能將前項船隻卽行帶出固爲應手若一時未能  
全數出湖亦須察看軍情仍回大營免致與塔齊布

內外睽隔居隆阿憚光宸恩齡等現攻九江趙如勝  
吳錫光等現攻都昌亦係內外分辦總宜速籌會合  
攻破湖口賊卡以通援應之路李孟羣彭玉麟等武  
昌水營需用糧餉鉛藥及修整船隻經費著楊需迅  
籌接濟並知會駱秉章一體籌款撥解楊需自抵德  
安後未據續有奏報現由何路進剿漢鎮續調兵勇  
已到若干荊州官兵是否卽能下擊均著迅速奏聞



該督節節退守已屬咎無可辭若再株守德安致逆賊負嵎久踞試問能當此重咎否耶

二十八日壬辰荆州將軍官文副都統載增貴陞

奏言據襄陽道羅遵殿稟稱督臣楊需移紮德

安賊由漢鎮分股至襄河搶船意圖上竄又據

沔陽潛江天門等州縣探稟正月十四日賊匪

由漢川沿襄河陸路至沔陽州屬之仙桃鎮放

火擄殺勢甚猖獗該州知州蕭蔭恩已親督紳士等各帶團勇分道前進會合攻剿獲勝各等情查仙桃鎮乃荆襄門戶上年收復不易今復爲賊肆擾自應先其所急速爲進剿臣等已派江陵在籍同知林天直等帶團勇千名協助蕭蔭恩往剿並派把總田達三等帶團勇三千名佐領錫齡阿等帶滿兵四百名前往應援復札

催沔陽潛江天門及荊屬之石首監利等處集  
團會剿奏入

上命軍機大臣傳諭官文楊霈曰前因逆賊回竄漢口  
楊霈退駐德安疊經諭令官文酌派精兵速往會剿  
並將能否親往之處速籌馳奏茲閱所奏情形該逆  
現已竄入襄河擾及沔陽是其意圖上竄仍係上年  
故智惟究係分股抑或全數西竄摺內未經聲敘官

文所派兵勇既須先勦仙桃鎮卽不能遽抵德安徑  
攻漢鎮楊需前調之陝西宜昌官兵皆近在漢川自  
應早已到營何以自正月十一日發報後至今竟無  
續報此股回竄逆匪雖不盡由北岸而來究其所以  
得入楚境之由實因廣濟一軍不能堵禦所致此次  
上竄沔陽又從漢川闖入襄河該督豈竟毫無聞見  
現在無論該逆全股分股楊需總不能株守德安待

援鄰境儻該逆悉數奔突襄河楊需卽應督兵上勦  
儻漢鎮尙有大股盤踞楊需卽應趕緊進攻使賊不  
得上窺荆襄旁犯武昌若竟一籌莫展徒以扼賊北  
竄爲名獨不思沿襄河而上安陸荆門處處皆可上  
竄耶官文所派兵勇不下四千餘名如仙桃鎮賊匪  
擊退亟應沿河東下若因荆州緊要卽於載增貴陞  
二人中酌派一人帶兵前往該將軍能親自督兵進

勦更足以壯聲威

上又命軍機大臣傳諭英桂曰漢鎮逆匪分股至襄河  
搶船意圖上竄是豫省西路各要隘防堵最關緊要  
英桂前奏已於信陽州三關等處層層設備光商一  
帶責成邱聯恩嚴密防堵現在西路情形喫緊著英  
桂妥爲布置嚴防逆匪乘虛北竄所有添兵募勇各  
事宜務須確探賊蹤體察事機迅速籌辦

二十九日巳癸楊需奏言據探報十三四等日賊

匪二千餘人由漢鎮分竄漢川之麥旺嘴擄搶  
船隻經沔陽州鄉勇截擊篙工水手亦奮勇協  
勦殲斃賊匪數百名餘匪窮蹙仍思折回漢鎮  
合股復經漢陽縣鄉團攔截殲斃二三百名該  
逆僅賸四五百人奔至距蔡店二十里之侏儒  
山又經各處鄉團甚勇擊殺多名未能竄出等

情且連日探得漢陽漢口賊匪不過六七千人  
既未搶有船隻復因各處俱有團練不能擴脅  
多人勢成孤立攻剿似易得手昨接道員李孟  
羣稟稱督率礮船已抵省城協防並稱副將王  
國才臬司胡林翼督帶陸路兵勇知府彭玉麟  
督率水勇指日均可抵省 臣現飭劉富成招集  
京山勇四千餘名陸續來德陝甘兵一千一百



餘名已於十七日趕到 臣原帶督撫兩標各營  
兵勇雖尙有四千餘名但屢經挫敗臨敵恐難  
深恃京山陝甘兩路兵勇均係生力精銳可期  
得力 臣兼派漢陽府知府栗燿漢陽營遊擊玉  
山等帶兵千名前赴孝感督同該縣團勇及職  
員李玉田之勇由孝感一路進攻一俟南岸王  
國才等到齊卽飭劉富成督帶京山練勇由蔡

通鑑綱目卷之四十一  
三十一  
店一路攻勦陝甘新到之兵卽爲接應 臣親督  
後隊相機調度並飛咨官文趕緊撥兵順流下  
勦務期掃清漢陽漢鎮賊氛以冀上慰

宸廬奏八

上命軍機大臣傳諭官文楊霈曰昨據官文等奏漢鎮  
逆匪突入襄河擾及沔陽本日楊霈奏稱賊由漢鎮  
分竄漢川之麥旺嘴經沔陽鄉勇截擊仍思折回漢

鎮復經鄉團殲斃多名僅贖四五百人奔至侏儒山  
未能竄出等語與該將軍所奏情形不同若如該督  
所奏是襄河一帶賊勢尙不十分喫緊然仙桃鎮已  
被焚擄所稱僅四五百人尙恐未確官文已派兵勇  
前往勦辦自應飛飭各員確探賊蹤迎頭截擊漢陽  
漢口賊匪不過六七千人並未搶有船隻李孟羣礮  
船已抵省城王國才胡林翼陸路兵勇彭玉麟水勇

指日均可抵省軍威自壯但李孟羣等亦斷無株守  
省垣之理漢口賊匪尙多攻勦漢口卽以保護武昌  
況有胡林翼玉山劉富成等陸路兵勇接應水師亦  
不爲孤著楊霈飭令各該員等先勦漢鎮以掃賊巢  
至襄河一帶師船能否駛入該逆竄擾仙桃鎮業經  
官文酌派滿洲兵四百名並調團勇四千名協同沔  
陽州知州蕭蔭恩力圖攻勦如果賊勢猖獗兵力尙

單楊霈仍須飭令李孟羣等水軍設法追勦並能否  
添派陸軍策應之處相機酌辦務將上竄之匪盡數  
殲除官文奉到昨降諭旨是否親自帶兵前進諒該  
將軍必能斟酌盡善妥爲籌辦也

大正	...
...	...

欽定勦平粵匪方略卷一百二十 乙卯年

中央民  
學院圖書

二月初一日 甲午 官文載增貴陞奏言賊

匪據

襄河之仙桃鎮後 臣官文本應督兵進勦惟日

來盤獲奸細皆供賊由廣濟竄至漢口賊目羅

大綱遣來偵探意圖竄擾荆襄等語是賊匪窺

伺荆襄正切 臣官文若帶兵遠出恐人心動搖

所關非細公同籌商由 臣貴陞統帶協領依西

布選擇滿營官兵八百餘員名於正月二十二  
二十四二十六等日分起啟行至潛江渡襄河  
由北岸天門取道進擊 臣載增已派兵豫備策  
應 臣官文自當相機調度前派佐領錫齡阿同  
知林天直之軍已由襄河以南分路前進卽可  
與貴陞一軍互相策應奏入

上諭曰汝未便遠離荊州自屬實情惟貴陞能否得力



殊深懸繫

同日陶恩培奏言臣因武昌省城陸兵未到有水師可恃於十二日飭令李孟羣督派礮船八隻隨同彭玉麟礮船四十餘隻進襄河焚勦用長龍快蟹從中流奮擊彭玉麟親駕三板船身先士卒直入河口奪燒賊船三隻搶回賊船三隻十六日復派長龍三板礮船四十餘隻自上

游池邈而下適漢陽城外逆衆堆運木箠見我  
軍至開礮迎敵我軍以長龍大礮轟擊賊不能  
支敗遁回巢計共燒賊船十餘隻木箠十餘座  
拆壞賊礮臺七座斃賊約百餘名本可乘勝速  
勦奈陸路無兵徒深焦急刻下所調宜昌兵一  
千名已到六百名遊擊石清吉帶兵千餘名臬  
司胡林翼帶勇二千名均於十六十八等日抵

省紮營城外卽當飭令約期會合礮船水陸夾  
攻冀殲羣醜奏入

上諭曰汝旣知以戰爲守豈能聚集多兵株守武昌逆  
匪現已分股上竄更應追剿

初二日乙未和春福濟奏言正月初八日五鼓官

兵直抵廬州城下分攻各門南門出賊七八百  
人卽飭吉順鄭魁士嵩瑞普慶帶兵奮擊適得

勝門又出賊匪二千餘人意在抄我軍後路經  
常清等分途擊殺吉順等由南門趕至三面攻  
勦斃賊不計其數二十二日三更後挑選兵勇  
三百餘名攜帶引火器具乘槍礮對擊之際暗  
置雲梯由西門直上將及登城爲該逆所覺火  
包火罐紛紛下擲連傷兵丁數名湖南兵由北  
門緣梯而上亦被驚覺多有受傷未能登城昨

准秦定三來函正月初六日督同音德布等分  
攻各門適北門六安各出賊千餘名前來救應  
我軍會合夾攻追至城下約斃賊匪六七百名  
又准忠泰咨開正月初十日攻取巢城派協領  
富呢雅翰都司珠蘭泰等帶領兵勇分攻各門  
該副都統與李文安李鴻章督同知縣邵啟元  
等赴各路策應東西北三門各出賊千餘名我

軍分途迎勦西門賊匪敗至城外街內有小港阻攔我軍不能過河李鴻章飭令兵勇填河而過珠蘭泰等一擁而進立將街內賊巢全行燒燬約斃賊匪二百餘名十四日夜率領官兵攜帶攻城器具計圖襲取未能得手惟東門外高岡逆匪新築土城三座聚賊甚多防守極嚴伊林布揮令兵勇盡力攻擊適李鴻章等一齊趕

到三路抄擊將土城三座踏平各等因前來此  
連日各路攻勦之情形也奏入

上諭曰覽奏不過小有斬獲汝等每次奏摺率云斃賊  
數百或不計其數若果盡屬從實何以愈殺愈衆每  
至攻城必爲所覺傷亡想亦不少雖逆燄臨張何官  
兵無能之至瑣瑣贅言全屬搪塞和春福濟督師皖  
境一載有餘遲延委靡之罪百喙難辭朕尙不處治

汝等原望奮勉圖功以贖前愆若仍恃奏章爲敷衍則罪由自取朕惟知以軍法從事勿謂言之不先也

初三日

丙申

向榮奏言查紅單等船本皆堅利但

得水長風猛卽可斷練而上現已修船準備剋

日進扼上游昨聞楚師尙在九江相持安慶一

帶賊蹤往來不絕池太徽甯沿江處所窺竄滋

虞浙江撫

臣

何桂清與

臣

往返函商於甯國灣



沘廣德徽州要衝處所各已添兵防堵其東壩  
一路亦已咨商江蘇撫臣吉爾杭阿添派壯勇  
一千名前往駐紮與黃池聲勢聯絡蕪湖之賊  
自鄧紹良兩次截勦未敢內犯專俟水師攻上  
太平則陸軍即可直出會勦昨接托明阿鈔咨  
以瓜州之賊分股擾掠儀徵六合兵力皆單商  
撥官兵協勦臣卽飛咨江蘇督撫臣迅爲抽助

纂要國方略卷二百三十一  
一  
一軍瓜鎮之賊兩相救援必須師船奪據金山  
方能斷賊水面接應已函商吉爾杭阿可否前  
往鎮江督剿抑或速來金陵暫行代統大軍俾  
臣赴鎮親督余萬清力籌克復先破鎮江則瓜  
州便易廓清奏入

上諭曰覽奏俱悉吉爾杭阿已有旨幫辦軍務自可督  
師迅克鎮江汝仍在金陵扼賊旁竄一面嚴飭吳全

美等速行斬練上駛以期水陸合擊上游師船已回  
武昌俟回竄楚北之賊勦滅淨盡方能再下九江潯  
郡安慶克復方能直擣金陵現在事機不順惟冀汝  
等協力和衷無論江鎮兩城先克一處庶幾漸有握  
勝之機也

同日駱秉章奏言自田家鎮半壁山水陸大勝  
後九江府城原可乘機克復因北岸廣濟黃梅

賊勢尙熾塔齊布羅澤南率諸軍盡銳攻勦始克兩城賊以其暇得嚴密布置比塔齊布等同軍渡江則九江已屹然堅城難以遽下矣曾國藩偵湖口以內賊船甚多慮其出江爲害卽分軍勦之是時黃梅復陷九江對岸小池口一帶復有賊蹤曾國藩水師無陸軍夾護而三板戰船又已盡入湖口冬令水枯急切不復得出以

致有十二月二十五日劫營之挫督臣楊需駐  
軍廣濟賊至卽潰正月初三日退至黃州初五  
日退至漢口其出也盡率兵勇萬餘以行武昌  
省會重地僅留逃潰疲弱之兵數百飭藩司夏  
廷樾等居守撫臣陶恩培到任甫數月一切未  
及布置當督臣退至漢口時賊匪於初七日尾  
追而至民人扶老挈幼號泣奔走情形極爲慘

痛而督 臣 又不知退駐何處矣頃據平江縣稟  
稱賊匪大股均聚興國州其爲犯鄂無疑鄂城  
餉竭兵單勢甚危急督 臣 所帶兵勇多已潰散  
曾國藩塔齊布糧臺坐船多被燒燬軍實蕩然  
勢難驟振 臣 維湖北湖南唇齒相依自去秋以  
來本省南路防勦兩粵之賊無日不事戒嚴搜  
除腹地之匪一時尙未就緒茲復值北路警報

沓至時勢更非上年可比現一面抽調南路兵  
勇赴省並飭局趕造船礮一面飭北界各府縣  
督飭鄉團添募壯勇爲援剿之計一俟諸務稍  
集卽當相機辦理奏入

上諭曰所造礮船仍應接濟曾國藩是爲至要

同日英桂奏言據南汝光道邊浴禮稟報逆匪  
在漢鎮搭浮橋正月十三日分股由蔡店竄至

漢川曾國藩等隨營礮船已抵塘角十四日卽  
將浮橋轟斷襄河一帶亦有兵勇馳至又據署  
光州知州周浩稟稱賊匪現有後隊在團風鎮  
屯聚與光山商城毗連各該處隘口均已設防  
各等情查豫省南路所調兵勇陸續到防如信  
陽之三關羅山之大勝九里等關光山之新店  
虎頭關均已設備嚴密巡防其皖豫接壤之區



亦已妥籌戒備派赴正陽關兵勇業經到防南  
陽鎮臣邱聯恩現駐光州於皖楚邊境各處亦  
可隨時策應奏入

上命軍機大臣傳諭英桂曰楚省軍情據該撫奏報與  
楊震所奏大致尙同竄擾仙桃鎮之賊是否已被荆  
州兵勇擊退亦未據楚省奏報著英桂一面嚴防信  
陽等處一面確切探明隨時具奏

初六日己亥僧格林沁德勒克色楞西凌阿奏言

伏思高唐逆匪爲數無多嬰城死守牽掣重兵  
糜餉老師尤覺可惜該逆踞守十月之久堅匿  
不出自臣移營以來該逆逐夜出巢探路冀圖  
逃竄正月二十九夜間密令南面站牆官兵分  
開隊伍停止更籌故作疏防之勢設該逆潰出  
俟其離濠漸遠再行截擊予刻該逆果然撲出

見此段毫無官兵全股直往南竄臣等督帶馬  
隊五百餘名銜尾緊追該逆拌死狂奔至距高  
唐五十餘里之荏平縣屬馮官屯八村踞守該  
處三村相連周圍挑有深濠當卽催調後隊馬  
步官兵義勇於初一日辰刻趕到由西面撲入  
村中一面救護該村男婦一面用火焚攻痛加  
殲勦立將西面二村奪回斃匪二百餘名生擒

集賢堂大略卷一百二十一  
十一  
十餘名據供逆衆八百餘名欲向濟甯奔竄官  
兵擊殺甚多僅贖五百餘名等語現已將大礮  
運到向內轟擊以期殄滅無遺頭等侍衛達崇  
阿吉林協領委營總豐山委參領豐玉同時陣  
亡均請照例

賜卹以慰忠魂

同日崇恩奏言勝保所募川楚直隸河南江南

等省練勇共計五千餘名僧格林沁到後卽派直隸天津道張起鵬刑部主事楊熙來營與臣商辦裁撤以節經費該勇等跋涉遠歸途中若無盤費恐滋事端擬將此項練勇一體給予路費計其道途遠近覈定數目由東省糧臺按名分給仍令剋日起程俟到籍後交該管地方官遣散歸農均奏入

上命軍機大臣傳諭僧格林沁德勒克色楞西凌阿崇  
恩曰高唐收復逆賊竄馮官屯大兵四面合圍諒不  
至再有竄逸現在大礮已經運到卽應盡力轟擊村  
莊設備雖嚴究不能如城池之堅固在城則利其竄  
出以便跟追在村則必須兜圍以防奔突務宜於奮  
勇之中加以慎重儻任其旁竄他處或因守村莊則  
又蹈從前故轍諒該大臣等早有成算不令釜魚檻

獸日久稽誅也崇恩奏資遣裁撤練勇著卽照所擬  
妥爲籌辦刑部主事楊熙本由四川帶勇前來現在  
裁撤川勇需人彈壓著崇恩詳加察看如該員尙能  
約束卽飭令管帶回籍毋令沿途滋事儻此外尙有  
帶勇之員無須該員管帶卽飭回京當差

上諭內閣曰僧格林沁等設法誘賊出巢收復高唐州  
城逆匪南竄現被痛勦僅餘五百餘名蟻聚馮官屯

集賢堂 卷一百二十一  
三  
村莊東南一隅抵死抗拒該大臣等務當激勵兵勇  
晝夜環攻立將醜類盡殲及早蒞事以慰朕望其陣  
亡之頭等待衛達崇阿吉林協領委營總豐山委參  
領豐玉均著交部照例議卹

崇恩又奏言正月二十九日三更後僧格林沁  
計誘逆賊出巢南竄大兵追至距高唐城五十  
里之馮官屯該逆踞村抵拒臣當於是夜派參



將玉山等帶勇隊四百名隨同追勦一面飛檄  
荏平附近之長清東阿聊城並南路各州縣一  
體嚴防臣一面督同文武選帶弁兵由高唐東  
門馳入城內殘孽僅十餘人搜戮淨盡被害之  
該州知州魏文翰屍身於枯井內撈獲妥爲棺  
殮飭該家屬收領衙署倉庫監獄廟宇及居民  
鋪戶房屋均被燒燬難民轉徙流離哀號徧野

亟應妥爲撫恤當派文武各員分赴城鄉招集  
流亡確查戶口動支官紳捐輸粟穀以資賑濟  
臣於布置後卽馳抵馮官屯僧格林沁軍營晤  
商一切以期早就廓清奏入報

聞

初八日 辛丑 江甯布政使文煜奏言正月二十日

大股賊匪數千人由沙頭港對岸蠡擁而來伐

樹毀房紮竄渡我勇疊開大礮轟斃多人始  
行退走該逆又分股至南江錢家灣深港口等  
處分路竄襲到處涉水夜渡委員張士楷等併  
力攻擊時值昏黑該逆匿伏對岸田隄下抵死  
不退黎明又復大股衝突南江口又突至數千  
人沿隄奔竄適托明阿等調撥參將英貴帶大  
同兵勇六百名前來協防卽經英貴斃賊數十

名乘勝追至連城洲賊始竄回瓜州自二十日起至二十三日歷三晝夜先後擊斃賊匪六七百人我勇陣亡受傷者僅十餘人查沙頭距瓜州東十四里中隔虹橋新橋及連城佛感兩洲該處爲裏下河最要門戶過此則沿江八十一洲四通八達防守極爲喫重該逆雖受創退回而賊情叵測難保不去而復來 臣仍督飭該弁

勇等嚴密巡防聯絡鄉團以杜竄擾此次堵剿  
尤爲出力員弁可否量予鼓勵之處出自

天恩奏入

上命軍機大臣傳諭托明阿陳金綬雷以誠文煜曰瓜  
州逆匪屢次攻撲沙頭營盤雖經兵勇擊退而該處  
爲裏下河最要門戶文煜所帶之勇爲數無多托明  
阿統領全軍蕞爾瓜州日久未能克復若再令該逆

紛紛旁竄致完善之地復遭蹂躪勦辦更形棘手所  
有沙頭等處各路要隘著該大臣等嚴密布置如有  
東竄匪黨卽行水陸夾擊以杜紛擾薩炳阿現帶兵  
二千名馳赴瓜州軍營托明阿等得此援應足資分  
撥仍一面迅圖克復瓜州毋再遷延貽患

十一日甲辰僧格林沁德勒克色楞西凌阿奏言

逆匪竄至荏平縣屬馮官屯地方拚死抵拒連

日臣等激勵兵勇奮力圍攻該逆沿牆掘地犬  
伏以避槍礮賊情固結毫無疏懈兼之村外有  
深濠圍繞進攻尙未得手臣於攻克連鎮後搜  
獲湖南人劉自明一名供係僞官向在賊中掘  
挖地道轟陷城垣已將該犯帶赴軍營現與商  
酌地攻之法是否可行尙難豫定一面布置濠  
壘一俟該逆防守稍懈卽督兵勇進攻奏入

上命軍機大臣傳諭僧格林沁德勒克色楞西凌阿崇  
恩曰僧格林沁等奏連日勦賊情形一摺賊匪現踞  
馮官屯沿牆掘地以避槍礮攻勦尙未得手該逆屢  
被痛勦所賸狡悍之賊諒已無多仍當激勵兵勇設  
法速攻以期及早蕝事尤須加意慎重勿致窮兇乘  
閒竄突復擾他處湖南人劉自明所獻地攻之法未  
免曠日持久且該犯曾爲賊僞官是否可恃著該大



臣確加體察勿墮奸計

同日袁甲三奏言查江北防勦分東西中北四  
路北路以臨淮爲最要而正陽次之現在 臣親  
自統兵駐守臨淮牛鑑移兵駐守正陽亦歸 臣  
調遣萬一有警迎頭截擊總可奮力決戰是北  
路較爲嚴密堪以上慰

宸廬至廬州爲中路攻舒攻巢兩軍現雖屢挫逆鋒第

巢縣爲巢湖門戶舒城爲安廬桐往來要路皆賊必爭之地卽使兩城皆克攻戰之兵必將留守不能撤回廬州助勦和春福濟兵力不厚旣不敢不於西北之衝聯營以防鼠撲則東南一面勢難兼顧欲絕賊援而賊之往來自若欲斷賊糧而賊之饋運自若此中路之難以蕺事也西路毗連楚省今自漢口以下黃州蘄水蘄州

廣濟黃梅無處非賊宿松太潛等邑爲皖之要  
衝賊必橫互其閒併力拒守非若上年之有懈  
可乘也已革道員何桂珍僅帶兵一百名招勇  
數百名前往楚北道路中梗不能徑會楚師亦  
不能另謀攻取王庭蘭現集兵勇數百名進駐  
六安以之防隘則可以之勦賊則不可此西路  
之難以葢事也東路沿江西梁山鍼魚嘴一帶

賊壘多寡不一賊船亦聚散無常下游浦口賊設攔練之處江窄水淺南岸下關賊設礮臺十數處北岸九泐洲又新築礮臺望樓兩岸停泊賊船守護甚嚴張光第劉玉豹等分駐烏衣官渡相機進取而水師不能夾擊官軍一去賊又復來若欲徑取和州其地距西梁山六十里距鍼魚嘴十里賊援麴集未便久與相持卽使一

攻而克非有重兵扼守難保不再蹈廬江覆轍  
此東路之難以蒞事也刻下楚省情形臣未能  
深知然賊旣力爭江路希圖牽掣楚師其驍悍  
賊黨必悉聚於上游則廬州機會大有可乘現  
在連鎮克復移兵高唐一經蕩平便可抽出數  
萬勁旅應如何分軍南來急謀克復廬州之處  
伏乞

聖明乾斷迅賜施行

袁甲三又奏言臣營所用槍礮至重不過二百餘斤今統計自三百餘斤以至三千斤礮位共三十餘尊皆係先後勦匪所得私造之多可知查私鑄槍礮例禁極嚴地方官自顧考成不無規避情事此時變通之法似宜責令各地方官認真查禁一經拏獲卽遵照定例將匠役人等

分別治罪所有失察處分概予寬免庶各州縣無所回護得以隨時清理又廬鳳潁所屬向多產硝之地奸民販私接濟逆匪爲患匪淺其已獲各案均經 臣按律究辦並請由撫 臣通飭各州縣嚴定章程隨時查拏如在本境自行拏獲免其失察處分如被鄰境拏獲仍將該管官照例議處以示懲儆

雙溪集卷之三十一  
三十一  
袁甲三又奏言 臣前請以署宿州知州郭世亨  
開缺留於永宿蒙亳一帶並以王啟秀接署宿  
州知州奉

旨著再與和春福濟等妥商查此案 臣因綏靖地方需  
員甚急是以一面具奏一面鈔稿知會福濟等  
嗣據覆函深以爲然並稱先得我心實深感激  
等語此次接奉



硃批復恭錄行知並加函商旋准和春福濟函覆極稱  
臣因公起見整頓地方之苦衷知府陸希湜不  
能久出在外必須添派幹員惟

聖意旣不肯更易熟手不若將現隨臣營之知府張家  
駒駐紮穎亳如臣別有所見卽請單銜具奏等  
語是和春等於臣前奏仍未稍有異議且陸希  
湜本任所屬太和阜陽霍邱穎上均偏近楚豫

集賢堂 卷之二 三二  
界連六安正陽處處均須防禦誠如福濟等所  
云勢難久出在外至張家駒委駐潁亳原可期  
其得力惟臣營委員本少若張家駒再駐該處  
則臣營遇有緊要事件實在無可差遣此次和  
春等所見既與臣並無不合其擬改委張家駒  
之處係於臣營乏員差委情形尙未深知可否  
再懇

天恩准將升用知府現署宿州知州郭世亨開缺以知  
府補用留於蒙亳宿永一帶勦辦賊匪並准以  
王啟秀接署宿州知州以資臂助奏入

上命軍機大臣傳諭和春福濟袁甲三日皖省軍情自  
以急籌攻克廬城爲要現當連鎮蕩平北路勁兵原  
可酌量抽撥但廬州郡城自前年失守後已越年餘  
和春福濟所統官兵數踰巨萬豈不能四面環攻迅

圖克復且連鎮官兵本無數萬之衆即使撥往安徽  
尙不能如和春等現帶官兵之多安得有如袁甲三  
所請之數耶該提督等惟當就現有兵力迅速籌攻  
不准再事遲延以添兵爲藉口袁甲三旣駐臨淮皖  
省東北兩路有可進取之機亦宜隨時籌勦至郭世  
亨王啟秀二員前據袁甲三奏請將該員等分別開  
缺調署朕所以批令與和春福濟妥商者原以調署

牧令必須與督撫會銜並非不准袁甲三與聞舉劾  
乃閱另摺覆奏祇稱往返函商仍未聯銜具奏袁甲  
三著傳旨申飭仍著福濟會同和春袁甲三詳細酌  
度如郭世亨於潁亳地方辦理實在得力卽將該員  
奏補實缺知府亦無不可其宿州知州應否卽以王  
啟秀接署亦著一併會奏至私鑄槍礮販買私硝如  
何稽查如何拏禁總在地方官實力辦理如果於此

等私鑄私販匪徒拏獲較多不但寬其處分並可酌量請獎若先將處分寬免是豫開一寬縱之條於緝捕轉無實際著和春福濟袁甲三嚴飭地方文武員弁認真緝拏以杜奸萌無庸另立章程

十二日乙巳楊需奏言據漢川縣知縣盧慎徽稟

稱正月二十九日督率鄉勇會同李玉田於黑夜分攻漢川西北二門擒斬百餘名拆毀縣河

浮橋一座餘匪星散多向南岸竄赴下游亦有  
竄往上游者又據何桂珍及蘄水縣知縣劉棨  
稟稱分帶兵勇於正月十九日進攻戰於東南  
兩門外殺賊二百四十餘名賊由西門逃竄乘  
勝追逐二十餘里當卽搜捕餘匪安撫居民各  
等語昨又有另股賊匪竄至岳家口地方意欲  
上竄牽掣北路之兵使荆襄兵勇不能遽集漢

口現劉富成等兵勇已至蔡店進徧漢陽與胡  
林翼李孟羣等水陸夾擊漢陽漢口之賊勢難  
久踞漢川旣經克復上竄岳口之賊亦與漢口  
之賊隔絕不通 臣 一面飛催李錦燮貴陞等軍  
一面另派都司葛以敦巡檢蔣立松各帶勇千  
名由天門至岳口繞出賊前迎頭下擊如賊匪  
悉衆上竄卽當親督後隊馳赴天門安陸一帶



截勦以遏其竄犯荆襄之路若賊衆尙聚漢口  
卽由楊店一路前往併力進攻

同日陶恩培奏言連日探得東路逆賊由廣濟  
竄至興國州通山縣一帶四路勾結土匪大肆  
殺掠省垣愈加喫緊實無兵勇可分前往迎擊  
督臣楊霈自廣濟一路退走後探聞現駐德安  
距漢鎮二百餘里竟無一兵一卒援救所有會

經征戰之將弁均皆隨督 臣 赴德省中文武寥  
寥不敷差遣以至督隊打仗僅有胡林翼常恩  
二文員若使東路逆賊徑撲省垣則前後受敵  
勢更可危應請

天恩速派得力提鎮一二員帶領重兵星夜救援

陶恩培又奏言 臣 抵武昌不及十日賊已大至  
存城兵勇不滿二千戶口逃亡軍裝餉項接濟

維艱文報往來道途多阻臬司胡林翼聞警回  
軍帶勇僅及二千渡江擊賊利鈍尙難逆睹石  
清吉之兵勇千餘尤恐難期得力新調宜昌兵  
一千名中途已散去四百名聞風尙且潰散臨  
陣何能勇往此鄂省萬分危急之情形也探報  
九江湖口之賊畏塔齊布之威名堅匿不出於  
江岸偷渡以圖上犯九江湖口轉無多賊九江

皇朝通志卷之二十一  
三十一  
與武昌府毗連師行不過十二日可到與其徵  
調不能戰之兵而終歸潰散不如以南軍回剿  
可望迅就蕩平惟有仰懇

天恩迅飭塔齊布酌留勁兵一支會同江右全省兵勇  
攻剿九江以牽賊勢塔齊布親帶精兵由興國  
州回鄂往返一月有餘江漢可清後路無警實  
於大局有裨至水師在九江挫敗又復遭風折

損名爲上援江漢實則急資修整東征之利器  
全賴水師長江千餘里僅恃此百十殘破之礮  
船江面何由肅清應於湖南北設局造船鑄礮  
並於湖南添募水勇庶可期其得力刻下賊船  
上犯江漢江西之南昌吳城並無一賊卽謂添  
船募勇須與江西會商乃去已成之兵勇待未  
來之船礮計亦良左且屢經戰陣得力之將如

李孟羣彭玉麟等盡數上駛竊恐軍無統帥呼  
應不靈應請

旨迅飭侍郎曾國藩回軍江漢急整水師則東征大局  
尙可挽回均奏入

上命軍機大臣傳諭楊霈曾國藩塔齊布陶恩培曰詳  
覽楊霈所奏漢川旣經克復上竄岳口之賊與漢口  
之賊隔絕不通該督駐紮德安原爲防賊北竄而陶

恩培奏稱逆賊勾結與省城聲息隔絕此時總當迅  
速克復漢陽漢口爲保守武昌之計該督由北路節  
節進攻距漢鎮僅二百餘里分兵兼顧武昌較之曾  
國藩等折回援應尤爲便捷現在武昌兵力單弱督  
隊打仗僅胡林翼常恩二員設該省稍有疏虞貽誤  
之罪楊需豈能諉卸耶曾國藩等前因戰船損壞全  
數開赴上游修理又因陸軍銳氣尙盛仍欲鼓行東

下直擣金陵原以輾轉回顧不但前功可惜且恐兵  
勇之氣不能復振是以諭令該侍郎等攻克九江卽  
合軍東下惟現在賊踞漢口漢陽武昌情形關繫緊  
要應如何設法協濟武昌而與攻勦九江大局仍無  
妨礙著曾國藩等體察情形或該侍郎帶兵自行前  
往仍留塔齊布會同江西兵勇攻勦九江務當統籌  
全局斟酌辦理楊需曾國藩接奉此旨卽將如何籌



辦情形迅速具奏以慰廑念陶恩培仍當督飭胡林翼等以勦爲防固守待援



欽定勦平粵匪方略卷一百二十一 乙卯年

二月十三日 丙午 托明阿陳金綬雷以誠奏言 臣

等飭水師嚴截江面一面分帶東西岸馬步官兵緊攻瓜州該逆仍負隅不出嗣獲奸細供稱該逆欲往江北裏下河通秦一帶擄掠等語查揚州東岸附近虹橋之沙頭地方尤爲裏下河門戶正月二十日 臣陳金綬等前往設法堵勦

行至施家橋忽報逆黨直撲沙頭欲紮籓渡河  
當卽飛調東岸官兵分路迎截臣雷以誠督飭  
兵勇復在沙頭北岸開放大礮斃賊多名該逆  
始退二十至二十九等日該逆欲竄裏下河屢  
次撲擾沙頭壘被兵勇痛勦毀其營壘餘逆仍  
回瓜州臣等統帶兵勇雖有一萬四千餘名而  
沿江上下二百餘里在在防賊北竄以致攻圍

聞

瓜州愈形力弱惟有嚴督焦山土橋水師並商  
同向榮督催上游各水師趕緊肅清江面使瓜  
州賊無援應庶逆勢漸孤可以併力攻克奏八  
報

同日英桂奏言查湖北襄陽及本省南陽等處  
日來未據續有警報第逆情詭譎必當思患豫

防臣現於陳州行營飭派留防之副將慶德帶兵五百名馳赴南陽會同該府顧嘉蘅添撥練勇扼要防堵又接邱聯恩自光州來函賊匪欲竄襄河是南陽新野唐縣等處喫重而信陽近接漢陽又爲北竄要道現親督駐紮光州官兵移紮信陽既可控扼漢陽亦與南陽等處易於策應又光商一帶應防之處甚多已飭汝甯營

參將成景帶兵駐紮相機防堵等情臣卽函覆  
照准辦理至陳州與皖省接壤之區現經布置  
嚴密與正陽關牛鑑行營互相策應聲勢尙爲  
聯絡再派防皖省正陽六安兩處共計兵勇三  
千餘名昨聞連鎮仰賴

天威揜渠埽穴以全勝之師勦高唐負固之賊定當不  
日奏功將來直東軍務告蕝儻蒙

聖慈准於凱撤官兵內飭調二三千名徑趨皖省分赴  
正陽六安將豫省撥去兵勇更換遣回防守本  
省則皖省旣不致空虛豫省亦可敷分撥於防  
勦機宜大有裨益奏入

上命軍機大臣傳諭英桂曰河南省外禦鄰氛內捕土  
匪防勦兼施所有防堵正陽六安兩處及南陽新野  
唐縣信陽關各要隘在在需兵該撫欲請調連鎮得



勝之兵二三千名赴皖以便豫省防皖各兵遣回更  
換一俟高唐竄匪殲除卽行酌調赴皖俾豫省防兵  
得以撤回供本省之用此時豫省勇多兵少該撫惟  
當仍飭牛鑑等實力扼守陶恩培奏逆賊勾結興國  
通山土匪大肆殺掠武昌頗屬喫重襄河亦有賊船  
現雖南陽一帶未聞警報防範仍須嚴密光商一路  
該撫已派成景帶兵駐紮邱聯恩移紮信陽藉以控

制南陽該撫現在陳州居中調度務須隨時偵探何  
路喫緊卽往何路策應

十四日丁未官文載增奏言佐領錫齡阿等於正

月十四五六等日在仙桃鎮南北兩岸連獲勝  
仗殲賊極多因下游之賊源源裹脅而上以致  
二十一日鄉勇被衝林天直身受重傷而死錫  
齡阿行至潛江催兵接應適副都統魁玉渡襄

河往防漢川臣等卽令魁玉率同錫齡阿督帶  
滿兵前進於二十七日開仗詐敗誘敵引動仙  
桃鎮南岸之賊跟追而來伏兵齊出槍礮疊施  
錫齡阿迎頭抵禦魁玉蕭蔭恩等分路抄殺斃  
賊無數追逐二十餘里該匪竄過北岸燒斷浮  
橋我兵趕至河干因無船隻暫於要隘紮營右  
翼副都統貴陞帶兵於二月初一日齊抵潛江

初二日冒雨行抵天門縣境漁泛洪地方見有  
逆賊卽率旗兵二百名渡河迎頭勦殺殲賊百  
餘名初三日復親督官兵過河遙見賊匪沿岸  
來撲貴陞卽帶兵迎擊殲斃甚多追至漁泛洪  
下十餘里之岳家口地方貴陞策馬直前率領  
官兵急追不料該逆由岳家口街內突出數千  
名將我兵橫衝截斷首尾不能相顧以致失利

貴陞不知下落查賊匪旣竄至天門潛江境界  
不獨上接襄陽且徧近荆郡民心震動不可不  
厚集兵力以資防剿茲添派委協領安貴等帶  
兵前赴了角驛一帶統歸魁玉等管帶相機堵  
剿並札知各州縣團勇扼守要路以防上竄臣  
載增出城親赴各路晝夜巡查臣官文仍募勇  
選兵妥爲調度如下游軍情緊迫卽親督進剿

奏八

上命軍機大臣傳諭官文楊霈曾國藩塔齊布陶恩培  
曰賊蹤相距荆郡不過百餘里之遙該處官兵旣須  
分布設防又須沿河下擊實有無可抽撥之勢楊霈  
安坐德安所帶兵勇至一萬七千餘名之多應赴上  
游應勦漢口尙在游移未定究竟一月以來所辦何  
事該督摺內已有賊至岳口之語則該逆之窺伺荆

襄已無疑義猶以收復漢川蘄水謂爲賊匪聲勢隔絕抑何憤憤至此貴陞此次失利誠不免孟浪失機何以與賊接仗之時僅有荊州官兵而該督所派之李錦鑾葛以敦蔣立松等並未見隨同援應是該督直置荆襄門戶於不顧終日籌畫不出楊店蔡店數十里之間殊爲可恨現在荊州緊急載增旣已出城郡城重地亦不可無人鎮守官文所稱親督進勦之

處務須斟酌盡善不可輕爲嘗試楊需前派各兵著  
卽飛催前進並於進攻漢陽兵勇內酌量改撥折赴  
上游以遏襄河賊勢若再事耽延是楊需屢次玩誤  
朕不能再以薄罰示懲也逆匪由江入漢兩岸北趨  
顯係水陸並進李孟羣等水師僅在外江轟擊並須  
追入內河方能破其藏匿之路其沔陽以上沿河船  
隻亦應一體撤赴上游方能絕其搶掠以武昌現在



情形而論，患不在江面而在興國通山一路。土匪曾國藩等進攻九江，連日不知勝負若何。或酌分陸軍以救武昌東路，或添派水師沿江而上，協濟李孟羣等之師，使得進剿襄河，則上游可期得手於潯郡事。機亦有裨益，著卽妥爲籌酌，迅速奏聞。

同日沈祖懋奏言：徽郡東西北各嶺隘相距二三百里，浙江杭嘉湖道徐榮駐紮祁門，祇能顧

及西路正月二十二二十一等日賊匪大隊數萬人來攻石埭之琉璃嶺霧露嶺經四川遊擊周天受帶兵迎勦連日互有勝負突於二十二日賊乘大風施放火箭噴筒我軍適在下風不能抵禦嶺隘遂失賊由石埭至太平縣距歙縣之箬嶺湯口皆祇數十里賊又分隊由石埭進趨黟縣之羊棧嶺臣當卽飛報浙省又與徐榮商

撥川兵赴黟協防一面飭令周天受卽在箬嶺  
外堵禦又與署知府恩禧商派徽州營參將文  
芳赴湯口防守二十八日探報賊於二十七日  
繞越山僻小徑攻入黟縣有進犯休甯之信伏  
思賊股分竄徽郡各邑三面受敵處處告警自  
黟至府僅百四十里中惟漁亭可以扼堵臣飛  
商徐榮能否移緩就急前來該處堵剿尙未接

有覆信事機萬分危急 臣當卽帶領練勇二百  
名前赴漁亭一帶防剿惟賊勢猖獗亟須浙省  
應援奏入

上命軍機大臣傳諭向榮何桂清沈祖懋曰黔縣至徽  
州府城祇一百四十里沈祖懋僅帶練勇二百名在  
漁亭堵禦此外惟徐榮在徽防堵兵力實形單弱何  
桂清想已接到該學政咨報著卽撥兵赴徽援應堵

賊內竄之路並著向榮速飭鄧紹良等撥兵由南路  
赴黔應援務須前後夾擊以遏逆勢

十五日戊申吉爾杭阿奏言臣於二月初一日由

上海起程卽由宜興溧陽一帶繞道東壩察看  
情形徑赴金陵大營會籌攻剿其拖罾船二十  
隻內有五隻運掉不靈業已撤回廣東分撥五  
隻由督臣派委署狼山右營遊擊張鳳翔等管

駕出洋肅清洋面其餘十隻派委狼山鎮總兵  
泊承陞等駛赴鎮江聽候托明阿向榮酌量調  
遣奏入報

十六日己酉會國藩塔齊布奏言潯城一面臨江

兩面瀕湖惟東門有陸路可入因於東門外小  
嶺下紮一新營開掘地道冀轟城垣詎該逆業

已偵知於東城內深掘濠溝添築子城東門外  
增修木壘暗通城內自正月十四日後日由木  
壘潛出撲我新營臣塔齊布與諸將熟商乘其  
屢來撲營設計陷之遂於十八日將新營器物  
夜中運歸營內暗藏地雷火礮掩以茅草賊衆  
果於十九日黎明出千餘人撲我地道徧擲火  
毬新營地雷火礮齊發燒斃賊匪二百餘人賊

衆敗潰 臣塔齊布督令參將彭三元都司周岐  
山率各營兵勇追襲斃匪四十餘人其自平嶺  
來攻者王國才率四川練丁禦之浙江甯紹台  
道羅澤南率領湘勇自東路直抵平嶺安慶府  
知府李續賓自北路繞出平嶺之後兩路夾攻  
追至城根賊衆遁入木壘其伏於寶塔松林中  
者經羅澤南王國才殲斃百餘名松林之賊盡



由老鸛塘奔入九華門三路共斃賊四百餘名  
生擒十二名此地道停工設計陷賊大獲勝仗  
之情形也水師之陷入內湖者輕舟百餘精卒  
二千本向來所藉以衝鋒陷陣者也然三板小  
艇一旦與老營隔絕座船被燒弁兵饑凍備嘗  
自開赴江西省撫臣陳啟邁給以口糧優以犒  
賞衆心始安繼聞外江被風戰船回鄂老營之

相離愈遠內湖之軍心愈搖臣曾國藩奏明馳  
至江省親自統帶而安輯之與陳啟邁商定將  
江省現造之長龍三十號先撥臣軍應用又慮  
春夏水盛江湖並漲非巨艦不足以壓浪而立  
營擬再造快蟹大船十餘號酌派員弁回楚續  
招水勇自成一軍期與外江水師會合夾攻此  
內湖水師重加整理之情形也探聞湖廣督臣

楊需於初五日回至漢口逆匪於初七日竄入  
漢鎮臣等卽飛飭王國才回援武漢又據探逆  
黨勾結興國州匪徒復行滋擾並圖竄入江西  
武甯縣境撫臣陳啟邁與臣國藩熟商王國才  
回鄂之師若取道武甯山路則免其蔓延江境  
而繞出興國之背勦辦亦易復札飭王國才由  
武甯興國勦洗回鄂此湖北來潯會勦諸軍旋

鄂之情形也現今攻圍潯城臣塔齊布仍日日操練以期蓄養精銳水師一軍分爲兩截各自整飭成軍庶幾轉敗爲功奏入

上命軍機大臣傳諭曾國藩塔齊布陳啟邁曰水師陷入內湖久與外江聲勢隔絕曾國藩恐兵心潰散馳往南昌省垣親自安輯已與陳啟邁商定將江省現造之長龍三十號調撥應用惟江湖水盛旣非巨艦

不能壓浪若尙待鄱陽春漲始行衝出恐稽時日急  
宜與江西所撥船隻合力設法將支河賊船勦淨駛  
出湖口以便與外江戰船聯爲一氣則水陸會攻方  
能得力現在水師已上援武漢塔齊布陸軍攻勦九  
江尤爲喫重陳啟邁擬造快蟹各船著卽派員迅速  
督辦以便與湖南師船會同出江王國才業已由武  
甯回援武漢繞出興國之背能否速到武昌尙難豫

料而有此一軍勦捕土匪卽可稍分武昌喫緊之勢  
曾國藩續由楚省招募水勇亦恐有需時日必將湖  
內長龍一百餘號速圖駛出與塔齊布陸兵會合克  
復九江始能與武漢水師聲勢聯絡

上又命軍機大臣傳諭駱秉章曰曾國藩等在九江水  
陸屢獲勝仗惟水師船隻被風損壞居多茲據奏稱  
擬再造巨艦並赴楚招募水勇等語駱秉章前奏已

飭紳士丁善慶等趕造大三板艇五十隻並長龍快蟹等船此時自己造辦竣工著與捐辦船礮一併備齊下駛以資曾國藩等江面攻剿

同日陳啟邁奏言江西水陸防剿事務紛繁統帶兵勇在在均須武職得力大員查新任南贛鎮總兵劉開泰於上年四月間經向榮奏留鎮江軍營相應請

旨飭下向榮卽飭劉開泰迅來江省會辦堵剿事宜奏

八

上諭內閣曰新任江西南贛鎮總兵劉開泰前經向榮  
奏留鎮江軍營現在江西防剿喫緊著該大臣卽飭  
劉開泰速赴新任

同日和春福濟奏言廬城得勝門南門外至七  
里站焦湖一帶  
有賊營數處路通金陵我軍必



須移營南路先將賊營全行奪毀去其外援再  
行四面圍剿則克復可期得手當飭吉順蕭開  
甲桂成等帶兵勇二千名移營得勝門外江忠  
濬派出楚勇數百名於二月初四日在五里墩  
紮營該逆見我軍逼在咽喉於初更後突出數  
千人直撲新營經江忠濬等督率各勇一面開  
放槍礮一面趕築土城極力堵禦相持一日兩

夜斃賊多名初六至初八等日臣等疊令東西  
兩路官兵分攻各門一面馳赴得勝門外督率  
鄭魁士等先攻第一座賊營齊抵外濠盡力攻  
擊千總顏紹楚手刃數賊被賊衆圍殺登時陣  
亡我軍四面圍住該逆無路奔逃砍殺淨盡立  
將賊壘平毀鄭魁士等帶領兵勇復分攻賊營  
二處該匪在牆內連開槍礮我軍搶至牆邊火

器齊施賊衆驚潰適程智泉江忠信趕到遂一  
齊擁入卽將賊營兩座奪獲七里站煙墩集賊  
營經官兵往攻亦先後奪獲計初八日一晝夜  
連破賊巢八處約斃賊匪三千數百名生擒八  
十餘名訊據生擒賊供廬城係僞秋官副丞相  
陳棕勝爲主帥已被官兵砍死所破賊營八座  
共有四千餘人等語訊明後卽行正法至湖南

永順協千總顏紹楚奮勇捐軀深堪憫惜應請  
飭部照守備陣亡例從優議卹以慰忠魂查廬城南路  
賊營爲該逆外援要道今一律奪毀城內雖有  
賊七千餘名而逆首陳棕勝伏誅主持無人殘  
敗之餘亟當趕緊圍剿設法殲除此次官弁兵  
勇齊心戮力奮勇可嘉可否由臣等擇尤保奏  
出自

天恩奏八

上命軍機大臣傳諭和春福濟曰皖省賊勢蔓延附近  
廬州一帶如舒巢等處尙未克復廬州之賊雖被痛  
勦援應未必盡絕著一面督兵迅圖攻克廬郡一面  
將七里站焦湖一帶分兵駐守毋令得而復失方爲  
善策若賊去則收復空城賊來則仍被占踞並或旁  
竄他處更肆鴟張和春等擁兵鉅萬縱寇往來獲咎

集賢堂卷二百二十一  
更重據奏首逆就誅羣盜無主然該郡渠魁是否實  
係陳棕勝城中賊夥尙多克復有無把握和春等不  
得因有小勝稍存玩誤

上諭內閣曰此次廬州城外晝夜攻勦連破賊巢八處  
斃賊三千數百名生擒八十餘名並將賊目僞丞相  
陳棕勝陣斬賊之外援已絕辦理尙爲得手著和春  
等督飭全軍乘賊大挫趕緊圍勦迅圖克復毋再玩

延所有出力員弁兵勇准其擇尤保奏候朕施恩湖  
南永順協千總顏紹楚著加恩照守備陣亡例從優  
議卹

同日陶恩培奏言二月初四日賊突由襄河口  
開出大小礮船一百五六十隻渡江直撲省城  
臣隨調水師奮力迎敵並用小划百餘隻擇兵  
勇慣戰而能泅水者二百名駛近賊船拋擲火

彈燒燬賊船數隻水師乘勝追擊賊船仍收八  
襄河口初五日探悉悍賊多在漢口而漢陽一  
帶較虛臣遂調水師直攻漢陽令北岸陸軍從  
上壓下又調宜昌水師二百名從鸚鵡洲徑渡  
接應賊遂驚潰我軍乘勢追殺李孟羣正在督  
戰登岸忽有悍賊以矛直刺李孟羣幸千總任  
鴻春拌救立將悍賊刃斃初六日下流又來賊



船十餘隻向上行駛水師向下迎擊詎賊將襄  
河口內礮船全隊開出橫截中流我礮船已在  
賊下流不能速退暫泊南岸賊船一齊追來軍  
功彭兆熊奮勇接戰殺賊十數名登時陣亡幸  
塘角下李錦鑾等督領兵勇奮力接應槍礮齊  
施賊船始退至逆賊勾結興國通山土匪肆擾  
警報疊至省城實無兵勇可分而咸甯蒲圻各

境爲南省餉道所關再四思維擬於石清吉營  
中抽撥兵二百四十名添募勇五百名派委知  
縣湯景督帶前往會合該處團練相機截勦並  
准督臣楊需咨稱收集潰兵及新調兵勇共一  
萬餘人已派總兵楊昌泗等由長江華潯口新  
溝蔡店分路進攻漢口漢陽如能剋期到齊卽  
可與省垣水陸各軍合力夾攻奏入

上命軍機大臣傳諭官文楊霈陶恩培曰據陶恩培奏賊由襄河渡江直撲省城經官兵擊退水軍進攻漢陽未能得手等語鄂省兵力本單楊霈現派兵勇一萬餘人進攻漢口漢陽著卽催令楊昌泗等迅速前進至襄河一帶賊勢蔓延官文所派之兵能否迅抵武昌殊難懸定楊霈等惟有遵照前旨一面進攻漢陽漢口一面抽撥兵勇折赴上游以遏賊蹤至興國

通山土匪滋擾最爲省城之患據曾國藩等奏稱現  
派副將王國才管帶兵勇三千餘人取道武甯繞出  
興國之背一路勦洗到鄂此項兵勇卽著陶恩培就  
近催提李孟羣等水師能否追入內地與陸兵會合  
夾擊襄河爲賊船占踞荆郡情形喫重官文等督兵  
進剿務須熟籌妥辦並將近日情形迅速具奏

十九日

壬子

楊需奏言據胡林翼李孟羣稟稱正

月二十五六等日進攻漢陽力戰半日之久先  
後燒賊營盤四座直抵漢陽城下忽有伏賊自  
城外抄襲後隊傷兵勇數十人二十七八等日  
大風驟作將水師戰船擊損五六十隻漂沈二  
三十隻陸營帳棚亦多吹裂亟須趕緊修葺再  
行會合進攻初四日劉富成自蔡店進攻漢陽  
栗耀楊光澍李玉田分三路進攻漢口楊昌泗

於初四日行抵漢川督率鄉勇勦捕繫馬口官  
橋侏儒山賊匪皆聞風星散遂抵蔡店與劉富  
成合軍初八日進紮距漢陽十五里之三眼橋  
前竄岳口之賊於初五日上犯天門當派守備  
穆祖索朗帶兵會同署天門縣知縣楊琳等督  
率練勇於四更潛往襲擊殺賊三百餘人餘賊  
竄回岳口 臣先已飛咨署提 臣誦欽帶兵馳赴

安陸防堵並飭都司葛以敦等截擊以杜上竄  
茲復派縣丞馮端禮等管帶豫勇馳赴漢川堵  
截回竄之路其仙桃鎮賊匪於初二日竄赴沔  
陽經魁玉等殺賊二百餘名餘匪竄赴北岸現  
飭北岸兵勇乘勢圍剿以冀一鼓殲除奏入

上命軍機大臣傳諭官文楊霈陶恩培曰官軍連日進  
剿雖據報各有斬獲而漢陽漢口並未克復岳家口

仙桃鎮之賊亦未能剿除淨盡北岸天門等處僅有  
守備穆租索朗等督帶兵勇剿辦殊形單弱著楊需  
飛飭楊昌泗與劉富成會合前進並著官文飭令魁  
玉等會督兵勇無分南北岸併力夾擊杜賊上竄之  
路李孟羣等進攻漢陽均以賊匪抄襲未能攻入現  
駐武昌著陶恩培飭令胡林翼等斟酌情形渡江協  
剿以期及早收復此時兵勇旣已分路進剿楊需自



望飛速前進臨陣調度斷不准株守德安致滋貽誤

二十日癸丑官文載增奏言據報襄河股匪於二

月初三四等日與天門等處兵勇拒敵將兵勇

衝敗初五日攻入天門縣城復於岳家口搭浮

橋渡過襄河南岸上下分竄賊蹤已至潛江等

語當派佐領安祥等帶旗營馬隊會同該縣團  
勇數千名相機會勦誠恐該逆由南岸上竄荆

門下竄沔陽均不可不嚴爲防範卽將知府陳均遠募勇五百名派千總劉德英管帶並派守備蘇都哩等分路堵禦又據探報復有股匪由興國州上竄正月二十七日竄至崇陽縣境在大江以南滋擾等語儻竄至江岸卽逼近監利沔陽且上與岳州毗連是省城與荊州江防均形喫重已派守備宗維清等帶兵赴北岸監利

縣及沔陽州之新隄地方會同各該地方官防堵

官文載增又奏言正封摺間據守備穆租索朗署天門縣知縣楊楸報稱途次聞天門已失星夜前進二月初七日齊抵城外賊衆出城抗拒經穆租索朗等親率兵勇迎擊紳士許本壩等各帶壯勇數百名四路合擊斃賊無數當將城

池克復餘匪由岳家口下竄彭市河等語查此時襄河南北兩岸及上下游均有兵勇四面兜擊自易得手襄河指日當可肅清

同日浙江巡撫何桂清奏言臣於正月二十六日淮安徽學臣沈祖懋函稱青陽逆匪竄入石埭之琉璃嶺防嶺兵勇甚爲單薄現已退保箬嶺亟須由浙應援臣以石埭爲黟歙兩縣屏蔽

該匪竄入琉璃嶺將由黟歙各嶺內犯徽州事  
在至急卽飛飭金華府知府石景芬護嘉興協  
副將魁齡帶勇九百名勇首李恆淞等帶勇八  
百名分水陸兩路馳赴祁門聽候學臣及浙江  
委員徐榮調派防勦二十八日接署湖州府知  
府王有齡稟稱大股逆匪一竄琉璃嶺一竄霧  
露嶺防勦萬分喫緊已由鄧紹良飛調駐紮灣

三十一  
三十一  
泚之曾承禧駐紮廣德之師長鑣駐紮四安之  
彭壽殷各帶兵勇前赴甯國協勦其駐紮四安  
之黃熊飛蘇方拱赴廣德接應等情 臣復派把  
總何載賡帶勇四百餘名馳赴甯國聽候鄧紹  
良調遣查徽郡箝嶺以內可以直達績溪由績  
溪至昌化昱嶺關計程百餘里不必經由徽州  
郡城其甯郡所屬之甯國縣亦與昌化於潛接

壤浙省防務喫重現飭紳士黃一清黃載清帶  
勇九百餘名以備策應均奏入報





欽定勦平粵匪方略卷一百二十二

乙卯年



二月二十二日 乙卯 惠親王軍機大臣刑部會奏

言勝保奉

旨督勦高唐逆匪圍攻九月有餘不能勦滅以致數百  
餘匪日久稽誅惟高唐失陷尙在該革員追兵  
未至之先與失陷城寨者稍覺有閒自應按律  
酌減問擬勝保應於守邊將帥失陷城寨斬罪

上減一等擬以滿流從重發往新疆效力贖罪  
仍恭候

欽定奏八

上諭內閣曰已革都統勝保經朕特授爲欽差大臣勦  
辦逆匪自賊踞高唐州後勝保帶兵圍攻九月有餘  
未能克復糜餉勞師罪無可逭惟念勝保前由揚州  
帶兵解懷慶之圍追賊山西不遺餘力其另股賊匪

由山東臨清竄出後復沿途追剿直至江蘇豐縣悉  
數殲除尙屬著有勞績勝保著於斬罪上減等發往  
新疆效力贖罪

同日兵部左侍郎王茂蔭奏言南方之勢全在  
長江長江之要全在九江以曾國藩塔齊布水  
陸兩軍三日而克武漢長驅直下勢如破竹獨  
於九江數月不下者蓋賊以九江爲扼要故悉

力守之今之分竄漢口正欲使我師回救彼乃  
得保九江而無憂耳我兵駐九江不退則江面  
爲我所有雖不回救而與上游聲勢聯絡儘可  
調兵撥船於其間賊終有所畏忌不能往來自  
如一退則全江皆爲賊有下游消息不通縱留  
兵於九江亦必被賊攔截此九江之所以萬不  
可舍而回救之非策也或曰不上救武漢則下

攻金陵此尤不能九江以下賊必皆有防守我  
兵豈能直達儻賊情詭譎故縱我兵東下因而  
抄襲我後腹背受敵禍更難測爲今之計惟有  
力圖九江九江未下不獨將不可輕動兵亦不  
可多分卽能克復亦必多留兵勇扼紮以成重  
鎮使漢陽之賊不能下竄安慶之賊不能上駛  
全江之險爲我所據呼應皆靈其攻九江之策

曾國藩等自必籌之已熟臣愚以爲我兵若由間道入江西與江西之兵聯爲一氣從南康星子一帶水陸橫衝而出賊必難防曾國藩由內攻出塔齊布等由外攻入似更易於得手

王茂蔭又奏言臣聞徽州又被賊擾儻爲賊破則以建瓴之勢東下浙江固在意中而西通江右之饒州一湖相望又將與九江聲勢聯絡且

由徽而與池太之賊三面以攻甯國甯國不守  
則安省之江南四府已被打成一氣蘇杭處處  
皆通於全局甚爲可慮前任江西巡撫張芾曾  
奉

旨交和春等差委江北大員較多可否

飭下張芾前往徽甯一路籌辦團練防堵事宜當較得

力奏入

上命軍機大臣傳諭曾國藩塔齊布曰據侍郎王茂蔭奏賊以九江爲扼要故用全力守之曾國藩等不可回救武漢亦不可多分兵力等語現在塔齊布圍攻九江並未撤兵王茂蔭尙未知悉且不知此時荆襄緊急武漢兵勇不能得力有不得不分兵援應之勢其所稱由閒道入江西從南康星子水陸橫衝而出內外夾攻亦尙未知曾國藩已抵南昌蕭捷三等師



船尙在都昌一帶軍情移步換形固不容專顧一隅亦豈可處處受賊牽掣著曾國藩塔齊布仍遵疊奉諭旨迅圖克復九江則上下游江路自通賊船可斷其應撥兵回援及如何前後兜剿之處均著妥速籌辦王茂蔭摺是否有可採擇卽著酌量辦理

二十四日丁巳英桂奏言皖楚賊氛未靖豫省接

壤州縣處處皆須設防豫省派往皖境兵勇合

計雖有三千餘名而分駐六安正陽以之扼守  
則有餘以之追勦則不足現接駐守六安四品  
卿銜王庭蘭來咨以福濟令將六安兵勇移赴  
舒城等語臣查六安爲豫省最要藩籬前經袁  
甲三與臣商明奏派大員督兵扼守茲調赴進  
征六安旣未可空虛豫省又無兵可撥臣已函  
商福濟相機辦理至楚北軍情探得漢陽逆匪

疊被官兵圍擊蘄水漢川克復後逆匪分竄沔  
陽天門界內所有襄河北岸之繫馬口麥旺嘴  
仙桃鎮以及岳家口均有賊蹤往來該處路通  
襄陽德安兩郡均屬喫緊等情均經 臣隨時批  
飭各該地方官會同在防將弁嚴加防範南陽  
鎮 臣 邱 聯 恩 已 移 紮 信 陽 之 西 雙 河 居 中 調 度  
既可控制三關亦可策應南陽奏入報

二十五日戊午楊需奏言十三日賊匪數千上竄

漢川十四日又有賊匪數千上竄新溝都司施  
鴻恩帶兵自長江埠追至劉家隔堵勦署雲夢  
縣知縣吳瑛帶勇助之與賊相持於螺螄港歷  
一晝夜賊匪抵死不退適都司葛以敦趕至合  
力接仗殺賊數百名賊仍不退又經新募豫勇

奮力勦殺斃賊千餘名終以衆寡懸殊抵敵不  
住退至長江埠楊昌泗等合力抵禦亦不能支  
賊衆遂由應城所屬地方西竄臣查襄陽爲北  
境要地由漢川潛沔兩岸水陸皆可直達襄陽  
恐猝不及防竟爲所襲通籌大局襄陽較重於  
德安德安北有三關之險各屬紳民上年爲賊  
擄掠殆盡城空地瘠非賊所必爭襄陽完善之

區北接河南平曠無險臣前擬如果賊匪上竄  
卽由天門安陸一帶迎頭截擊今賊欲由應城  
問道徑竄襄陽已出安陸天門之上必帶兵更  
出其前方可迎截適楊昌泗自應城趕回遂令  
收集兵勇駐守德安臣親督留營兵勇馳赴隨  
州一帶截遏一面派兵於山徑埋伏一面多發  
偵探詳察賊蹤相機勦擊

楊霈又奏言現存之兵爲數太少查四川夔州忠州梁萬等營與楚北相近尙堪酌撥應請

旨飭調夔州協忠州營梁萬營官兵一千名四川練勇一千名並派該省遊擊顏朝斌都司陳有才把總趙連陞管帶來楚至餉糈匱乏行營兵勇應發之餉積欠甚多伏乞

飭下四川督臣迅將請撥之餉源源接濟以免停兵待

餉之虞奏八

上命軍機大臣傳諭官文楊霈陶恩培曰楊霈自賊由  
黃梅回竄卽節節退避迨賊踞漢鎮復株守德安屢  
次諭令迅速進攻而月餘以來毫無布置以致該逆  
紛紛上竄該督遷延貽誤罪無可辭此時逆賊欲窺  
伺襄陽該郡北接河南儻稍有疏虞致逆賊勾結豫  
省土匪肆行猖獗爲害愈烈該督現馳赴隨州一帶



意在迎頭遏截但賊勢剽疾所稱派兵於山徑埋伏  
截勦亦恐不足深恃且賊情詭譎往往避實擊虛德  
安雖輕於襄陽楊昌泗收集之兵勇是否足資堵禦  
楊需惟當確探賊蹤就現有兵勇酌量調度以遏賊  
鋒前據官文奏襄河南北兩岸擊賊下竄荊州情形  
如果稍緩亦可分撥兵勇與楊需會合進勦逆匪大  
股上竄則漢陽漢口賊巢自必空虛陶恩培亦當督

飭胡林翼李孟羣水陸諸軍乘勢進剿儻能得手卽可分投追擊使該逆首尾不能相顧剿辦較易爲力楊需督兵剿賊旣不能杜賊回竄若再令該逆擾及襄陽朕惟執法從事決不寬貸

上又命軍機大臣傳諭英桂曰襄陽十分喫重該處地接河南平曠無險楊需等所帶兵勇屢經潰散果否能遏逆氛尙無把握而德安北近三關各屬上年曾

遭蹂躪城空地瘠卽楊昌泗兵力亦單恐未能抵禦  
英桂昨奏已飭南陽府會同在防將備堵守此時河  
南邊界毗連襄陽德安兩郡地方較前喫緊該撫前  
派邱聯恩移紮信陽州之西雙河居中調度原爲控  
制三關策應南陽起見著卽嚴飭該鎮將等將南路  
邊防嚴密布置一面偵探賊蹤隨時援應勿令逆匪  
北犯英桂近在陳州更應探明何路緊急馳往堵剿

不得稍存大意

上又命軍機大臣傳諭樂斌曰現在楊需軍營兵數無多川省與湖北毗連夔州忠州梁萬等營地方尙屬安靜著樂斌揀撥精兵一千名練勇一千名委遊擊顏朝斌都司陳有才把總趙連陞管帶迅速馳赴楊需軍營聽候調遣前次川省應撥之餉此時楊需軍中需用孔亟並著迅籌解往

上又命軍機大臣傳諭扎拉芬曰賊匪由漢川應城等處小路上竄儻直達襄陽該郡恐爲所襲現在楊需由隨州一帶迎頭截擊如上竄之賊徑犯襄陽該郡兵勇爲數無多恐難抵禦著扎拉芬接奉此旨後卽帶兵前赴湖北與楊需等會同攻剿探明襄樊等處何路緊急卽由何路進攻以剿爲防

同日何桂清奏言前接安徽學臣沈祖懋暨浙

江委員徐榮咨稟逆匪於正月二十七日由羊  
棧嶺竄至黟縣 臣當卽飛飭知府石景芬等催  
趲前進一面飭令武舉陳桂華帶勇五百名就  
近馳赴徽州協防茲據該學 臣暨同知裕英及  
徐榮之子徐慮善先後函稟我軍於二月初一  
二日接仗兩次殺賊二百餘名續派兵勇尙未  
到營初三日辰刻賊衆漫山而至徽勇聞聲先

潰我軍連接數仗忽漁亭營盤火起都司許上  
達力戰陣亡徐榮率領伊子徐慮善暨裕英並  
嚴州協把總朱朝英黟縣紳士余肇元等出陣  
督戰徐榮身受刀矛重傷死於行陣徐慮善裕  
英朱朝英亦均受重傷兵勇傷亡未知確數幸  
江長貴奮力擊斃逆匪三百餘名該逆始行退  
去不致內犯又據石景芬稟報勇首夏寶慶帶

領台勇於初七日行抵徽郡在附城之河西橋  
駐紮探聞該逆由黟縣竄至休甯並有分竄屯  
溪之信臣查徽郡素稱富饒各屬崇山峻嶺有  
險可守所慮兵力單薄曾經向榮派委周天受  
江長貴許上達等統帶精銳川兵一千名爲該  
郡戰守之用浙省與該郡毗連前撫臣黃宗漢  
暨臣先後派往兵勇不下三千餘名但必主客



同心相爲表裏方可濟事乃黟縣之警徽勇先  
潰雖有客兵安能代守臣現飭石景芬管帶兵  
勇趕赴前途紮定營盤確探恩禧等何處駐紮  
該郡官紳如何布置再行前進助勦此次漁亭  
失利除許上達陣亡如何請卹應歸安省奏報  
外其浙省帶兵委員徐榮抵防半載有餘備嘗  
艱苦茲因督戰陣亡殊堪矜憫應請

飭部優卹以慰忠魂奏入

上命軍機大臣傳諭何桂清曰據奏漁亭失利道員徐榮督戰陣亡徽郡賊氛日徧當乘賊匪未越休甯之先扼其來路方不至旁竄屯溪等處並飛飭石景芬周天受江長貴陳桂華等就現有兵勇隨時確探合力進剿勿令深入內犯以固浙省藩籬徽州素稱富饒兼有險隘可守該撫所稱必須主客同心方能濟

事固屬實情已諭令怡良和春福濟嚴飭該府縣等將練勇籌餉事宜實心辦理何桂清仍當不分畛域力圖援應

上又命軍機大臣傳諭怡良和春福濟曰何桂清奏逆匪竄擾黔縣浙省派防官兵於二月初三日在漁亭地方接仗失利道員徐榮陣亡該逆由黔縣竄至休甯並有分竄屯溪之信等語徽郡爲南路要隘疊經

諭令該地方官會同紳士舉辦團練如果平日辦理  
妥善何至賊鋒甫至卽行潰散可見該地方官於防  
禦事宜並未悉心經理徽甯紳富亦未能實心出力  
保衛鄉閭專恃浙省及江南大營分撥之兵藉資堵  
禦現在賊勢猖獗浙省既不能多撥兵勇屢次代籌  
糧餉卽江南大營官兵亦勢難多撥怡良福濟均有  
地方之責著卽嚴飭該管道府州縣及紳士等激發

天良團勇集貲協力堵剿如有因循不振貽誤地方者卽著從嚴叅辦和春福濟攻剿廬州賊匪前已踏毀賊營附城合圍卽日諒可克復此時徽郡情形萬分喫重和春等務當悉心籌畫設法援應不得以南北隔絕勢難兼顧爲詞自圖諉卸前據王茂蔭奏請飭已革江西巡撫張芾前往徽甯一路籌辦團練防堵事務等語著和春等酌量情形奏明辦理

上諭內閣曰逆匪於正月二十七日由羊棧嶺竄至黔  
縣福建汀漳龍道徐榮聞警督帶兵勇前往漁亭堵  
剿兩次接仗殺賊二百餘名因續派兵勇未到賊衆  
紛至我軍連接數仗徐榮身受重傷力竭陣亡情殊  
可憫著交部從優議卹以慰忠魂

何桂清又奏言准江西撫臣陳啟邁來咨逆匪  
竄踞饒州該郡毗連廣信請調浙兵協防臣卽

飛咨衢州鎮富勒興阿帶兵四百名赴常山曹  
會關駐紮又飭都司封九貴帶兵三百名把總  
黃國慶帶勇五百名分赴開化華埠航頭尤溪  
口等處駐紮如廣信有警卽行前往應援惟浙  
省自協防徽甯廣信三路兵力日行單薄臣現  
在咨商向榮如可於大營中抽撥勁兵並委久  
歷戎行之將領管帶來浙俾資訓練卽可爲江

西安徽之策應於攻戰更有裨益奏入報

二十六日己未官文載增奏言據防禦烏爾恭額

等稟報岳家口賊匪被襄河南北兩岸兵勇擊  
退後卽馳往該處見屍橫徧野至距岳家口不  
遠之新興境麥田內見有貴陞屍身卽備具棺  
木收殮隨征之守備扎克當阿亦同時陣亡等



情查貴陞趕過襄河窮追遇伏斃賊至一千餘  
名之多扎克當阿亦奮勇直前殺賊無數均因  
力竭捐軀情實可憫合無仰懇

天恩飭部將貴陞照副都統例議卹扎克當阿請

賞加都司銜卽照都司例議卹以慰忠魂其隨同貴陞  
出征之協領等員未能先事救援自應一併叅  
辦協領依西布佐領寶瑞定成均請革職留任

依西布並拔去花翎防禦薩勒杭阿炳輝勝魁  
慶吉驍騎校祥順祥富魁明什猛額存良文連  
均請摘去頂戴以上十三員仍留營效力至防  
禦烏爾恭額驍騎校勝保東成係派隨貴陞前  
後督兵之員臨陣未能護衛均請卽行革職亦  
令隨營效力奏入

上諭內閣曰副都統貴陞帶領旗營官兵由岳家口趕

過襄河殲斃賊匪至一千餘名之多過於銳進力竭  
陣亡殊堪憫惻荊州右翼副都統貴陞著照副都統  
例議卹升補安徽撫標守備扎克當阿隨同貴陞勦  
賊奮勇直前殺賊無數同時陣亡著賞加都司銜卽  
照都司例議卹以慰忠魂其從征失利之協領依西  
布佐領寶瑞定成均著革職留任依西布並拔去花  
翎防禦薩勒杭阿炳輝勝魁慶吉驍騎校祥順祥富

魁明什猛額存良文連均著摘去頂戴以上各員仍  
責令隨營效力防禦烏爾恭額驍騎校勝保東成臨  
陣督勦不力均著革職隨營效力以示懲儆

官文載增又奏言據副都統魁玉佐領錫齡阿  
稟報賊衆由彭市河下竄恐仍回踞仙桃鎮北  
岸卽督率兵勇渡河將仙桃鎮北岸賊巢焚燒  
搜捕餘匪惟賊蹤尙在漢川縣屬之新溝侏儒

山刁汭湖繫馬口等處下游堵剿正嚴恐其竄  
逸沔陽已派軍功張正起等在仙桃鎮里仁口  
各要隘防堵魁玉錫齡阿紮兵潛沔之間以爲  
上下聲援等情查漢川境內尙有賊蹤俟德安  
大兵齊抵漢鎮卽飭魁玉等將上游各賊巢剿  
洗淨盡奏入報

聞

同日英桂奏言 臣接鎮 臣邱聯恩函稱逆匪北竄德安於十六日失守楊需追至隨州東南七十里之子河店並以信陽之黃土平靖武勝等關距德安僅止百數十里防兵單薄請添兵堵禦等情查豫省兵勇無多不敷調遣自撥赴皖省正陽六安兩處又以河北及開封所屬土匪滋擾各處分調應援已屬左支右絀茲楚北逆

氛復熾豫省接壤之區防不勝防 臣督師陳州  
雖兵弁無多不得不儘數移紮南路擬卽飭令  
分起先行 臣親督後隊馳赴信陽布置惟逆燄  
臨張豫省兵勇祇能自固邊防而賊匪節節上  
趨自黃州以至漢口漢川現復逼近雲夢以達  
德安是襄陽一帶甚屬可虞非另調精兵徑往  
援剿恐蔓延益肆鄰省之受累滋深合無仰懇

聖恩俯念楚北軍情緊急迅調北路精兵五六千名遴  
派大員統帶赴楚再由楚省知照曾國藩塔齊  
布於九江一帶回軍截勦北路精兵由襄漢分  
途夾擊蠢茲醜類當不難及早殲除奏入

上命軍機大臣傳諭僧格林沁德勒克色楞西凌阿崇  
恩曰逆賊占踞漢陽等處後官軍疊次進勦未能得  
手該逆由應城上竄逼近南陽英桂現已由陳州馳



赴信陽相機布置惟豫省兵勇疊經調赴正陽六安  
並以各屬土匪滋事紛紛調撥現在邊防喫緊在防  
官兵過於單弱自應迅派重兵前往遏賊北竄著僧  
格林沁於所帶官兵及勝保前存兵丁內挑選馬步  
三四千名派委得力大員統帶星速馳赴河南交英  
桂調遣毋稍延緩至調撥以後大營兵力或恐不敷  
東省官兵有得力可用者卽著歸併大營協剿如東

省官兵可以徑赴河南亦著斟酌辦理該官兵起程日期並著迅速馳奏馮官屯餘匪無多豈容任其久踞十數日來未接奏報實深焦念著僧格林沁等督飭兵勇迅速進攻務將該匪卽日殲除俾南賊聞風膽落不致再圖北竄

同日王履謙長臻奏言高唐之賊竄踞馮官屯後業由大兵追及四面圍剿臣等恐該員弁以

指日蕩平稍存懈弛臣王履謙由上游折回下游臣長臻由下游前赴上游互相督飭不使一賊漏網致留餘孽現在高唐撤回南省兵勇陸續由柳園蘭儀過渡計已一千數百名臣等親往該兩口逐加查驗挨次放渡尙無偷越滋事諸弊統計各渡口情形以曹河劉家口爲最要單縣董家口次之孟津汜水滎澤柳園等處又

續通志卷一百二十二  
三三  
次之前因北路未平河禁一律嚴緊兩年來百貨壅滯小民生計益艱今東省肅清在卽該商民等紛紛呈請開渡經臣等勸諭俟荏平凱撤後再行奏請辦理奏入

上命軍機大臣傳諭王履謙長臻曰本日據英桂奏請添兵防勦已於僧格林沁大營撥兵赴豫以資策應王履謙等所稱俟荏平縣凱撤後再行奏請開渡自

係於現在情形尙未稔悉黃河設防以遏賊北竄爲  
重所有上下游防務未可遽行鬆勁著王履謙長臻  
仍飭各口文武員弁無分晝夜實力巡查遇有形跡  
可疑者務須嚴加盤詰勿令賊中奸細得以偷渡

二十七日

庚申

和春福濟奏言

臣

等因廬州城內

尙有賊數千名附近之無爲州巢縣舒城廬江  
等處賊氛未靖必致聞風來援亟應嚴加堵剿

一面撥兵於七里站一帶紮營防守一面飭令  
郎中李文安已革知府傅繼勳署合肥縣知縣  
馬新貽帶同練勇一千數百名渡過焦湖南岸  
紮營四座以斷外援二月十七日賊船百餘隻  
自梁山運漕河駛來約有賊三千餘名赴廬救  
援十八日午刻該逆分三股撲我軍營盤各勇  
攔腰衝出前後夾攻逆匪首尾不能兼顧自相

驚亂各勇復分水陸追擊燒燬賊船十數隻追  
殺二十餘里斃賊四五百名伏思賊匪前受大  
創其膽已寒今外援又爲我軍擊退斷無久存  
之理第舒巢未復誠恐去而復來查二等待衛  
多慧現已到廬人頗勇悍已飭與遊擊塔思哈  
帶領兵勇五百名馳赴焦湖一帶接應會同李  
文安等相機堵剿以昭嚴密奏入

上諭曰廬州賊情旣形窮蹙亟宜趕圖克復毋再延緩  
和春福濟又奏言前此袁甲三奏請以郭世亨  
王啟秀二員分別開缺委署事前本未會商拜  
摺後方行咨照及奉

旨飭令與臣等妥議伊函稱如意見相同卽會銜否則  
單銜具奏臣等公同函復以宿州係南北關鍵  
該員郭世亨素得民心藉資捍衛不可驟離詎



袁甲三堅執前言單銜覆奏並將臣等不肯更  
易之詞全行抹煞祇以前後稱美浮言濫瀆

聖聽臣等如隨聲附和見好同僚下無以對黔黎上無  
以酬

高厚查知州王啟秀在宿祇能幫辦未可獨當一面再  
四籌思更易則彼此無益仍舊則官民俱安其  
潁州協勦仍應派令張家駒前往會同陸希湜

勦辦至袁甲三此次來函堅持已見百折不回  
臣等無從會銜

和春福濟又奏言袁甲三統帶兵勇以來從不  
自請撥餉過者動輒截留用款亦不咨報藩司  
顯有不實不盡查各州縣雇募防勇每日制錢  
百餘臨淮距賊尙遠事同一例乃袁甲三竟照  
大營征勇日給一錢五分似此冒銷私肥囊橐

無怪道路之口闕傳其油簍藏銀派勇送陳州  
本籍半途遇盜言者稱快信任劣員候補同知  
李安中妄陳鹽務設卡巡河擾害閭閻強勒小  
戶捐輸敲骨吸髓以致民間怨恨臣等受

恩深重不敢不據實密陳奏入

上諭內閣曰前因袁甲三奏請將安徽署宿州知州郭  
世亨開缺專辦蒙亳等處捻匪並請以補用直隸州

知州王啟秀接署宿州知州朕以地方公事應由該  
撫覈辦批令會同和春福濟具奏嗣據袁甲三奏稱  
和春等函令單銜入奏茲據和春等奏袁甲三接奉  
批摺後仍堅持已見無從會銜並稱宿州地方緊要  
請留熟手接辦無庸更易以期官民相安自係實在  
情形所有郭世亨王啟秀開缺接署之處著毋庸議  
各省辦理防勦大員遇有官吏廉能出衆者原准保

奏貪汙不職者亦許糾叅惟於升補委署總應會商  
地方大吏豈容擅自更調袁甲三經朕屢次批諭輒  
敢固執不遵飾詞具奏以遂其專擅之私實屬大負  
委任都察院左副都御史袁甲三著先行交部嚴加  
議處卽著來京候旨至所叅袁甲三擅截餉銀冒銷  
肥已等情著和春福濟確切查明據實具奏

二十八日

辛酉

僧格林沁德勒克色楞西凌阿奏

言逆匪竄至馮官屯占踞一臣等因該逆拚死抵拒兵勇難於逼近將運到大礮四面安設向內轟擊村內房屋皆被擊塌該逆狡悍異常因房屋不能棲止在村內掘窰土濠盤旋三匝可由地下通行卽於溝內掘窰潛藏以避礮火圍濠之外復挖小孔逆匪伏於地下向外瞭視俟我軍逼近鳥槍可及之處卽向上開槍是以日日

進攻兵勇皆有傷亡未能得手伏思此股逆匪  
止數百人現被重兵圍困竟不能迅速蕝事訊  
據投出之人供稱村內糧米充物逆匪足敷日  
用臣等輾轉籌度擬用水灌或可奏功因馮官  
屯外舊有河形可以引水當經委員詳細履勘  
溯查來源據稟馮官屯旁舊有漢河可通徒駭  
河若由上河廳三孔橋挑開引放運河之水始

能灌入惟挑墊築壩處所均應妥爲修理以免  
泛濫旁洩等情現已移咨東河總督山東巡撫  
設法辦理如水勢暢旺馮官屯雖不能淹沒而  
周圍濠內必可滿溢該逆旣難潛匿必拌命出  
鬪當可卽時蕩掃仍一面激勵兵勇趕緊進攻  
斷不敢藉候引水稍涉遷延現在該逆每夜出  
巢窺探李開芳時親向義勇等巧言引誘以冀



要結衆心俱被各勇槍礮擊回奏入

上命軍機大臣傳諭僧格林沁曰該大臣現擬由上河  
聽三孔橋挑開引放運河以水灌賊此計未免迂緩  
且恐辦理稍不周妥或有泛濫旁洩之虞轉使該逆  
有險可恃該大臣務當斟酌妥善一面迅速辦理仍  
一面設法進攻毋令負隅久踞逆賊詭譎多端慣於  
勾結此次義勇雖將逆匪擊回仍當隨時稽查奸細

毋令潛相煽惑以致窺我虛實

欽定勦平粵匪方略卷一百二十三 乙卯年

三月初二日甲子向榮奏言二月初四日探有賊

踞南陵之牛角井糾合六里丁之賊共四五千  
人來犯涇邑遊擊楊瑞乾帶勇從旁衝入將賊  
隊截爲兩段殺賊頗多先派埋伏義勇並將賊  
踞之戴家墟焚襲該逆驚潰敗回六里丁涇太  
已無匪蹤十三日連接浙江撫臣何桂清兩函

我軍在漁亭堵剿失利初三日都司許上達奮  
往直前力戰陣亡該逆竄至休甯有分擾屯溪  
之信請撥勁兵赴徽並由威坪地方援堵以扼  
入浙之路臣查該逆垂涎蘇浙曾屢犯東壩黃  
池均被我兵挫敗今既竄擾徽州偏近浙中則  
東南全局皆震且係大營糧臺後路尤關緊要  
當卽飛檄楊瑞乾帶領義勇七百五十名由甯

國繞赴浙省威坪會同各軍堵紮要衝再由浙  
出勦徽境之賊並於金陵撥兵五百名交都司  
馬永清管帶由蘇入浙聽候撫臣何桂清調遣  
因思革任巡撫許乃釗兩載在營頗知賊情又  
係浙人明於該省地利業令星馳赴浙與何桂  
清籌商堵勦機宜至都司許上達力戰陣亡殊  
堪憫惜相應請

旨飭部從優議卹

向榮又奏言正繕摺聞續接撫臣何桂清函稱  
徽州已於十三日失陷此時浙江倍加緊急已  
檄令鄧紹良添帶楚兵五百名由黃池兼程赴  
浙飛咨浙撫卽將各路防勦兵勇併歸鄧紹良  
統帶以專責成

向榮又奏言臣於正月內訪聞有奸匪陳滌葉

導生盧碇汝起意糾匪欲先搶無錫蘇州後搶  
杭州情事當密派都司李鴻勳知會地方官於  
正月二十二日將陳灤葉導生擒獲就地正法  
惟盧碇汝在逃未獲臣查蘇省五方雜處每易  
藏奸非有封疆大員不足以資鎮撫現在撫臣  
吉爾杭阿到營幫辦軍務可否請

旨飭令督臣怡良回蘇駐紮以重地方奏入

上命軍機大臣傳諭向榮怡良吉爾杭阿何桂清曰逆  
匪久欲窺伺蘇浙現旣竄擾徽州偪近浙省於東南  
大局關係緊要何桂清前派石景芬等帶勇馳往此  
時當已抵徽向榮現飭楊瑞乾帶領義勇繞赴浙省  
威坪會勦並於金陵撥兵交馬永清管帶由蘇入浙  
鄧紹良帶楚兵由黃池赴浙統帶各路兵勇自可與  
浙省合力救援徽郡該郡爲浙省門戶著飭鄧紹良



迅速馳往扼截勿稍延緩許乃釗准其前赴浙江與  
何桂清會籌防勦事宜至金陵兵勇抽撥較多怡良  
著仍駐常州扼守蘇杭前路徽州距蘇尙遠該督此  
時毋庸卽行回省仍一面嚴防金陵鎮江南竄之賊  
一面多設偵探察看情形再行酌量進止吉爾杭阿  
雖在向榮軍營亦可與怡良督飭在省藩臬大員嚴  
查奸細以杜勾結都司許上達赴徽防勦力戰陣亡

著交部從優議卹

向榮又奏言接余萬清呈稱二月初九日該逆由鮎魚套夾江兩路登岸約四五千人竄距鎮城三十餘里之高資一帶余萬清與虎嵩林分兵兩面迎勦該逆恃衆抵突我軍奮力圍截殺賊八九十人逆勢不支竄回鮎魚套夾江而去初十日領隊進勦詎該逆已在離高資二里許

沿江地面乘夜挖築土壘五座我軍馳往攻撲  
突入賊陣斬馘無算賊衆駭潰忽金山木箴賊  
黨由夾江抄到接應我軍分隊截殺該逆併入  
土壘死守外委袁永忠越過賊濠被槍陣亡復  
據句容縣知縣趙廷銘稟報逆蹤已擾及該縣  
北鄉一帶臣於十三日抽派兵勇一千五百名  
交總兵德安統帶馳往句容攔頭堵剿十七日

德安將兵分作三隊由西面兜撲該逆蠶擁來拒我兵爭先衝殺直逼賊濠該逆退入營盤在後之賊皆被刺落濠內藍翎額外洪得首先搶上賊壘被礮穿腹登時陣亡十八九等呂疊次夾勦將高資賊壘一律掃平余萬清以高資賊壘掃蕩餘逆由夾江金山竄回鎮城當將高資兵連夜撤回並飭各營加緊防勦二十日該逆

由北面分股來撲我營另股從江邊抄至總兵  
劉開泰親督兵勇出擊追殺賊匪百餘人該逆  
敗匿隄埂有賊船二十餘隻由甘露寺江邊前  
來接應適余萬清調回高資兵勇趕到併力合  
戰斃賊四五百名此次逆賊併竄高資意圖久  
踞窺伺經我軍兩路圍剿隨將賊壘掃除又得  
水師會合夾攻殺賊實爲不少至打仗陣亡之

外委袁永忠藍翎額外洪得奮勇捐軀實堪憫  
惜應請

飭部從優議卹奏入

上諭內閣曰分竄高資賊匪經余萬清等分剿斬馘無  
算立將賊壘掃平餘逆竄回鎮江著向榮飭令余萬  
清乘勝攻克鎮江郡城並令虎嵩林等實力會剿毋  
令他竄陣亡之外委袁永忠藍翎額外洪得均著交

部從優議卹

向榮又奏言據總兵吳全美副將李德麟稟稱  
正月二十九日督令紅單拖罾各船上駛會同  
總兵葉常春等扁艇一齊進攻下關將賊船擊  
沈三隻溺賊無算嗣該總兵等擬先攻七里洲  
賊營以分賊勢當於二月初六日寅刻令山東  
勇潛渡七里洲攻襲賊營礮臺吳全美親督三

板船三十五隻駛過南岸接應該逆開礮迎拒  
各水勇奮力直前當將賊卡數處燒燬初八日  
丑刻下關江口放下火船杉箨滿載蘆柴引火  
諸物紅單各船卽分隊截擊適六合縣所派水  
勇亦來助剿盡將船箨燒燬焚溺多賊上游賊  
船於十一二等日竄回三四百隻現泊上河口  
外十三日有賊船數十隻駛出觀音門內河意



欲下竄經總兵陳世忠督令各船迎勦並率同  
六合水勇划船併力堵擊署六合縣知縣溫紹  
原亦親帶兵勇往援當將逆船擊退查五龍山  
江面所設攔練木檔足資堵禦惟此後潮水日  
長江岸增寬以此一綫練檔日沈大溜之中風  
濤撞激恐難久持惟有迅催師船早日攻赴上  
游以遏賊竄奏入報

聞

同日吏部奏言欽奉

諭旨袁甲三著先行交部嚴加議處欽此查袁甲三以  
辦理防勦大員於奏請升補委署總應會同地  
方大吏豈容擅自更易前經奏請疊奉

諭旨輒敢固執不遵又敢飾詞具奏實屬專擅應請將  
都察院左副都御史袁甲三照違

制私罪律議以革職奏入

上從之

初三日乙丑僧格林沁德勒克色楞西凌阿奏言

二月二十八日子刻該逆潛行出巢向西南奔撲因我兵防守嚴密不能免脫詎料該逆暗施詭謀在賊巢以內向西南礮臺邊開挖地道於二十九日夜間將礮臺前濠牆轟塌卽由此處

衝出昏夜倉卒兵勇一時潰亂幸礮臺以外尙  
有圍濠臣聞警馳至調集兵勇截剿始將該逆  
擊退仍潛入溝內依前死拒伏思此股逆匪人  
數無多臣握帶重兵不能迅速蕝功已屬有負  
倚畀今有此挫失尤屬調度無方應請

旨將臣僧格林沁交部議處至挑挖引河業已開工其  
引河兩旁遇有低窪處先行培土築埝以免旁

洩浸沒民田計期十日內外即可竣工

僧格林沁德勒克色楞西凌阿又奏言 臣接奉

上諭以豫省邊防喫緊著 臣撥兵協勦卽札令西安副

都統常亮選帶馬隊一千五百名大同鎮總兵

孔廣順選帶步隊二千五百名卽日兼程前赴

信陽聽候調遣惟馬隊官兵缺馬甚多應請

飭下河南巡撫趕緊籌備以資乘騎奏入

上命軍機大臣傳諭僧格林沁德勒克色楞西凌阿崇  
恩曰馮官屯賊匪狡悍異常雖人數無多尙思竄逸  
若不實力進攻遷延時日該逆轉得乘我之懈肆其  
猖獗何日始能蕨事僧格林沁前奏馮官屯屋宇均  
經轟塌該逆僅恃空窖潛藏以避礮火豈尙容其久  
延殘喘著僧格林沁等督飭兵勇一面奮力圍攻一  
面嚴密防範不准任其竄出再致滋擾挑挖引河業

已開工著卽飭該委員等妥慎督辦惟不得以此藉口致稽進勦另片奏挑選馬步官兵四千名派常亮等統帶赴豫惟馬隊缺馬甚多等語現已諭令英桂載齡購辦馬匹剋日起解卽著飭令迎提應用本日據官文楊需奏逆賊於二月十七日攻陷武昌巡撫陶恩培等殉難雖經王國才等次日收復以兵單不能固守於十九日復陷襄河賊匪亦復蔓延上竄現

在河南南陽信陽等處在在喫緊此項馬步官兵一俟行抵豫省尙應速籌進剿著僧格林沁等飛催常亮等星夜統帶前進毋許稍有逗留

同日楊需奏言臣於二月二十五日接藩司胡林翼鹽法道常恩稟稱十二十三十六等日漢陽之賊至沌口攻撲胡林翼營盤均經擊退十七日早賊匪分股攻撲省城漢口賊船渡江攻



撲塘角省城兵勇水陸堵禦自辰至未鏖戰四  
時之久衆寡不敵賊匪乘勢入城常恩於城外  
白沙洲督兵力戰胡林翼督兵擊退前後撲營  
之賊見省城火起水師戰船全行上駛不能渡  
江撫臣陶恩培於十七日午刻與護臬司署武  
昌府知府多山遊擊陶德壽同時力戰陣亡臣  
聞信之下痛憤交加竊念自廣濟挫敗以來原

皇朝通志卷之三十三  
二十二  
慮省城兵力太單賊匪剽悍思急攻漢陽以援  
省城因調兵不能驟集致省城失守實屬罪無  
可道相應請

旨將臣從重治罪至胡林翼王國才石清吉等兵勇約  
計雖有六七千人惟糧餉缺乏急須接濟且賊  
衆兵單金口南岸恐難駐紮若湖南可以就近  
撥餉金口尙能紮營則相機進剿若不能紮營

則設法渡江上扼漢川等處以固荆襄門戶總  
期阻遏狂氛勿令紛竄

楊需又奏言上年奏撥山西陝西四川餉銀陸  
續解到之款不敷兩月口糧本省又無款可籌  
實深焦灼惟有仰懇

飭下四川督臣山西陝西撫臣無論何款迅卽照數源  
源撥解以應急需

同日官文載增奏言據布政使胡林翼稟稱興國通山嘉魚各匪於十七日攻陷省城撫臣陶恩培等遇害該司因奉檄在漢陽縣屬沌口防勦隔江三十餘里無船可渡李孟羣彭玉麟各紮京山合兵遏賊上竄並籌商水陸進勦之計統計水陸各軍尙有萬餘待餉甚殷請速撥兵餉以保全大局等情臣聞信之餘五內焦急當

飭署荆宜施道莊受祺湊撥銀七千兩錢四千串先行接濟但所需甚鉅惟有仰懇

天恩迅催山西陝西甘肅四川各省應撥餉銀星夜馳

解來楚又據京山天門鍾祥沔陽等州縣稟稱

漢川賊衆竄入府河由長江埠於二月十六日

攻陷應城縣分股欲撲德安等語查應城爲適中扼要之地與安陸襄陽荊州各相距不遠且

民船多藏府河之中儻爲賊擄難保不分擾上游前已派魁玉等扼要堵剿而上游兵力實形單薄應請

旨飭湖南撫臣迅撥水陸各軍由岳州分路應援並籌餉先爲接濟再請迅派川兵來荆由外江內湖並下與督臣兵勇會合兜擊庶不難剿洗賊蹤官文載增又奏言楚北省城不可無大員鎮定

現值軍務事繁刻不容緩 臣等與督 臣又各處  
一隅勢難兼顧所遺湖北巡撫員缺請

旨迅賜簡放以資鎮定惟到任需時所有巡撫關防可  
否卽令藩司胡林翼暫爲代理均奏入

上命軍機大臣傳諭官文楊霈胡林翼曰此次武昌失  
陷雖因兵力飢疲奸匪內應究因漢川進攻之兵不  
能得力致省城孤立無援現在胡林翼等兵勇尙在

金口南岸李孟羣等師船尙紮京山或不難攻復武昌斷賊南竄湖南之路而楊昌泗劉富成之兵遇賊卽退萬分怯弱雖經楊需續派兵勇前往爲數僅得二千若再有挫失則德安迤北可以徑達信陽德安迤西又爲徑趨襄陽之路逆勢蔓延豈堪復問官文所請酌派湖南官兵已諭駱秉章酌辦卽使稍有接濟亦於北岸防勦無裨前諭僧格林沁抽撥之兵本



日據奏已挑選馬隊一千五百名步隊二千五百名  
卽日起程業經諭令英桂徑行催赴荆襄一帶楊需  
務當妥爲調遣或力扼襄陽或進攻德安總以迅速  
勦辦爲要不得再有疏失前調四川兵勇各一千名  
本日復經降旨飭催此項兵勇先從荊州經過官文  
不可率行截留俟續有川兵到時再行分撥會勦此  
時楚省賊勢南北蔓延幾至無從著手官文等分辦

合辦同係一事大江以北朕責成楊需荊州防守事宜責成官文布置南岸攻勦事宜責成胡林翼妥辦其如何互相援應迅圖肅清之處該將軍等務當熟計兼權不能自分畛域也

上又命軍機大臣傳諭樂斌王慶雲載齡曰湖北賊氛復熾武昌失守勦辦萬分喫緊楊需營中之餉早已不敷著樂斌王慶雲載齡無論何款迅速籌撥解赴

楊需大營以應急需前飭樂斌撥兵勇各一千名派  
顏朝斌等管帶赴楚卽著飛催前進此外有無可撥  
官兵並著悉心籌畫添派前往助剿僧格林沁已遵  
旨挑選馬步兵四千名派員統帶徑赴信陽州惟常  
亮所帶馬隊官兵一千五百名缺少馬匹著載齡籌  
撥馬數百匹趕緊解往應用

上又命軍機大臣傳諭英桂曰本日據僧格林沁奏挑

選馬隊兵一千五百名步隊兵二千五百名派副都  
統常亮總兵孔廣順分帶迅赴信陽又據楊需官文  
奏武昌省城已於二月十七日失守賊勢猖獗荆襄  
萬分喫重北路官兵不日即可抵豫英桂斷不可截  
留著卽飭令迅赴荆襄一帶聽楊需調遣至豫省南  
路邊防最關緊要俟北路官兵有可抽撥自當續調  
前往該撫仍當確探賊蹤加意戒備不可稍有疏虞

惟僧格林沁所撥馬隊官兵馬匹不敷乘騎已諭載  
齡於陝西省妥速籌備並著英桂於該省營馬內分  
籌接濟以期無誤軍行

上又命軍機大臣傳諭駱秉章曰據楊需奏武昌省城  
失守巡撫陶恩培等力竭捐軀胡林翼等兵勇約計  
雖有六七千人惟糧餉缺乏急須接濟賊衆兵單金  
口南岸恐難駐紮等語著駱秉章悉心籌畫湖南兵

勇儻有可抽撥卽當委派得力將弁帶赴下游速爲  
援應所需糧餉就近設法接濟如該省兵勇不敷抽  
撥而胡林翼等兵勇又復上扼漢川則金口一帶勢  
難兼顧恐逆匪乘虛上駛該省與湖北毗連在在可  
慮尤宜於南北交界處所水陸要隘加意嚴防

上諭內閣曰逆匪上竄漢口武昌省城兵力本單嗣因  
胡林翼李孟羣等水陸赴援屢有勝仗方冀危城克

保南北夾攻乃該逆遽由興國通山沌口塘角等處  
四面攻撲官兵竟日鏖戰衆寡不敵以致省城失陷  
巡撫捐軀楊需以總督統領全軍自退至漢口後疊  
次進攻毫無把握此次省城被賊環撲又不能迅速  
救援卽按律懲辦亦屬罪無可逭惟現在江北一帶  
防勦需人該督業已革職著仍暫留本任帶罪自效  
如再不將回竄逆匪一律肅清迅圖克復致令逆蹤

擾及上游或久踞武漢卽行從重治罪決不寬貸湖  
北巡撫陶恩培甫經抵任月餘以來嬰城固守茲以  
力戰陣亡實堪憫惻陶恩培著照陣亡例從優賜卹  
以慰忠魂其同時殉難之署武昌府知府多山歸州  
營遊擊陶德壽著該部一併照陣亡例從優議卹湖  
北巡撫著胡林翼署理

同日正白旗漢軍副都統德興阿奏言二月十



七日接准托明阿陳金綬雷以誠及已革總督  
慧成會銜印文不勝詫異查慧成爲已革之員  
在揚效力何以竟與托明阿等列銜行文尤可  
怪者印文鑄刻辦理防剿事務閩浙總督關防  
字據閩浙總督早已另

簡有人該革員何以居之不疑竟用總督印文調遣  
臣

部臣實無所適從竊思

皇 上 既 以 托 明 阿 爲 統 帥 斷 無 令 旁 人 專 權 之 理 不 得  
不 據 實 上

聞 奏 入

上 諭 內 閣 曰 慧 成 係 革 職 人 員 在 揚 州 軍 營 效 力 乃 敢  
與 欽 差 大 臣 托 明 阿 等 會 銜 行 文 並 擅 用 辦 理 防 剿  
事 務 閩 浙 總 督 關 防 調 遣 帶 兵 大 員 謬 妄 已 極 慧 成  
及 伊 子 晉 康 著 托 明 阿 一 併 飭 令 回 旗 毋 庸 再 留 軍

營

初五日丁卯何桂清奏言接安徽學臣沈祖懋來

函二月十三日徽州郡城失陷查徽浙唇齒相依徽郡既失亟須以勦爲防方可固守浙境石景芬等督帶浙省兵勇已由昌化進紮徽界震井地方周天受江長貴兩軍暫屯深渡淮向榮咨復派委遊擊楊瑞乾帶勇七百五十名鄧紹

良帶勇一千八百餘名均由甯國繞至績溪赴  
徽另派都司馬永清等帶兵五百名於二十日  
趨浙省由威坪前進臣卽飭石景芬會同各帶  
兵官相機分路進剿迅圖攻復徽郡石景芬勇  
敢有爲卽責成該員督辦軍務官兵統歸節制  
至於浙境水陸各路應防之處甚多由徽至杭  
以昌化之昱嶺關爲門戶昱嶺關旁爲於潛之

千秋關路通績溪兼達甯國由徽至嚴以淳安  
之威坪爲門戶威坪而下桐廬之七里瀧爲由  
嚴至省最要水路由徽至衢以開化爲門戶俱  
經派員帶領兵勇分撥嚴防並飛咨督臣於閩  
浙接壤之建甯鎮延平協豫備精兵一二千名  
派定將弁統領如衢嚴有警一經飛調卽星夜  
前來援應至於省城地面臣親督巡防不敢稍

存大意何處軍情緊急 臣卽親往督辦

同日英桂奏言連接探報二月十七日賊竄應  
城十八日竄入襄河楊昌泗劉富成等各帶兵  
勇在城外三四十里紮營楊需現在隨州駐紮  
二十二日賊匪盤踞德安府城外並赴應山縣  
搶掠各等語查楚北現在賊情信陽三關尤爲  
偏近然賊謀詭譎設由間道分竄襄樊則南陽

一帶甚屬可虞惟有統籌兼顧不敢稍疏 臣於  
本月初三日起程馳赴信陽仍隨時察看情形  
如果襄樊有警卽與鎮 臣 邱聯恩分投堵禦斷  
不敢坐守一隅並酌量沿途各路防兵如何移  
緩就急隨時調撥應用

同日袁甲三奏言和州久爲賊踞 臣以爲欲規  
取和州必須駐軍和境前經飭令廬鳳道張光

第查勘和州所轄之夾山關距州城五十五里  
其地兩峯夾峙有險可憑較官渡尤爲扼要當  
飭參將劉玉豹等將官渡一軍於本月二十四  
日移紮夾山關該處距烏衣百里串間田家渡  
亦爲賊竄要路現飭全椒縣知縣陳麒昌帶勇  
駐紮以爲兩軍聲援均奏入報

聞



初十日壬申陳啟邁奏言據已革總兵趙如勝等

稟稱正月二十日賊匪約五六千人由安徽建  
德縣竄至饒郡花橋地方趙如勝等以該郡無  
城可守隨帶兵勇往路口地方迎勦以免賊衆  
深入二十一日該逆分爲三股一撲路口一由  
雙港一由磨刀石蠡擁而來趙如勝等卽派兵  
勇分投接戰奮力直前詎料逆船自都昌駛入

饒河竄至郡城抄襲我軍後路以致腹背受敵  
兵勇傷亡頗多趙如勝等駐野竹溝地方收拾  
潰兵正圖進剿該逆又分股竄往浮梁縣屬之  
景德鎮有分擾樂平窺伺廣信之謠並有都昌  
股匪千餘人於二月初四日續竄饒州趙如勝  
等帶兵馳赴石鎮街柘機進攻臣查該逆旣入  
饒郡腹地則廣信撫州建昌三府水陸各路處

處可通若不迅速殲除必致蔓延鄰郡查有署  
撫州府知府林福祥屢經戰陣現已飛飭帶勇  
八百名千總戴正才帶勇六百名均星夜前往  
石鎮街協力堵剿一面會商曾國藩酌派水師  
戰船駛往康山湖面扼要堵禦以杜逆船內竄  
仍約會陸兵兩面夾攻殄茲羣醜並飭令廣信  
府知府袁泳錫駐紮貴溪縣扼要堵禦飛咨浙

江撫臣派兵千名至信郡河口鎮協防至署知  
府曹燮坤署參將文忠都司常安署鄱陽縣知  
縣林蔚堵禦均屬不力相應請

旨一併革職留營差遣以觀後效奏入

上諭曰曹燮坤等均著革職留營效力饒郡內竄之賊  
勿令蔓延方妥

陳啟邁又奏言據武甯縣防堵委員林懋勳都

司馬占魁稟報興國州邊界茅岡嶺山內聚有  
賊匪數百人與武邑紐絲嶺相近意圖竄越經  
馬占魁帶領弁兵三百餘名直前攻勦斃匪四  
十餘人餘匪潰竄又據義甯州知州葉濟英稟  
稱逆衆蔓延通山崇陽通城等縣該州東西北  
三路均極喫重請添兵協防各等情 臣查興國  
崇通復被賊擾江省義甯武甯壤地毗連自應

嚴防竄越業經添撥兵勇共六百餘名馳往武甯候補知州陽秉鏞帶楚勇五百名馳往義甯周密布置實力嚴防奏入報

聞

同日光祿寺卿宋晉奏言查武昌復陷賊勢猖獗難保不乘機上竄窺伺荆襄前此副都統貴陞帶兵督勦遽爾陣亡現在督臣楊需又屢次

退守聲威盡挫深恐不能得力查襄陽與巴蜀  
陝豫疆界毗連設再有疏虞各處籌防更爲喫  
重且川陝尤爲完善之區餉糈尙多仰給關繫  
匪細必得強毅有爲大員方足以資捍禦川地  
現稱安靜署總督樂斌鎮理有餘黃宗漢甫經  
赴任可否

飭令折赴襄陽並一面調派川中兵將前來與荊州將

集賢堂明卷一百二十三 三十一  
軍官文合力攻勦庶以新銳之兵乘上游之勢  
勦辦易於得手不特四川陝豫門戶悉固卽武  
漢亦可剋期收復曾國藩塔齊布更可一意東  
下肅清江面於全局似有裨益奏入

上命軍機大臣傳諭樂斌黃宗漢曰逆匪意圖上竄湖  
北荆襄情形緊要官文駐紮荊州兵力未免單弱楊  
需一軍又屢經挫失現在棗陽一帶遏該匪北竄之



路自武昌復陷胡林翼李孟羣等所帶水陸兵勇亦不免勢孤殊爲可慮黃宗漢此時將次抵任著偵探荊州一帶情形如賊蹤尙未掃除卽與樂斌商酌督帶兵勇馳赴夔巫一帶相機進剿其四川總督事務仍著樂斌署理如探知楊需各軍剿辦得手逆匪不至上竄該督卽可無庸前往仍飭前調兵勇迅速赴楚毋稍延誤

十一日癸酉何桂清奏言逆賊裹脅各路土匪分

踞徽州歙縣黟縣休甯四城一聞大兵雲集卽

有蒼黃西竄之意石景芬在霞井軍營先經密

派勇目許庭桂等溷入郡城探知賊情擬於二

十三日潛師夜遁飛報回營石景芬卽由霞井

移營進紮大阜派令勇首夏寶慶等管帶槍勇

爲第一隊直抵東門又令勇首李恆淞等管帶

台勇爲第二隊由護嘉興協副將魁齡督帶直  
抵北門其第三隊由石景芬親督直抵南門從  
紫陽橋一帶連環施放槍礮長驅直入勢如破  
竹該逆聞風喪膽馬隊飛竄西門我軍步追十  
餘里生擒賊目二十餘名土匪數十人一併軍  
前正法其餘轟斃殺死者不計其數該逆由屯  
溪一路竄往休甯是夜不及窮追收隊入城查

勘郡邑兩城各衙署尙存石景芬卽將各勇分  
派各城門紮營嚴守 臣查此次進剿徽州逆匪  
浙江將士勇於用命旬日間克復郡邑兩城實  
爲至幸鄧紹良統帶兵勇指日抵徽卽當會合  
攻克黟休二城以冀早紓

宸廬至金華府知府石景芬於大兵未集以前深入賊  
巢功成一夕實屬奮勇有爲徽郡善後事宜 臣

卽責成該員一手經理合無仰懇

天恩先予超擢以作士氣奏入

上命軍機大臣傳諭何桂清曰逆匪竄入徽州歙縣旋  
經石景芬督帶浙江兵勇剋期收復辦理尙屬迅速  
惟該逆知大兵雲集聞風逃竄我兵追殺賊匪並無  
確數是該逆忽聚忽散究未大受懲創現在賊衆蟻  
聚休黠二城必須乘此聲威迅圖克復此時鄧紹良

統帶兵勇諒已馳抵徽郡所有各路帶兵官弁均歸  
鄧紹良調遣以專責成該撫卽督飭該員進剿休夥  
賊黨並酌留兵勇防守徽歙毋令乘虛回竄再致蔓  
延其徽浙各路軍務及一切支應事宜卽飭臬司晏  
端書實力督辦

上諭內閣曰逆匪攻陷徽郡並將歙縣城池占踞經知  
府石景芬督飭勇首夏寶慶等帶勇分隊進攻東南

北三門逆衆逃竄西門我軍追殺十餘里轟斃殺死  
者不計其數立將徽州歙縣收復現在向榮所派鄧  
紹良各軍將次雲集著何桂清飭令鄧紹良乘勝進  
剿克復休甯黟縣二城以清徽境金華府知府石景  
芬深入賊巢克復郡邑辦理尙爲迅速著記名以道  
員用並賞加鹽運使銜在事出力員弁兵勇著何桂  
清酌覈保奏

何桂清又奏言 臣查徽郡防務辦理之最不善者莫如恩禧該員以甯池太廣道兼攝徽州府節據該郡紳士赴 臣衙門稟稱恩禧置防務於不顧至警信疊報猶斥爲妄言扣留捐項積欠勇糧數十日不發以致人無固志臨陣潰散連失數城實屬貽誤地方現在不知該員下落等語安徽撫 臣遠在江北 臣不能不越俎而謀相



應請

旨將恩禧先行革職仍俟沈祖懋查明該員下落再行  
具奏奏入

上諭內閣曰安徽甯池太廣道兼署徽州府印務恩禧  
於徽州防務既不實心辦理復扣留捐項積欠勇糧  
致兵勇不能用命實屬貽誤地方恩禧著先行革職  
仍著何桂清查明該員下落據實具奏

十二日甲戌托明阿陳金綬雷以誠奏言據分防

浦口之總兵武慶暨署六合縣知縣溫紹原稟  
報拏獲奸細劉大潰等供稱金陵首逆擬由水  
陸各處攻襲浦口大股北竄又據探瓜鎮之賊  
仍欲窺伺揚州三汊河及樸樹灣儀徵一帶等  
語查浦口緊對金陵乃濱江最要之地武慶兵  
力甚單亟須增添堵禦當卽抽出精兵四百餘

名星夜馳赴浦口多豎旗幟以張軍威並飭浦  
口江浦六合儀徵各鎮將會同地方官一體嚴  
防並函商向榮彼此嚴督上下水師設法會剿  
斷賊攔江箠練遇兩岸與賊接仗時迅卽駛近  
江岸協剿昨聞吉爾杭阿已到鎮江亦與函商  
先斷瓜鎮賊匪往來之路以孤逆勢至臣等連  
次進攻瓜州該逆每堅守不出間或東西出巢

滋擾一經官軍迎勦輒復遁回去冬臣等曾商  
東西分築長圍使賊不能旁抄側襲則我師遇  
機卽進可以直搗賊巢惟以經費不敷急難籌  
辦現於勸捐項內樽節籌款趕緊築造一俟長  
圍築竣卽約各路合力進攻總期肅清江面以  
紓

聖  
塵

托明阿陳金綬雷以誠又奏言昨由僧格林沁  
酌撥馬步官兵二千名派總兵薩炳阿管帶現  
已抵揚其由上海撥來拖罾戰船十隻係總兵  
泊承陞統帶亦已駛至焦山臣等現與吉爾杭  
阿密商陸路分攻瓜鎮水路卽破金山賊壘使  
賊三路不能相顧庶南北兩城均易著手奏入

上命軍機大臣傳諭托明阿向榮吉爾杭阿陳金綬雷

以誠曰金陵逆首旣欲由浦口北竄則自揚州以西  
儀徵六合浦口至江浦等處皆須節節嚴防而瓜鎮  
賊匪欲撲揚州三汊河樸樹灣一帶蓄謀亦非一日  
薩炳阿管帶之馬步官兵現已抵揚泊承陞所統拖  
督船已至焦山吉爾杭阿亦督率兵勇助攻鎮賊自  
應南北進兵陸路分攻瓜鎮水軍攻取金山使該逆  
三路不能兼顧方爲上策浦口緊對金陵本爲賊蹤

往來之地江浦後路復可暗襲浦口武慶等兵力甚  
單托明阿所稱抽撥精兵僅止四百餘名是否足資  
堵禦江北屏障之區布置不容罅漏仍須責令武慶  
溫紹原等實力扼守其浦口以上梁山以下烏江一  
路本有恩錫張光第在彼駐紮亦可與該司道聯絡  
聲勢藉免後顧之虞惟攔江賊練賊簿日久未斷終  
恐衝突爲患托明阿等與向榮雖各統各軍實同辦

一事著卽公同嚴督上下水師會勦先毀賊練遇有  
兩岸接仗卽駛赴江岸協擊向榮前奏李德麟吳全  
美等紅單扁艇俱有損傷刻下當已修整卽應趕緊  
進勦五龍山江面雖設有攔練木檔而江漲日寬風  
濤撞激究未可恃至瓜州賊匪匿巢不出非併力攻  
搆卽築就長圍不過杜其出擾總宜亟籌戰取以覆  
賊巢



同日曾國藩塔齊布奏言臣等就湖北安徽江西三省全局論之陸路須有勁兵四支水路須有勁兵兩支乃足以資勦辦北岸自蘄水廣濟黃梅以達太湖宿松是爲內一路自漢口黃州蘄州田鎮武穴濱江而下以至小池口望江縣是爲外一路南岸自九江以上興國通山崇陽武甯等屬皆土匪勾結粵賊之淵藪是爲西一

路自湖口以下東流建德饒池徽甯四府皆逆  
匪覬覦浙江之要途是爲東一路北岸之黃梅  
太湖前臨大江後枕潯岳一山屏蔽舒廬爲該  
逆必爭之地南岸池州雖係瘠區而大通鎮殷  
家匯水陸交衝南窺徽嚴東障蕪湖亦爲該逆  
必爭之地故南岸以東一路爲最要而西路次  
之北岸以內一路爲最要而濱江一路次之四

路者須陸兵四支缺一不可者也水師自武昌以達湖口爲上一支自小孤山逾東西梁山以達太平采石爲下一支乃與紅單船相接兩支各自成軍分段肅清庶免首尾不顧腹背受敵之患亦缺一不可者也今臣等水軍陷入鄱湖之船百餘號回救鄂省之船百餘號業已分爲上下兩支似有因禍得福之機然內湖一軍臣

國藩來江整理造船添勇無難就緒回鄂一軍  
以被風擊壞之船當將士疲勞之後與漢口新  
竄之賊相持臣等又不能分身前往統領日夜  
懸念每聞春風怒號則寸心欲碎見賊帆上駛  
則繞屋徬徨不知李孟羣等果能添置小船復  
振軍威否臣等祇此一軍欲分爲兩支則立形  
單弱欲常聚一處而事勢所迫有不得不分者

又不敢過於持重致失機宜謹就目前之急務  
度臣等力所能辦者分條布置爲我

皇上陳之一現在賊竄饒州樂平分擾景德鎮祁門徽

州等處所謂東路者也爲江浙轉餉之路亦爲

奏報入京之路關繫大局非輕臣等分派羅澤

南帶湘勇三千由江西省城繞至湖東攻剿饒  
州之賊又與撫臣陳啟邁合募平江勇四千同

勦東路俟饒郡克復卽引兵直下或趨景德鎮  
或由建德進攻池州北路有重兵使安慶之賊  
震動則浙江之患可以少紓臣等前摺所謂賊  
攻我之所必救我亦攻賊之所必救也一悍賊  
石達開等堅守九江及對岸之小池口臣塔齊  
布一軍仍留五千人穩駐潯郡伺隙攻城使賊  
不敢全數上竄武漢亦不敢奔突他處惟前此

攻圍潯城至萬五千人之多兩次派胡林翼王國才回援鄂省者六千餘人此次派羅澤南馳勦饒州者又三千人存潯官軍過形單薄俟籌添兵勇續行具奏一正月二十八日臣曾國藩派水師船六十餘號至康山地方駐紮外防大江之賊駛船入湖內防饒州之賊擄船出湖其餘弁勇尙在江省修船日內修完大隊進紮南

康青山一帶其湖口賊卡浮橋旣堅鋪以木板  
填以土石人力難以遽破俟春江漲盛水陸併  
攻卽當力破浮橋衝出大江一臣曾國藩來江  
已逾月餘日內船隻修齊卽駐紮鄱陽湖內四  
處游弋西近塔齊布九江一軍聲息常通東近  
羅澤南饒州一軍調度亦便兩軍相隔已在六  
百里外全賴水師在湖中接遞信息庶可彼此



相應如東路攻勦得手能至彭澤東流等處將  
來水師出江乃得所依護而無孤懸之患以上  
四條就目前之急務 臣等力所能行者籌商辦  
理是否有當伏乞

皇上訓示施行

曾國藩塔齊布又奏言論中原之大勢則江北  
重於江南論此賊力爭長江堅守廬州之情亦

三十三  
區

必須梅太舒桐一帶有大支堅強可恃之兵然後內可以克廬郡外可以清江面此時江北縱不能籌備兩軍亦不可不添置一軍伏查鳳陽之臨淮關由壽州光固以達於麻城黃州程途不過八百餘里副都御史袁甲三在臨淮駐紮年餘與壽州相隔咫尺光固亦其桑梓之地若令該副都御史招募二處之勇練成五千勁旅

由麻城出黃州之背不過十餘日可到人地既  
熟道途無梗出其不意邀而擊之則斬黃各屬  
可復皖鄂兩省之氣可通相應請

旨飭下袁甲三招募壽州光固之勇由麻城迅出黃州  
以全江北大局

曾國藩塔齊布又奏言臣等一軍曾經奏請江  
西湖南四川三省勸捐助餉今賊匪占踞漢口

臣軍遠隔下游糧道已斷四川湖南之餉不能  
運解來營卽去歲奏准陝西協餉下欠十二萬  
兩亦不能解到僅恃江西一省捐項臣等水陸  
萬餘人殊不足以資接濟相應請

旨飭下江西撫臣陳啟邁在於四年清折項下每月酌  
撥銀兩以濟臣軍如江北添一支勁兵臣等奏  
准川陝之款卽可撥歸江北一軍應用惟上游

西通川陝北通河南來源尙廣臣軍僅取給於  
江西來源太隘勢難久支不揣冒昧請

旨飭下福建督臣王懿德浙江撫臣何桂清每月各籌  
銀二萬兩解赴臣軍俾兵勇口食不匱免生他  
虞奏入

上命軍機大臣傳諭曾國藩岑齊布陳啟邁曰據奏楚  
皖江西三省全局陸路須分兵四支水路須分兵兩

支於勦辦機宜頗爲明晰惟前據楊需等奏武漢復  
遭蹂躪賊勢益張該侍郎等水陸兩軍已成孤立之  
勢現在賊窺饒州樂平分擾景德等處羅澤南已帶  
勇進剿著卽飭該員趕緊克復郡城以次掃除昨據  
何桂清奏賊破徽州已經收復現擾休黟等處羅澤  
南如勦除饒州賊匪卽可相機前進攻勦池州安慶  
之賊塔齊布圍攻九江亦未便撤動仍當添募兵勇

奮力攻擊以牽制逆匪使不得肆行奔突曾國藩師  
船並江西所造戰船尤須設法將湖口賊卡浮橋併  
力攻毀駛出大江與塔齊布在九江會合以圖克復  
袁甲三現已革職飭令來京臨淮兵勇本不甚多不  
能撥赴麻城黃州募勇恐緩不濟急本日已諭令和  
春等酌量辦理至曾國藩等所需餉銀已諭閩浙兩  
省照數籌解但恐尙需時日著陳啟邁於四年漕折

項下每月酌撥銀兩以濟要需四川湖南等處餉銀  
仍當設法催提俾資接濟

上又命軍機大臣傳諭和春福濟曰前因袁甲三交部  
嚴議飭令來京其所帶兵勇當諭令和春等酌委大  
員前往接替惟現派何員前往尙未奏報殊深懸繫  
本日據托明阿等奏浦口六合等處拏獲奸細有金  
陵逆首擬由水陸攻襲浦口大股北竄等供托明阿



等攻勦瓜鎮賊匪正當喫緊勢難多撥兵勇赴浦口防禦武慶等兵力甚單設有疏虞關係甚鉅浦口與皖省接壤其烏江一帶前經官軍屢次攻毀賊壘卽著嚴飭廬鳳道張光第等實力防禦與武慶等浦口之師聲勢聯絡以杜賊匪北伺之意參將劉玉豹駐紮全椒縣屬之官渡亦可就近策應又據曾國藩等奏稱臨淮關由壽州光固以達麻城程途甚邇若令

袁甲三由臨淮招募壽光二處練勇五千由麻城出  
黃州之背併力邀擊則蕪黃可復皖鄂兩省便可聲  
息相通該侍郎所籌自因江北一軍並無得力勁旅  
故擬添此一軍以資進勦惟臨淮防堵亦甚緊要此  
時能否分兵前進著和春等酌度情形妥籌辦理廬  
州賊匪既已窮蹙官軍長圍已合何以日久尙未得  
手總須早復廬郡大兵便足敷分撥務卽迅圖克復

分派弁兵歸王庭蘭調遣並擬令添募壯勇以  
助兵威臣現在抽調餘丁酌募壯勇數百名剋  
日會齊卽行帶同出省其歸德一路仍飭候補  
道張維翰督率兵勇分守永夏邊境確探皖省  
消息實力嚴防仍咨會袁甲三就近互相知照  
隨時戒備儻或賊蹤逼近卽會合攻勦臣本擬  
卽日先往歸德惟查該處距光州較遠緩急難

集賢堂方略卷二百一十二  
二

期策應陳郡則與歸德接壤而距光州亦近兩地均能兼顧實爲適中之區一俟省中調募兵勇到齊卽日出省居中調度仍俟到防後何路緊急卽馳往何路策應固不敢株守一隅尤不敢顧此失彼奏入

上命軍機大臣傳諭英桂曰皖豫交界防堵據該撫所奏三路布置情形尙屬周密惟袁甲三前派臧紆青

毋再遲延

上又命軍機大臣傳諭王懿德何桂清曰曾國藩等駐兵江西省城因湖北武漢一帶爲賊占踞糧道已斷四川湖南之餉不能運解前往其水陸各軍兵勇口食僅恃江西一省捐項不敷支放必須鄰省通融協濟方足以資攻勦著王懿德何桂清於該省無論何款項下每月各籌銀二萬兩派委妥員解赴曾國藩

等軍營應用勿誤要需